

# অক্ষকান

৩য় বছর, ৪র্থ সংখ্যা  
হাওন, ১৪১৩ সন।

মাহেকীয়া সাহিত্য সংকলন  
বিষ্ণুপ্রিয়া মণিপুরী

IIIrd Year, Vol. IV  
August, 2006.



শুভ উদ্বোধন

১ মাঘ, ১৪১১ সন

সম্পাদক

শ্রীশ্রী কুমার মন্ডল

ভাঃ বনসেবা (অবঃ প্রাপ্ত)

## **APARUPA**

*A monthly, Sahitya Sankalan, Published in Bishnupriya Manipuri Language, Printed at Angelica Imprint, Gancshguri, Guwahati - 781 005*

---

### **Editor - Compiler**

M. K. Sinha, IFS (Retd.)

### **Publisher**

Shankar Sinha  
Rajgarh Road  
Guwahati - 7

### **Cover Designed by**

Net Education Brotherhood  
Rajgarh Road, Guwahati -7

### **Copy Right**

M.K. Sinha, IFS (Retd.)  
Guwahati -7

### **Price**

Rs. 25.00 only



# অপরূপা

## মাহেকীয়া সাহিত্য সংকলন

### বিষ্ণুপ্রিয়া মণিপুরী

৩য় বছর, ৪র্থ সংখ্যা, হাওন, ১৪১৩ সন।

#### সূচীপত্র

সম্পাদকীয়	২
পরিচালকর কথা আকচুটী	৩
প্রকাশকর কথা আকচুটী	৪
১। প্রশ্ন	নমিতা সিংহ ৪
২। কিম্ কুর্য্যাম্	ফাল্গুনী সিংহ ৪
৩। ছড়া কতহন	সরালেল সিংহ ৫
৪। মিতল নায়	ইন্দ্রকুমার সিংহ ৬
৫। দহন	কাশ্বন বরণ সিংহ ৬
৬। সেয়াগরে	সমরজিৎ সিংহ ৭
৭। আরৌপী কথা আকচুটী	গৌর বিধু সিংহ ৭
৮। ভাগিয়া পড়িল ঘরগ	গুরু দেবেন্দ্র সিংহ ৭
৯। রামায়ণ, আদিকাণ্ড	মহেন্দ্র সিংহ ৮
১০। Ak-47	শশীকান্ত সিংহ ৯
১১। উম আহির পানী	ব্রজেন্দ্র কুমার সিংহ ৯
১২। না মরিল হজক বিছাড়েয়া	ডঃ স্মৃতি কুমার সিংহ ১২
১৩। কলির যশোদা	সুখেন্দ্র কুমার সিংহ ২১
১৪। দেব ভূম	যযাতি ২৪
১৫। শিশু মুক্তি	ডঃ অশোক সিংহ ৩৩
১৬। মানব স্বীকৃতির কাঙাল	ব্রজগোপাল সিংহ ৩৪
১৭। জার্নালর যারি	সমরজিৎ সিংহ ৩৬
১৮। চিঠি পত্রত মতামত	৩৬

#### সম্পাদকীয়



শ্রীশ্রীকৃষ্ণর শুভ জন্মাস্টমী বারো ভারতর ৬০তম স্বাধীনতা দিবসর বানা-নুংশি শুভ কামনা বারো হৃদয়ৌপা অভিনন্দন জানাউরী।

গাঙে-ঘরে, শহরে-নগরে, নবদ্বীপ, বৃন্দা বন (ধর্মীয় প্রতিষ্ঠানে) আমার ফিরাল ফরদের। সাহিত্যর ক্ষেত্রেতৌ আমার অগ্রগতি আছে। শিক্ষা-দীক্ষার জগতেউ আমার সমাজ বহু আগ বাড়েছি। আধুনিকতাতে আমার সমাজ কাদাবারার তুলো সমপর্যায় আহেছি। রহন-সহন-লৌলিকতা এতার স্পষ্ট ছাপ দেহিয়ার।

কিন্তু অর্থনৈতিক বিকাশ, বেহা-বেপার, শিল্প-বাণিজ্য, প্রযুক্তি, সরকারী চাকুরী-বাকুরী, সংস্কৃতি বারো কৃষি-কর্মর বিকাশ আজি ৬০ বছরেউ আমারতা সর্বভারতীয় মান-দণ্ডর বহু নিম্নে আছে। রাজনৈতিক ক্ষেত্রে আমার অরক্ষয় অতিপাং আহিৎ পড়ের। উত্তর-পূব ভারতর খণ্ড-বিখণ্ডতার লগে প্রাদেশিকতার ভেঙ্কিগৎ আমি গুড়া গুড়া ঐয়া আহি। 'ভূমিপুত্র' অর্থাৎ লামরছৌর লামচেতে আমি লামনেই এতার এবাকা কূল-কিনারা নেয়ছে। আমার উঠে আহিতারা শৌ-গাভুরা পুয়েই, পুরীজেলেই এবাকা প্রফেশন, এভকেশন, সংস্থান, জীৱিকা বৃজির চিন্তায় মুর্ছিয়া আহি। অন্যান্যরতাউ আহি। ঐলেউ তানুরতা চাকুরা আহি। অরস্থান, আছে। অভিভাবক আহি। আমার তা ওবারাউ শূণ্য। পরগাছার সাদানে পরর আতজাঙ ধরিয়া ভর দিয়া উবা অনিছাড়া নিরুপায়। দেশ গাঙ-ঘর বেলেয়া জীৱিকার সালে দিল্লী, বোম্বে, মাদ্রাজ বাঙ্গালোর বিশেষ করে - দিল্লীং ধাওয়া করতার। নুয়ারতারাতই কোম্পানী নামর জগৎ আহানাৎ যিতরাগা। সরকারী বারী এহনাৎ আমারতা কোন প্রকারর ফসল না ফলের। স্বাধীনোত্তর যুগে আমি পরাধীন জাতিরাঙতো আতলপা ঐয়া থাইলাঙ। এহানার হোতানেই প্রভাব আমার সমাজ-জীৱনে পড়িয়া আমার সমাজ ছারখার ঐয়া যানার পথে। ঘরে ঘরে গাভুরাপুয়েই পুরীজেলেই সংসার না পাতিয়া থাইলা।

স্বাধীনতার ৬০ বছরে ভারতর নানা দিশাত উন্নতি আছে। আর্থিক বিকাশ আছে। আছেতার ধন সাম্পাল ঐশ্বর্যর অভাব নেয়ছে, নেইতার হাবি বারাদে আরাকৌ নেয়েয়া আহের। শিল্প-বাণিজ্য, কল-কৌশল, প্রযুক্তি, উৎপাদন, আধুনিক সাজ-সরঞ্জাম, ইনফরমেশন টেকনলজি, টিভি-সিনেমা-সংস্কৃতি রিয়েল স্টেট, কমিউনিকেশন, হেলথ কেয়ার, ট্যারিষ্ট ইনডাসট্রি, বেঙ্কিঙ, ইনভেস্টমেন্ট, হাই-প্রোফাইল জবস্, ভি, আই পি, ভিভিআইপী, মডার্ন এ্যাডুকেশন, হোটেল ইনডাসট্রি হাবিক্ষেত্রে ভারত অতি আগবাড়েছি। মানু উপকৃত অছি - কিন্তু আমি, স্বাধীনতার আগে যে তিমিরে আছিলাঙ হৌ তিমিরেই আহি। বরঞ্চ বিশ্বায়ন বারো প্রতিযোগিতার রোলারর তলে পিষিয়া পিষিয়া খতাদে রকত বঙিয়া থাইলাঙ। আমি শূণ্যস্থান পূর্ণ করে নুয়ারেছি। হুদা দুগ-আগ শৌর কৃতকার্যতা, দুহান-আহান পরিবারর ঝলকানিয়ে সমাজহান নাউ বাল্কিতৈ।

এমতাবস্থায় আমি দিশহারা ঐয়া মুর্ছিয়া পড়লে নিশ্চিহ্ন অনা ছাড়া গতাস্তর নাইতৈ। আমারতা এবকা ধীর-স্থির মতিলো নুবু করে চিন্তা-চর্চা করানির মাতাম আহেছে। আমি সামূহিক উঠানি মনেইলে, আমি সামগ্রিক জিঙতা ঐয়া থানা মনেইলে পথি বিছাডানি লাগতৈ। আমার লক্ষ্য স্থির করানি লাগতৈ। লক্ষ্য স্থির করিয়া সর্বশক্তিলো মনে-প্রাণে-একীন ঐয়া লক্ষ্যভেদ করানি লাগতৈ। কৃষি-কুটীর-শিল্প, হরকাঙ উদ্যোগ, শিক্ষা, কারুকার্য, কল-কৌশল, বেহা-বেপার, সংস্কৃতি, যোগয় যেহান পারিয়ার,

যেগরাঙ যে ক্ষেত্র পাকর ঔক্ষেত্রে দৃঢ় প্রতিজ্ঞ ঐয়া খংচেং লিঙিয়া কাকেই কারানি লাগতৈ।

যেহেতু আমি দুৰ্ৰল, কমজোড় বারো সংখ্যালঘু জাতহান, আমি এবাকার চৈচৈ নাঙ মনোবৃত্তি, আগয়-আগয় থিনা-হিংসা নিন্দা-কৌলি-গালি-য়েকনা-য়েকনি, আগরে আগয় আচুলিয়া বেলানি, লৌনাম লৌখি, এতাৎত স্বাধীন অনা লাগতৈ, নিজে, ঘর-ভিতরে, পরস্পরে ঘরর বাইরেউ। নাইলে, নিজে নিজে, নিজরমা, ঘর-ভিতরে মারা-মারি কাপা-কাপিলো মজিয়া আমিযেই আমি নিশ্চিহ্ন ঐয়া কুলতে মজেইতাঙাই, জাতহানৌ মজেইতাঙাই। হোভা অনাৰ তামা-তামি, আগেদে-মুঙেদে কাকেই কারানির তামা-তামি, শ্রীবৃদ্ধির তামা-তামি, আগরে আগয় পাঙলাকর তামা-তামি, আগরে আগয় আচুলিয়া কাকরাণির তামা-তামি, নিজর মা, ঘর-ভিতরে ঘরর বাইরে অতি দরকারী। চাঙখল মন আহনলো নিজরকা, কাদাবারারকা, দোয়ারকা, যেহানৌ পারিয়া করে দেনার সং প্রবৃত্তি এবাকা আমারতা লাগের।

আমি স্বাধীন, এহানর অর্থ - যেগয় যেহান মনেয়ার করানি, যেগয় যেসাদে মনেয়ার চলানি, উতায় অন্যর ক্ষতি ঐলেউ খিয়াল না করানি উহান নাগৈ। চঞ্চল মন এহানরে সংযমে আনিয়া বশীভূত করিয়া সং ইন্দ্রিয়েৎতে মুক্তি দেনা উহানেই স্বাধীনতা।

শ্রীকৃষ্ণর কংস বধ, শিশুপাল বধ, এতা চঞ্চল মনর অসং ইন্দ্রিয় দমন। বারো কুরুক্ষেত্রে জয়লাভ এহান অসং ইন্দ্রিয় এতারে জয়লাভ করিয়া ধর্মক্ষেত্রে অসং ইন্দ্রিয়ৎত মুক্তি বা স্বাধীন করেদেনা হান।

আধুনিকতার বিশ্বায়নর তামা-তামিৎ আমি কিন্তু আমার মহামূল্য অতি নিজস্ব সম্পদ আহান, আমার জাতীয় বৈশিষ্ট্য আহান না হারপেয়া বারাদে বেলা যিয়ারগা। যেহানে আমারে ভিতরে ভিতরে সুমে খেয়া নেরগা। আমার সমাজ জীবনে অবক্ষয় আনে দেছে। আমার মনর 'বসুদৈব কুটুম্বকম্' ভাবহান নেয় যারগা। আমার কলা-কৃষ্টি-সংস্কৃতি যেতালো আমি আমারে হাবিয়ে লুরীনালা আহনলো ফুলডাল আহান করে গিথিয়া থছিলাঙ উহান আমার অজান্তে আমরাঙতো দূরেই অয়ারগা।

আমার পদাবলী কীর্তন, সংকীৰ্তন, বাসক রাস-রাখোয়াল, রামায়ণ, লঙ্কাকাণ্ড, আষাঢ়র, কার্তিকর পালি, আরতি চরকরানি, মঙ্গলারতি, ফাগুনা, গাওণ, রামায়ণ-মহাভারত পাঠ, সেন্দানাম - কীর্তন, এতা এতায় সমাজ জীবনর কঙালা মনহানরে হৃদায় আগরে আগরে কাদা ফৌকরাণিত সহায় অছিল। উতারে আমি খৌতাল দিয়া পুনর জীবন পালকরাণি থক। এতারে বিশ্বায়নর বিকাশর লগে পরিপোষণ, পরিপালন করিয়া নেনা থক। কারণ জাতীয় বৈশিষ্ট্য, এতায় আমারে অতীজর কঠিন দিনে জিংতা কবিয়া থছিল বারো ভবিষ্যতেউ পাঙকাল বরাদিয়া আমারে জিঙতা করিয়া থৈতৈ।

আজি ঘরে ঘরে কৃষ্টি আহান গড়িয়া উঠেছে। বুড়া-বুড়ি এতার কর্ম-বিরতি নেয়ছে। অবসর বুলিয়া বুড়া-বুড়ি এতা জিরাণি নুইলা। যে বয়সে পখানি লাগের ঔ বয়সে তানু সংসারর যাবতীয় কর্ম করানিৎ পড়েছি। কিয়া বুঝে-ঘরে থাকুনা শৌ-শুমারা নেয়ছি। হাবিহান কর্মর সালে দোয়াদে যিতারাগা। পরিবার পরিকল্পনায় করেদেছে হুঁসকাঙ পরিবারে হাবিরতাউ দুগ আগ শৌজিপুৎ ছাড়া মিয়াম নেই। আগেকার ডাঙড় ঘর শৌ-শুমারালো কে কে করিয়া আছিল উহান এবাকা নাছে। দুগ আগ শৌ ঘরে থায়া ঘরর কাম কাজ করলা, চেইলা দেখলা - বুড়াবুড়ির লেম্পাল সিলকরলা উহান নাছে। তানু নিজর কর্মস্থলীর কামে অতিপাৎ বাস্তু অছি। উতাৰ গজে এমন সংস্কৃতি আহান দেহাদেছে - তানু রাতি নঙেই পেয়া না ঘুমজিয়া কাম কাজ করতারা বিয়ানে ডিলকরে উঠতারা। উঠিয়াই কোন পধ্যে প্রাতঃকর্ম লৈকরিয়া ভাত কতগ থতাহানাৎ বড়োয়া দিনকার টিফিন আহাতুলিৎ চিপেয়া কর্মস্থলীৎ বুলিয়া বিয়ানেই নিকুলতারা। রাতিকার ৮।৯ বাজিৎ ঘরে পারা দিতারা। উতার গজে খানি-মানি কর্ম-শ্রম বিমুখতাউ আছে।

আজিকার এ পরিস্থিতিৎ বুড়াবুড়ি এতারে সুস্থ জীবন আহান দেনার চিন্তা করানি থক। অন্ততঃ এবয়সে যেসাদে খানি জিরাণি পারতারা উহান করেদেনা এহানৌ বিশ্বায়নর অতিপাৎ কর্মব্যস্তার হাদিৎ শৌ জিপুতে চিন্তা করানি থক। অতি বাস্তবতার হাদিতৌ সময় সংস্থান করিয়া বিয়ানে-মাদানে-রাতিতৌ যেহানি পারিল উহানি করেদিয়া জিরণ আহান দেনা নাইলে নুঙেইপা সংসার আহান না পেইতাঙাই। বুড়াবুড়ি এতা মনে হীন পকৈয়া থাইতাই। ৬০-৬৫ বছর বয়সর পিছেদে তানুরকি কর্মশক্তি থাইতৈ? সমাজরে ভিতরে ভিতরে থা নেরগা এ অপসংস্কৃতি এহান দূরেই করানি অতি বাঞ্ছনীয়। -

শ্রীমদ্রবীন্দ্রনাথ ঠাকুর

৩০শে হাওন, ১৪১৩।

সম্পাদক

অপরূপা

## শ্রীচালকর কথা আকচুটী -

'অপরূপা' গ্রাহক গিরিগিথানীরাঙ ডাকে দিয়া পেঠানি অর। এবাকাপেয়া গ্রাহকরাঙত 'অপরূপা' না পাছি বুলিয়া কোন চিঠিপত্র নাহেছে। প্রকৃত পক্ষে গ্রাহক নাছি বহুগিরিগিথানীরাঙত বহু চিঠি পত্র আহের। এহানে হাতে হাতে 'অপরূপা' সমাজে সমাদৃত অয়ারগা বুলিয়া হারপেয়ার। পরিচালকর প্রচেষ্টা হৃদায় আছে 'অপরূপা' লয়ায় লয়ায় সিলক।

'অপরূপা'র মূল্যহাস করাণির বহু প্রস্তাব গিরিগিথানীয়ে দেছি। লাগে সাহিত্য সংকলন হানর প্রচ্ছদপট সাদাসিদা করে দেনি, যাতে 'অপরূপা' দীর্ঘায়ু অক। উহান ঐলে যেনিঙে আমি



সংকলন হান নিকালেরার উহান ব্যর্থ ঐতৈ। বর্তমানর  
পারিপার্শ্বিকতাং যে উচ্চ মানদণ্ডর ম্যাগাজিন বাজারে নিকুলের  
উতার তুলনাং আমার এহান লেয় পরতৈগা। আমার বিষ্ণুপ্রিয়া  
মণিপুরী সমাজ এহানযে আর আরতারাঙতো তল নাইগে বরঞ্চ  
সমপর্য্যায়ে আছি উহান তুলিয়া ধরিয়া থনা থক বুলিয়া খাল  
করৌরী। 'অপরূপা'র লেখক-লেখিকা গিরিগিথানী যে সাদে উচ্চ  
মানদণ্ডর অছি উসাদে তানুর লেখা নিকুলের সাহিত্য-  
সংকলনহানৌ উচ্চ মানবিশিষ্ট ঐলে তানুরতাউ মান ইজ্জৎ থার।  
তারো 'অপরূপা'র মূল্য হ্রাস করানি এহান সম্ভব নাইতৈ।

৩০শে হাওন, ১৪১৩ সন।

পরিচালক  
অপরূপা

## শ্রদ্ধাশকর কথা আকচুটী-

সম্পাদক ডাঙরীয়াৰ দীর্ঘদিন নুয়ারা-পানী ঐয়া পড়িয়া  
থানায় 'অপরূপা' শাংকরতে খানি মানি ডিল পড়িলগা। বহু পাঠক-  
পাঠিকায় 'অপরূপা' ৪র্থ সংখ্যা শাতনি ডিলে বুলিয়া চিঠিপত্র  
দেছি। তানুরাঙ মোর নিবেদন, ডিলনীৰ কারণ এহান  
মিল্লেন্ডেথৈয়া ঙাক করে দিবাঙ।

৩০শে হাওন, ১৪১৩ সন।

প্রকাশক  
অপরূপা

(বিঃদ্রঃ ধনঞ্জয় রামকুমারর রাজা 'অয়দিপাস' এ সংখ্যাং  
প্রকাশ করানি নাইল।)

সম্পাদক, অপরূপা

## প্রশ্ন

নমিতা সিংহ  
গৌহাটী

প্রশ্ন আহান করিঙ তোরে  
কুরাংত মি আইলু বাগা  
আত দুহানলো কলকরিয়া  
কিহান অয়া মোর গজে তোৰ  
দিনেরাতি জ্বালাউরী তোরে  
মোর আচুলন পিচুলনে  
দিনে ঘুমজুরি রাতি জাঙরি  
কিতা অয়া বানা অমাটিক  
আহির মিচ্চিল অয়লে তোরতা  
মি নুয়ারা ঐলে তোরতা  
জীবয় জারে নুয়ারতারাতা  
গালানিতে বারাদে থয়া

সঠিক উত্তর দিচ  
কিহান মোর হদিচ ?  
বুকগং থউরী ঠিক  
বানা অমাটিক।  
লাংলা ততোধিক  
মুরগনার বেঠিক।  
উরে থাউরী চিক  
মোরে বাগেইচ ঠিক।  
ঠৈগ ফড়দে যারগা  
আহিং ঘুম নারগা।  
করিয়া মি চাউরী  
চুমালো বুজা দেউরী।

অর্থনৈই শব্দ কতগী  
রসর যারী উতালো দিতে,  
জিপা জিপা আহিথমে  
এলা বানেয়া থাউরী চেয়া  
বহুদিনর প্রশ্ন এহান  
বাবা হুনা পরানর ধন  
'হুনা আশা' বাঁধেছিল বাসা  
হদিগোং তারে পালিয়া পোষিয়া  
বসন্ত আহিল আকদিন এপেয়  
কোকিলার সুর, ময়ুরীর নাছা  
ঔ পরশে হুনা আশা  
ভ্রমর আগয় মৌ পিয়েছিল  
হদিগোং তারে বাঁধেছিলু  
দেহাগরমা লুকেয়া থছিলু  
ঔমোর আশা ভালবাসা  
দিন সুয়েলে উরকহানাং

জুবারা থতাদে নিকুলের  
থতাত রস পড়ের।  
কিহান পাকরিয়া  
নুঙেইপা যারী দিয়া।  
মনে থাছিল বয়া  
ডাছুরী কিসাদে অয়া ?  
মনে সংগোপনে  
থছিলু সযতনে।  
বাশীগর হেয়া  
ভ্রমরে এলা গেয়া।  
শাতছিল গঙালেয়া  
গুণ গুণ গুঞ্জরিয়া।  
বানালো আশার ভোরে  
দশমা দশদিন তারে।  
মোৰ 'পরানর ধন'  
আইলে হোনার ধন।



## কিম্ কুর্য্যাম

ফাল্গুনী সিংহ

বুদ্ধিমানর সময় কাটের  
মুখরতা সময় মাঙর  
বুড়াকালে দরকারীতে  
দা-লাঠি, বানুক-জাঠি  
জরা-মরণ নেই নিঙে  
মুরে মরণ আহিল নিঙে  
ধন-যৌৱন বিদ্যা বুদ্ধি  
চারিয়োহানি নৈয়েলেতে  
বিদ্যা-অর্থ শৌর্যে-বীৰ্য্যে  
মলমূত্র পারা সংসারে  
আহার-নিদ্রা, ভয় মৈথুন  
ধর্মই করের প্রবল নিঙে  
যদি দৈবয় প্রবল নিঙে  
হৈরুর আঠি না চিপলেতে  
কলো-পাতিলা ঘট-চাতি  
মাটীর পিণ্ড টিপে টাপে  
ইচ্ছা ঐলেই বাধা পূরণ  
উদ্যমী নাইলে নংশাউ  
মালক-বাপক পণ্ডিত ঐলেউ  
গৰ্ভত পণ্ডিত শৌগ

কাব্য শাস্ত্র পাঠে  
কৌলিয়ে লৈলাটে।  
বিদ্যা-অর্থ-শাস্ত্র  
বুড়ার নাগে শস্ত্র।  
বিদ্যা তালকরাণি  
ধর্ম আলোচনী।  
আকহান নৈলে হীন  
মরলে ককর হীন।  
প্রতিষ্ঠা না পেইলে  
কোন কানা নাইলে।  
পশুর মানুর আকতা  
মানু এতা খেইতা।  
কর্ম উদ্যোগী নার  
খৌ পানা নার।  
কুমারে গড়ার  
মনারতা বানার।  
কোন কালে নার  
উপবাসী থার।  
শৌর শিক্ষা লাগের  
মাটিং না পড়ের।

কাঞ্চন সংসর্গে কাচ  
সংসঙ্গে মূর্খ এতার  
ঘটে সুপ কিস্তাউ নেইলে  
বগা এগরে যতৌ কর  
গুণী জ্ঞানীজনে গুণ  
গুণহীনজনে গুণ  
শোক-দুঃখ-ভয় ব্যাধি  
হুচিয়ার করের মানু  
জিগৎ না পুড়লে হোনা  
তাপিত্তয় পীড়লে মানু  
দরিদ্রেরে ভরন-পোষণ,  
নুয়ারারতা হজক পথ্য  
দেশ-কাল-পাত্র ভেদে  
অনুপকারীরে দান  
জ্ঞানী বুড়ার কথা  
হদায় বিচার করলে  
স্বর্ণমৃগ লোভে সীতার  
লোভ সামালা পারলে অর  
স্বর্ণমৃগ নাউ অর  
বিপদকালে মোহাচ্ছন্ন  
বিপদে ধৈর্য্য সম্বল  
সভাৎ কথার লৌশিঙ  
সংকামে সচেষ্টি থানা  
নিদ্রা-তন্দ্রা, ভয় ক্রোধ  
মালক-বাপক-বন্ধুয়ে  
অন্যান্য মানুরতাতে  
জ্ঞাতিকুল নাহারপেয়া  
আত-জাঙ পালর কজা  
বিশ্রাম বারো বনির ফাম,  
অভাব আকতাউ নার  
শত্রুয়ো ঘরগৎ আইলে  
গাছবার ছেদেইলেউ দের  
চণ্ডালে গ্রাস করলেউচা  
না দিয়া আঁধারে নাথর  
বুদ্ধিহীন জনে গণের  
মতিমান মানুরাংতে  
মহীকুহ য়েপেই নেই  
বিদ্বান না থার উপেই  
দুর্জুনর ঠুম কথা  
অস্তুরেতে হলহল  
অসম্ভব সম্ভব অনা  
টেকাং না চলের নৌ

হীরার জ্যোতি দের  
বুদ্ধি দেহা দের।  
কর্ম সিদ্ধি নার।  
শুক পাহিয়া নার।  
গুণোপম অর  
দোষে দোষী অর।  
বিপদ আপদ  
মূর্খরে বিভ্রাট।  
খাটী নাউ অর  
খাটীহে অলর।  
ধনবানে নাগৈ  
বলীরতা নাগৈ।  
দান দেনি থকর  
সান্তিক সাকর।  
আপদ বিপদ কালে  
খানা নেই নিরালে।  
ভাগেছিল করম  
আপদ বিপদ কম।  
হারপেয়াউতে রাম  
বুদ্ধি অছিল মাম।  
ক্ষমা বলহীনে  
যুদ্ধে বলবানে।  
বিদ্যাং শক্তি ভক্তি  
আলস্য অনুক্তি।  
সদা করের হিত  
কার্য্যাকারণ ভিত।  
ঘরে থনা নেই  
মতিয়া কানা নেই।  
পানী ঠুম কথা  
ডাঙড়ঘরে উতা।  
মারুপ আচরণ  
ছেয়া অনুক্ষণ।  
চন্দ্রয়তেমিঙাল  
চণ্ডালে তঙাল।  
তোর মোর পর  
হাবিরয়ো নিজর।  
ভেরেণ্ডায় ধম ধমার  
আপাঙে ডাক বারার।  
জু'র আগাং মৌ  
সেপে পেইলে কৌ।  
উতা মাত্র যারী  
পানীয়েদে গাড়ী।

নুয়া ফামে যানা ঐলে  
যুগৎ যাগৎ ঐলে পিছে  
ঙা'ছ মাঙ্ লুছ মাঙ  
না চেয়া কাকেই দিলে  
যেদেশে মান-ইজ্জৎ নেই  
বিদ্যানেই বন্ধুনেই  
গাট নেই পানী নেই  
বাজার হাট পথ নেই  
আছে বস্তু এড়েদেনা  
আছেতাউ নাউ পেয়া  
খাল করিয়া করিছ কাম  
কথা-কাড় এড়ে দিলে

আগে গিয়া চানা  
পুরানা এড়ে দেনা।  
কথা পাহরীয়া  
থার লাঞ্ছনা পেয়া।  
নেই কৌন ধর্ম  
নেই কৌন কর্ম।  
নেই ডাক্তর বৈদ্য  
নাউ যেইছগা অদ্য।  
নেই বস্তুর সালে  
চাপর দিতেই গালে।  
করিয়া না খালকরিছ  
পিঠিৎ না দাবদিছ।।



## হুড়া কতহান

সরারেল সিংহ

১

খৌ বুজিয়া হৌ আনিয়া মানুর ঘরেৎত।  
খার বরেয়া খারতা খুড়াই মাদান পরেৎত।।

২

ঠাংবই চাবে চাবে আছে রাজাগিরি।  
কাদাৎ কাদের বয়া বুড়া মন্তিরি।।  
শটুয়াল কটুয়াল অছি জলে নালে।  
শৌগিয়ে করতারা ইমে চিরি বিরি।।

৩

কৌলির লগে আয়া তিলইলে গালিহান।  
খানাতে আহের নাই লুসিবাৎ ঠালিহান।।  
নাইলে দ্বিপাতা লয়া বহিতৌ চেয়ো মিতে।  
আহকণে আষাড়র খেচুরির পালিহান।।

৪

বুড়ি আগই কাঠিসুরি গিঠল লুরি আকনানল।  
আহিগিতে নাদেহিরি হনিরিতাউ আকনানল।।  
কইতে গিরক নাউ ছনেদর এতাপারা কথাহান।  
মি আপপানে যারি দৌরি ঠুকরিয়া থতাহান।।

৫

লেইমাই মালকরে মাতিরিতা কাদিয়া।  
চৌলি অছেতা বাত বেলি টিকে রাধিয়া।।  
নুন চামছেতা খয়ে য়েন নাম নাদিয়া।  
চামফুৎ নাহিজেছে শৌগই চাদিয়া।।



রাজার সালে মহারাণী রাধেছে বৌ নানিয়া।  
মেকুর আগই নুঙেই নায়া বেলল ঔতা ছানিয়া।।  
সেকপি আগই হাবিব হানি খা দিলাগা চরেদে।  
কি পরলেই হইমা আজি রাজা গিরির ঘরেদে।।

ডুমর ডাকগ বারা বারা মইচ রাহেরতা মনাই চা।  
পছরিগং তালে তালে নাছতরাতা পনাই চা।।  
হিয়াল শৌগি খেলতরাতা পাছরিয়া লেইসি হান।  
মালক উগই মিকুপ আহান আর বারাদে অনাই চা।।



## মিতল নায়

শ্রীহরী কুমার সিংহ

মিতলনায় ঘরর কোণে বুলিয়া দোয়াদে চেয়গা।  
হাবির হাদিত তোমার তাউ ফাম কালকরে নেয়গা।  
তুমি আজি ঠোনা থয়া  
আহ তিলয় ভবে আয়া  
নুয়া কঙালা মিঙাল হানান্ত আঁহি ধয়া নেয়গা।  
মিতল নায় ঘরর কোণে বুলিয়া দোয়াদে চেয়গা।।  
হাট সালৈ দেশ দেশান্তরে  
আল নায় আর আধার ঘরে  
কর্মরত জগৎ হানি বুলিয়া খানি চেয়গা।  
মিতল নায় ঘরর কোণে বুলিয়া দোয়াদে চেয়গা।  
রৈদ, বরণ বৌ মুরগত থয়া  
বজ্রর ভারহান বুকগত বয়া  
মানুহর হাদিত ঝাপিয়া পড়িয়া মনুষ্য নেয়গা।  
মিতল নায় ঘরর কোণে বুলিয়া দোয়াদে চেয়গা।।  
সিদ্ধু য়েপেইত ইথেই তুলের  
তরেই বৌয়র তালে নাছের  
বুর দিয়া তার অতল-তলে রত্ন তুলিয়া নেয়গা।  
মিতল নায় ঘরর কোণে দোয়াদে বুলিয়া চেয়গা।  
তোমার বুকগর রকত দিয়া  
তোমার জনম নেয়গা ধয়া  
তোমার নাপাল তোমার বীর্ঘ্য বিশ্ব জিঙিয়া যাকগা।  
মিতল নায় ঘরর কোণে দোয়াদে বুলিয়া চেয়গা।  
তল মিতলর লিচেং হাবি  
ছিড়ে বেলেই বীরর ডেকী  
তোমার কামে রতি থয়া মহান তুমি অইগা

মিতল নায় গরর কোণে বুলিয়া দোয়াদে চেয়গা।  
জ্ঞানর থংমেই মুক্ত কর  
বিশ্ব ভুবন মিঙাল কর  
বিজয় মালা গারগত দিয়া মুরগত মুকুট দেয়গা।  
মিতল নায় ঘরর কোমে বুলিয়া দোয়াদে চেয়গা।



(কবি বিহারী সিংহগীরকর 'গীত মঞ্জরী'র "দীন থেকো না ঘরের কোণে বারেক বাহির হও" কবিতা হানর অনুবাদ)

## দহন

কাঞ্চন বরণ সিংহ

য়াম পারা মাঙকরিয়া নখখানিহান  
পানা অর  
কবিগর ভাগ্যহানাত উহানিউ  
বুলিয়া নেই

এবাকা অসহায় কবির জনম কবির  
চিন্তাধারা

কবিব জিংতায়া থানি

ওরে কুমবাকাংত পথর  
দৌ উতাই

তার ছালা বুকগত ছি ঢালে দিতারা

ও ছি ঢালতে ঢালতে কবিগর  
বুকগই

জিগ অলসে, ও জিগত  
কবি পুড়ের

কবির অন্তরগ পুড়ের, কবির আত্মগা

কবির বিনম্র কবিতাউ



(শৌ শুমারা পাকরুয়েইক বরাক ভেলী একাডেমীত, চিংকুরি রোড, নিউভকতপুর শিলচর, কাছড়।)

## সেয়াগরে

সমরজিৎ সিংহ

ঙালসে আদারহান আদারর সাদে,  
সেয়াগ, থেয়া কিয়া আসৎ ? বেলোয়া  
যানা মনাসৎ মরে ? পাতা নেই ডেঙে  
যেসাদে নাথাইতারা পাহিয়াপলেই  
চাঙহান চেয়া তিযৌ বেলোয়া যিতেগা ?  
এবাকাউ কোয়াজার, ব্রহ্মহৃদয়র  
লেইকির পৌ আহের। বার্তন দিতারা  
লেরিক ফানি, পালি, কীর্তনর দিনে।  
তি নেইলে কিসাদে মি থাইতৌ, ইতাউ ?  
দেহগ লালয়া মিউ মনাউরি থানা  
কালপুরুষর গাঙে। ঙালসে আদারে।  
বয়া থাক মর লগে মিকুপআহান  
য়ারি দিক সেয়াপথ, সিংহরাশির  
মাত নেই বৌরসাদে, ইমপানি অয়া।



## আরৌপী কথা আকচুটি

গৌরবিধু শর্মা  
এইচ, এস, রোড  
দুগ্গভছড়া

বানা পানা কতি মনাউরি  
'বানাপানি' উহানরে  
বানাপেইতে যেহানে  
ইনদেউরি  
কঙালা হাদিগরে।  
মর জীবনর এরে আরৌপী কথা আকচুটি  
ঠুনিংশার লগে লগে  
চেপ আহের  
ইনর ঠুম আহিপানিফুটি।  
শাতনির আগে মর মনর এফুল  
জঙে জঙে মাঙয়া যারগা  
বসন্তহান হান্তে  
চিংখের এ-বৌ-এ  
গতবিলানির ওয়াশাকআহান  
তেবউ থায়া যারগা।



## ভাগিয়া পড়িল ঘরগ

দেবেন্দ্র সিংহ  
বোম্বে

কিসাদে থাইতউ মি  
বাকী দিন হানি  
আর কতি বাকী আছে  
বিয়ান ফুবানি।।

ফুলর কুড়ীগ ফুটানিয়ে  
তলে কেলয়া পড়িল  
আশায় বুঝা খাতাহান  
আহির পানীত বুড়িল।।

যৌবন হানাত পারাহান দিতেই  
ছেচরন থেয়া পরলু  
আশালো পথগ চেয়া থাইতে  
আহিজুর ছুটি দিলু।

রসনেই ফুলগৎ আর  
ভ্রমরা না বইতাই  
ভাগা এ কলগত আর  
পানি না বুজতাই।।

ধৌ নেই থংমেই হানাত  
মিঙাল নাইতই আর  
ছকানা গাছে পানি ডালাৎ  
নাযো গাছ জিংতা নার।।

সুমে খাছি খুটিগল  
শেংকা নাদিং আর  
মোরে থয়া পৃথিবীরে  
ভরি করানি নার।।

অস্তিম দিনহান আহের বুলিয়া  
তোরাং থয়া দেহগ  
চালর সনে দিন লেহেইতে  
ভাগিয়া পড়িল ঘরগ।।





# রামায়ণ আদিকাণ্ড মঙ্গলাচরণ

শ্রীমহেন্দ্র সিন্ধা  
দুধপাতিল

মেয়েক, অর্থ, অলঙ্কার বারো ছন্দর গিথানক  
জ্ঞান-বিজ্ঞান বারো বিদ্যা-বুদ্ধির মালক  
সরস্বতী ইমারে দেউরী হমা সাজারাজ অয়া  
চেয়া খয়া গণপতি গণেশর, হমাদেউরী অষ্টাঙ্গ।  
হমাদেউরী পাস্তান্না নেই পার্বতী শঙ্কররে  
নাইলে কৃপা যেতা মানুষে কোনদিন সংসারে  
পানুয়ার্তারা (যেগয়) পরমব্রহ্ম পরমাত্মারে,  
সংসার সাগর লালকরেকুরা আকখুলা খেয়ানীরে।  
জ্ঞানর সাগর, না মাতে কুরা, সীমা নেয়কুরা,  
শিব গুরুদেবরে দেউরী হমা কিস্তাউ নাজানেকুরা।  
ক্যাবুল্লে, পেয়া বরহান শিবর দুনিয়া এহানরমা,  
বেকা জুনাক অছে পূজ্য নেই তার পাস্তান্না।  
হমাদেউরী সীতারাম বারো মহাকবি বাণ্মিকীরে  
তার পিছে হমাদেউরী কপিশ্বর হনুমানরে।  
সংসার-হঙ্করেকুরী, পালেকুরী, মিটাকুরী  
জগতর মালক সীতা গিথানকরেও হমা দেউরী।  
আঙুলির ইশারাল যোগ দুনিয়া চালাকুরা  
লেইরাপার মারুপ, প্রজার মঙ্গল হামেশা করেকুরা  
অযোধ্যার গিরক রঘুকুলর জুনাক, বিপদ খেদেকুরা  
হমাদেউরী রামচন্দ্র গিরকরে হানাপাকুরা।  
আঠারো পুরাণ, চারিবেদ, ছৈহান শাস্ত্রর জ্ঞানী  
বাণ্মিকী, তুলসীদাস, কৃষ্ণিবাসর চরণহানি  
নিষ্করিয়া, দিগল অয়া হমা দেউরী  
কিস্তাউ হারনাপাছুগৈ আজি রাম কথা জ্ঞাউরী।  
পেইতারা সিদ্ধি নিষ্করিয়া যেগরে, ও হ্কার গটা  
এরাবতর থতাআলা, মনাকুরা লারৌর গটা  
বুদ্ধির সাগর, পাঙ্কালী, পার্বতীর পুতকে  
করেদেক কৃপা গজে, মোর গণেশ গিরকে।  
যেগৈ চাঙ্কলে মাত্‌নেই উগৌ অলর ময়নাগ  
বারো লেঙ্গারা উগৈ লালর দাপদিয়া টেঙারাগ  
ও কলিযুগর হাবিপাপ সাক্ষরেকুরা ঈশ্বরে  
রাম-কথা জ্ঞানিৎ কৃপা করেদেক মোরে।  
নীলুয়া থাম্পালর সাদে রঙহান যে গিরকর  
ছাতছে রাঙা থাম্পালর সাদে আহিগি যেগর  
ক্ষীর সাগরে থার গুমজিয়া যে গিরকগ

বহক ও হরি বুকগৎ মোর, হেইচা করৌরীগ।  
শ্মশানে বুলিয়া বিভূতি ঘষিয়া ডম্বর বাজাকুরা  
পার্বতীর গিরি, কামদেবরে ভষ্ম করেকুরা  
নীলুয়া খোনা, পরলেইর মহাদের গিরক  
কাম এহানাৎ, মি লেইরাপারে কৃপা করক।  
গুরুদেবে হমাদেউরী তার খয়াহান নিষ্করৌরী  
দয়া করেদেক মোরে বুলিয়া  
কোন পথ নাদেহৌরী তার কৃপা যদি নাপাউরী  
থ নুয়ারতো এ কাম লম্‌করিয়া।  
হমা দেউরী ও গুরুদেবরে ও অমৃতর ভাণ্ডারগরে  
যেতা ঠুমে অনুরাগে বুজেছে  
হেইচা করৌরী গিরকরে কৃপা করেদেক এ অধমরে  
তা ছাড়া কোন আগৌ নেয়ছে।  
গুরুদেবর জাঙর ধূলি নাপার যে গিরকগৈ  
লালনুয়ারের ভব-সংসার ও গিরক ওগৈ।  
হমাদেউরী গুরুদেবর জাঙে দীগল অয়া  
কৃপা করেদেক মোরে আপাংপাগ বুলিয়া।  
তার জাঙর মেইঙাল, আহৌ বেলি লাজ পার  
অস্তুরগ ইঙাল ঙালর, যেগৈ মেইঙাল পার।  
মোহমায়ার আধারহান ও মেইঙালে খেদের  
উগ জবর ভাগ্য আলাগ, যেগৈ মেইঙাল দেহের।  
ও মেইঙালে সেক্ষরিয়া দিল সেংপা আহি খুলেদের  
আধার দাপদে যারগা যেমন বেলিয়ে রাতি খেদের।  
রামচন্দ্র গিরকর চরিৎ যে ফামে থার  
অজ্ঞানতা দূরেই অর, অধর্ম সুপ নাথার।  
গুরুর জাঙর ধূলি, আহির কাজল, আহি মেলাদের  
রামকথায়ৌ আহি মেলেয়া অজ্ঞানতা খেদেদের।  
ও রামকথা মাতৌরী এবাকা হুনেদিক গিরিগিথানী  
লালৈলৌ ঙাকুরে দিবাং দোষক্রটিহানি।  
কবিগ নাগৈ মি, মিতে আপাংপাগ  
কিস্তাউ জস্তাউ নেই মিতে লেইরাপাগ।  
ভাষা, ছন্দ কীতা আঙাউ নাজানু  
ডাঙর কবির গুণ, কীহান্তে জানু।  
মোর রামকথা জ্ঞানির ঠৌরাৎ।  
কীসাদে পূরা ঐতৈ হার্গাপাছু  
চালে শন নেই, তীর্থৎ যানা মনাছু।  
কতি ভুল, কতি ক্রটি ঐতেও পারে  
ঙাকুরে দিবাং হাবিয়ে এ অধমরে।  
তেত্রিশকোটি দৌলিশিং, দৌলাশা, হমাদেউরী হাবিরে  
করে পারিৎ কাম এহান, কৃপা করেদেই মোরে।  
যে গিরক গৈ পয়লা রামায়ণ লেঙ্করেছে  
ও গিরকর মাটিক কবি দুনিয়াৎ কম আছে।

হমাদেউরী ঔ গিরকরে মেঙয়া, মেঙয়া য়ৌকরে,  
 দিয়াদেক বর মোরে, করিং এ কাম ধুন্ধরে।  
 তুলসী দাস, কুন্ডিবাস, হমাদেউরী তানুরেও  
 দিয়া পারকা জ্ঞানর মাংটা তানু মোরেও।  
 করৌরী বন্দনা চারিবেদ দিলতা দিয়া  
 রঘুনাথর ঠুম্পা যারী দিং বুলিয়া  
 হমা দেউরী ব্রহ্মা-বিষ্ণু-মহেশ্বররে নঙিয়া  
 মাংটা আগ পাঙ্কাল মোরে বুলিয়া দেকা  
 দৌ, গন্ধর্ব, কিন্নর, মুনিঋষি, পিত্তিরী-হাবিরে  
 হমাদেউরী খয়া চেয়া ঙাকরেদেই মোরে।  
 বামুন, পণ্ডিত, গ্রহ হাবিরেও হমাদেউরী  
 হাবিরে নিংশিং অয়া আহির পানিল জাঙ ধৌরী।  
 বারো মি হমাদেউরী গিথানাক সরসস্বতীরে,  
 লগে লগে হমাদেউরী মহাদেব বাবারে।  
 বর দেই হে দৌ হাবি, তোমার কৃপাবিন্দু পেয়া,  
 পরম কৃপাময় রামর জাঙর ধূলি লয়া,  
 মাতে পারিমতা গিরকর চরিং, কামধাম,  
 জপে জপে দিনেরাতি শ্রীরাম গিরকর নাঙ।  
 হাবির পিছে দেউরী হমা শঙ্কর ভগবানরে,  
 ত্রিভুবনে হাঁপেইল য়েগৈ পয়লা রাম চরিতরে।  
 পরলেই করেকুরা ভোলানাথে পয়লা হারপাছিল,  
 রামচন্দ্র জরম ঐতে এহানর ইশারা পাছিল।  
 ব্রহ্মা গিরকে গিয়া তারাং আঙ্করেছিলগ,  
 ধূর্জটীয়ে মাতিয়া ব্রহ্মায়ে হারপাছিলগ।  
 বিধিয়ে হারপানির আগে যে গিরকে হারপার,  
 ঔ গিরকর জাঙর তলে, মোর জান খার।  
 গারিগ, মনহান, ধনদৌলং হাবিতা কাতকরিয়া,  
 জাঙর ধূলি লেহৌরী গিরকর, সাজরাস্ত অয়া।  
 আশুতোষর জাঙর তলে মি হেইচা ধৌরী  
 কৃপা বিন্দু আগ মোর গজে বেলাক বুলৌরী।  
 নাইলে উহান এ কাম এহান কীসাদে করতৌ,  
 মি মূর্খ এগৈ রামায়ণ কিসাদে লেখতৌ।  
 - মঙ্গলাচরণ লমৈল-



দেহ - মন ধরিয়া থপারের উহানেই ধর্ম।

Ak-47

শশীকান্ত সিন্ধা (সাতারা)

(মোর সালেদে য়েগোর জীবনহান গিয়া হদাছিলগা ঔ বানার  
 রাজীবরে তার ব্যক্তিগত প্রিয় বিষয়লো দ্বি-আকছুটি - )

ভালবাসা! না, না, হীন না করি। শান্তিময় জীবন যৌয়য়া  
 চারিগদে য়েবাকা হাপদেছে উপেই বারো ঝামেলার অনুভব করানি  
 নাহের। মি আপাঙ গোথাঙ ? নাঙহান ধরতে না ধরতেই কতি  
 হীনকরেরতা মনহানে! হুকাঙ শৌগোর ডেকি এতাদে হৌতাদে।  
 হুদা হারৌপার পৃথিবীহান পারাপাছে। বৈচালর ঝটকায় কয় খলপি  
 খলক অইতই হুস নেই!! খিয়াল নেই!!

হি দে, এমটিক বুঝাউরিথাঙঔ বুঝানি নাকরতাতে। ডাক্তার  
 নেই নুরারাহান না। না আছরেই - মনোবিজ্ঞানী! সমাজর আঘাত,  
 ধোমা ..... কপালর দুঃখ। আহির পানী য়মকরিল জটা সৃষ্টি নাছে!

সফলতা। কদাচিৎ দেহেছি পাউবী। এ যুগেতে ঔ  
 হেইরাপ ঔহানৌ কল্পনার বাহিরে! প্রেমতে ফুতির ডেকি বদলা-  
 বদলি। স্থায়িত্ব নেই কোনেপেইঔ। হা! আকহান আঙেইলো  
 জনমহান কাটেইতেই থাঙ? অসম্ভব য়ারিহান, অনিয়ে নারের!

ফুতির লগে তুলনা নাকরতু ? প্রমাণ করানি - অস্তিত্ব।  
 তোর আকখুলাগোর অছেতাকো! য়েপেইস্ত গৌরববোধ  
 করানিচার, উপেই আগে সহযোগিতা আছে নেইচা!!

অহংকার না করি! মালসায়া হীনপেয়া না যিগা! যিতেইগা  
 হীন উহানান্ত পেইতেইগা বজ্রাঘাতরহীন উহানতে ফিরানির  
 উপযুক্ততা হারেইতেই!! তিক জানারতা! হবাছে, হবাছে, গিয়া  
 হে দেকা, এমটিক বুঝেইতৌ নাকরর মাহিতে। উপেই নাই  
 উপেইতেইগাতা - আজিকালি কার ভালবাসা, প্রেম .... এতারেতে  
 নামকরণ করানি থক Ak-47!!



There is no success like success

উম আহির পানি

ব্রজেন্দ্রকুমার সিংহ

পুতক সুভাষ বার নাতি নাতল দ্বিয়গি রিকসাং কাইলাগা।  
 রিকসাহানি এরা দেনার আগে পুতক সুভাষে মাতল - আর মি  
 ভিটা এগং নাপারাদিতৌ এজনমে। মোর শৌ জিপুতৌ না।  
 আজিৎত পুরি তি মোর মালকগো নাগই, মিয়ো তোর কিকগৌ



নাগই। ঔহান হারপেয়া থইছ।

রিকসাহান এরা দেনারকা মাতল। তানু দুৱেই অয়া গেলগা। মালক ঔগদে কুপকরে চেয়া থাইলি। রিকসাহানি নাদেখলতাই আয়া ফামহানাং হমেইলিগা। সেন্দাহান অইল আরো জেঠি বহক ঔগই ধুপথংবেই দিয়া, হৌরিয়করকা চাহা ফুটিল আইলি। হৌরিয়করে উঠেইতে হৌরিয়ক না খুমকরিয়া থাইলি।

খুলা পুতক সুভাষ গৌহাটিং থায়া চাকুরি করের। এবাকা ঘর আগহংকরের ঔগরকা বিহানিয়ে ভিটাগই বেছিয়া রূপা নিতগা। মালকে আংকরল আমিতে কুরাং থাইতাঙাই ?

- তিতে অরতে আমার লগে আয়া গৌহাটিং থাইতেই নাই।

- জেঠা এগতে ? তার শৌ জিপুং মোয়েইতে।

- ঔতাতে মি কিতা বুলতু। তি মোৰ মালকগ - তোরে নিয়া থইতৌগা। মোর কর্তব্যহান লমইল। তানুতে মোর কিতা থাং ! তানুর পথ তানু বিসারতাই। বাবাই মরতে সম্পত্তিহান হাবি তোর নাঙে ইকরে দিয়া গেছেগা। আজি পুতকর ঠেকার সময়ং ঔহানি দে বুলতে নাদলেতে কিজাত মালকগ।

- মি ঔহান নুয়ারতৌ। তি যেতাউ মতিয়াউ থাক। সুরেন্দ্র তোরতা কিকগৌ নাগই বুলিয়া খালকরর। মোরাংতে জরম পুতকগরাংতৌ জিঙে।। তি আকখুলাগরে চেইলেতে নাইতই নাই। তানুরে মি উৎখারি করে নুয়ারতৌ। তারে এরা দিয়া জানাউ নুয়ারতৌ। মি মৰতে সুরেন্দ্রই জলসিটা নাদলে, তা কিরাহান না ধরলে মি উদ্ধার নাইতৌ। ঔতার গজে তিতে বিদ্যা তালকরেছংগ, ডাঙর চাকুরি আহান করর, গৌহাটিং ভিটা লছং, শৌ জিপুংলৈরিক তামকরতারা। তাতে বকলমগ। আল ধরিয়া খেইতইগ। বি এতা বেছে দিলে তার উপায়হান ? সুরেন্দ্র গুরুর সাঙগ সেং করিয়া আছিল ঔগই মাংল - ঠেকেছে আরো মাভের নাই। দিয়া দিলেতে কিতা অর থাং।

- অইলগা না টটরেই জনতে কুরাগ মালয়া। মোর সম্পত্তি য়ারিং আকগৌ না হমেয়ো। নাইলে হাবিহানি বেছে দিয়া রাখাকুণ্ড গিয়া থাইতৌগা। বর সম্পত্তি বাটেকুরাগ অছং। কুমপেইতে থাইতেই।

- আট ডবলে জিতাঙাইগা নাই।

সুভাষে মাতল - মূল ঔগরতাতে চিন্তা নেই। তি জরম মালকগ অয়া পুতকরে দেনা নাকররি। আনৌগ পুতকরকা কাদতে কাদতে মরে যাউরিগা।

- নিয়াম আনৌগ আনৌগ না করিছ এ, পাপ বইতেই। তি লৈরিকতামকরতে তোর বকচা বয়া গারিং কাকরে দিলগা, তি আইলে কিতাল খেইতেই নাহেইতেই বুলিয়া মাছ বিসারেয়া আনে দিলগা, - ঔতা কিয়া পাছররতা।

- অইলগা, অইলগা। আচানক আহান করে বেলাছে। এবাকাউ সময় আছে হাই বুল। হাই বুললেতে দ্বি-আকদিন থায়া

বিহানি বেছিয়া রূপাল যিংগা। নাইলেতে আজি সালইং। শৌ এতাউ গাঙে আয়া নিয়াম হিনপেইলা।

- না বুললু নাই। যেহান মনার উহান কর।

- ঔতা জরম, পুতকরাঙত আনৌগই জিঙিলতা।

- কুংগ জরম কুংগ আনৌগ ঔতাল ইমে থাক। মি বি বেছে নুয়ারতৌ। বুড়া কালে পথে পথে বুলতুগা।

- তি টাউনে মোর লগে থাইতেই নাই।

- ঔহান নার বুললু নাই। জেঠা পুতকগরে ভিটাগংত খেদিয়া মি টাউনে গিয়া নুঙেই অয়া থানা নুয়ারতৌ। হাইহান, পেটগ ফাটিয়া নাজরমদেছ। ঔতা বুলিয়াতে পুতকগ নাইল থাং। মাতহান ফুটানির আগেংত মোরে মালকগ বুলিয়া হারপাছেগা আজি তি ছিড়ানি মনেইলৌ বাধ ঔহান নাছিড়তই। ঔসাদে ভেদভিন্ন করিয়া না টটরেইছ। তা মোরে এরা দিয়া থা নুয়ারতই, মিয়ো তারে এরা দিয়া থা নুয়ারতৌ। বি বেছে নুয়ারতৌ। টাউনেউ নাযেইতৌগা। মি মোর হেয়কর ভিটাগং মরানি মনাউরি। এহানেই মোর লয়ইলগা কথাহান।

এবাকা নিখিং অইরিতা উররশৌগ, মালক নেইগ। তেইরে বিয়া করিয়া অনিয়া শৌগ তেইর উরহানাং থদিয়া মাতেছিল এগ তোর জেঠা পুতকগ। এগরে উরহানাংত নাবেলেইছ। আজি সুভাষর কথাল এগরে পথে খেদে দিয়া নুয়ারতই। খুলা ঔগ লাগিয়া বাত নাহেয়া বেলাদিয়া গেলগা। গিয়াউ থাকগা। তাতে জনমতো এসাদেগ। তারহান শিচ্চিল হারপার। বাপকে বাজারর এই আনলে আকগরৌ নাদিয়া তা খেইত। ডাঙর অইলতাউ স্বভাবহান নাগেছেগা। তার লগে গিয়া টাউনে বিদেশে যানা ক্ষমতাউ নেই। আকখুরম মইলক চাপক অইলি আরো মালকরে নিয়া থছি লগা। মালক যানা নাকরল ঔগরে মাতল হাট, গৌহাটিং হবা হবা ডাঙর আহি ঔতারাং গাটিগৌ আকখুরম চোয়েইবাং গাতা। মালক যানা নাকরল ঔগরে জবরদস্তি করিয়া নিলগা। ঔপেই গিয়া আছিলগা দিন ঔহানি বংতে বংতে বাত নাহেয়া কাটাগ অইলিগা। শৌ বুজন আকগর তাউ গৌড়িয়া নেই। ঘরগং তুলসী আকজার নেই। য়েগৌ যেবাকাউ চাকামে হমেইতারাগা চাপকুলিগরে সকয়া হাবিতা পাকখন করতারা। চাকামহানাং ডিম রাখিয়া খেইতারা। ডিমর হৌ খেইতারা ঔতার লগে টেবিলে বয়া বাত থানা। খেইতারা ঔতাই আকপেইংত লয়া লয়া খেইতারা। এহানতে কি পরলেইহান। সুভাষর মারুপ মাসাং আইলা। ধমকেয়া চাকামে গিয়া বয়া থানারকা মাতল। কুনরকমে কাদিয়া রহিয়া কৌলি লাগিয়া গাঙর কুংগ আগ থাং আহিল ঔগর লগে বেলা দিয়া আইলি। বাৰ ঔগর লগে গিয়া থানা ! আকদিন, দ্বিদিন নাগই, জনমহান। খালকরতৌ ডর উঠেরগা। মোর গাঙে বালা। মোৰ অশিক্ষিত মুখ আনৌগ পুতক এগই বালা - তোর ঔপেই জেলে থাইমগা সারুকতে।

যাকগা! আর মোরে ইমা বুলিয়া নাউ ডাহিয়াউ থাক।

মোর হেয়ক মরতে মোরাং গছেয়া গেছেয়া পুতকগরে মি ভিটাগৎত খেদে নুয়ারতো। সুভাষর কথা নাছনিয়া মি অন্যাযহান কিংতাউ নাকরেছু।

সেন্দাহান লালয়া গেলগা। রাতিহান বাক্কা ডিলৈল পাউরিএ ঘরগৎ নাতিয়ক সুশীলতে সেন্দাৎত ঘুমজেরগ। লেরিক চানাং বইবতাই ঘুম আহের তারতা। উঠেয়া বাত খওয়ানি লাগের। বাত খানাৎত নিককা দরবার। এতা নাহেইতো, হৌতা নাহেইতো। আজিতে তারে উঠেইতে না ছনেছে। বাকী উতাউ নাহেয়া ঘুমজিলাগা পাউরী। উরর শৌ ঔগ কাদল আরো - জেঠা ঔগই মাতল - 'হা ঠেমকরেনে শৌগ।' ঔহানাং হারপেইল এতা না ঘুমজিয়া আছি। তেইরতা উঠিয়া আংকরানি নাহিল। ঘুমতে নাউ আহের, ইমে ফামহানাং পড়িয়া আছেতা। সুভাষর কথা খাল করিরি মাহেই কাছিহানে কিহান আহান করের তেইরতা। আকখরুম খালকরল উঠিয়া আংকরিংগা। উঠানি নায়া আহিগি জিপেয়া পড়িয়া থাইলি।

কতহান থায়া বহক ঔগই নাতিয়করে উঠানি অকরল - পরান, পরান, উঠ বাতখেয়া। উঠ - এ ! বাত নাহেইতেই থাং। জারর পরর রাতিহান বাত নাহেইলে হিনপেইতেই, উঠ বাবা উঠ।

উঠিয়া সুশীল বাতে বহিলগা পাউরি। মালকরে আংকরল কিতা রাধেছৎতা ? এতা কিতা ?

- মাতবেনাই কিতা ?

- খেইলেহে হারপেইতে নাই।

- নাহেইতো। আগে মাত কিতা।

- খনতুমে মাছে। হাংকা রাধেছি। এবাকাতে ঙারল হৌকরিয়া কতি ছ্যাং অ থাইবতা।

- সুপ নাহেইতো। হাবি হিচিয়া বেলা দিতৌ চেইছ। দেখতে হিচে দিতু। ডাইল রাধিছ বুলতে নাকরুরিতা। হিনচাপি, দেখতে বাত হাবি হিচিয়া বেলা দিতু।

এগতে মাততই ঔহান করেরগ। ববাক উঠিয়া আইলি। আয়া বহকরে জুং করে গালেইল - নাহার ঔতাতে কিয়া, রাধেছৎ। মানুগই ছ্যাং নাপার ঔতা চেয়া নিককা রাধুরিতা কিয়াকা। ডাইলতে তোর বাপকর ঘরেৎত আনিয়া রাধাতেইগ থাং। যাগা এববাকার গাই দুকানেৎত মোর নাতিয়করকা ডাইল আনিয়া রাধেদে।

- এবাকাতে দুকানৌ হাবি বন্ধ অইল। দুকানদার ঔগ ঘরে গিয়া ঘুমজে থাইবগা।

- বিয়ানহান ফুয়েইবতাই কালি দুকানেৎত মসরি আনতেইগাতাহে। বুজেয়া হবা করে মাতলে যেতালৌ ভক ভক খার মানুগ। কালি বিয়ানহান ফুয়েইবতাই মি গিয়া ডাইল আনিয়া রাধে দিতৌ।

- মোরে ঠকারাইতা! আকগৌ আয়া হাদিৎ না হমেয়ো। ডাইল আনানি না লাগ তই। কালি বিয়ান ফুয়ানির আগে মরগা

যাগা।

ববাকে মাতল - অ মোরে মরগা বুলরতা। হাইদে, এরে এববাকা দৌয়র লেইসাংগৎ যাউরিগা। গিয়া ভগবানরাং মাতুরিগা মোরে মোর নাতিয়কে মরগা বুলের থাংতে মি আর থায়া কিতা করতু - তি মোরে আজিরগাই রাতি এহানর বিতরে নিয়া দেগা। মোর নাতিয়কহে হারৌ অয়া থাক। এরে যাউরিগা। ববাক দুয়ারহান আংকরিয়া যানারকা করলতাই নাতিয়কে চিকারি দিয়া মাতল, - তোরেতে হতুমেউ মরগা বুললু থাং। কাছির পেইরাকে ফাগি আহান করলুতা। গিয়া ববাকরে আতহান ধরিয়া আচুলিয়া আনলগা। - ভগবান আগ পাছে ! যেদিনৌ মি সৌঅইমতাই - ঔগরাং যানারকা নাকরিছ। - দৌয়র লেইসাংগৎ নায়েইগা, গিয়ারে মরগহান মাগলেতে মিয়ৌ এববাকা গিয়া মাততৌগা।

- ঔহান অইলেতে আর চিকারি নাদতৌ বুল, রাধেছি এতাল খেইতৌ বুল।

- খেইতৌ। তিতে মরগহান মাগতেইতা মাত।

- তোমারে বেলেয়া মরিয়াও শান্তিহান নাপেইতৌ। হ মোর তামফাগ, মনিগ, দে বাবা থকক খাবেলা। কতিয়ো জানেতা।

- কালি ডাইল আনতেইগাতা ?

- হে সেইতা ! তিন সেইতা ! আনতৌগা।

- ঔহান অইলেতে খওয়াদে।

সুরেন্দ্র ফামহানাং হজক আককারি পিয়া পিয়া বয়া আছে। 'অহ! আঙারাল হজক পিনা কতিয়ো হিনতা। বার নিবে পইলগা। কইতে দেইতা আরাক আঙারা কতগ। ইমারে মাতুরিতা, নাগইহান করলে। পুতকগই আয়া ঘর হংকরিং বুলিয়া বিহানি মাগতে দেনা নাকরলে। মন ঔহান কতি হিনপা থাইবতা।

- অইলগা, মুক্তিয়ারি নাকুরি। মোর বি মি কিহান করতো ঔহান মি জানু। তুমি মোরে মাতে দেনা নালাগতই। বাত নারাধরাইতাতে, নাহেইতারাই থাং।

আকগেয়ো না খুমকরলা। বার আংকরলআরো সুরেন্দ্রই মাতল - তি মালকগ, ঘরগর বুজনগ অয়া বাত নাহেয়া থানা জার এহানাং, বার আমি এগদে পেট বুজে বাতখানা; এহানতে কুন দেশর বিচারহান থাং।

- শৌগর মালকে বাত নাহেয়া থাইলেতে, উরর শৌগরতাতে নাইতইগা নাই। ইমেউ নারগাগই। মালক নাহেয়া থাইলেতে শৌগ হিন নাপেইতই ?

- ইমাই খেইলে আমি হাবিয়ৌ খেইতাঙাই।

- সিজা বাতে হমাগা, নিয়াম কিংতাউ নাকরিছ। খানাতে নাউ আহের, ইমে তুমি নাহেয়া থাইতারাই আরো।

কতহান থায়া পুতকে মাতলে - মাতের বুললে বিহানি বেছিয়া রূপা দিয়া দিলেতে কিতা অছিল থাঙ ! তাউ ঠেকিয়াহে মাতেরতানাই।

- দেনে কথা আকহানল না পিড়ি। বাত নাহেয়া ঘুমজিয়া



থাইতৌগা এরে।

বহকে মাতল - বাত খানার আগে আরাক কৌলি আহান  
নাদিয়ে।

শৌর মালকগ, তিহে খেইবে।

- আকটুমা দ্বিটুমা না, খা কিংতাউ নেই। মোরতাউ থচু।

- কিতা থছং ঔহানতে হারপাউরি নাই। কই খেরি আগদে,  
মাছ খানি খেইকরিং।

- নাউ খেইকরি খা।

- কথা আকহান বারে বারে না মাতিং।

বহকে খেরি আগ আনে দিল ঔগং মাছহানি হাবি থছিয়া  
দিয়া মাতল - 'বার চেইছ, থইবে। শৌর মালকগ, হবিহানি খেইছ।  
বাতৌ দেছং নিয়ামহান, কইতে' বুলিয়া জেঠা পুতক ঔগর  
কুপাঙহানাং আধাআধি বাত দিয়া দিল।

- হানতে ইমে ঔগি খেইতেইতা !

- খানাউ নাহেরগ। তুমি নাহেয়া থাইতারাই বুলতেগা  
এগিয়ে খাউরিতা।

- ইনে, তপ্তা পানি। চেয়া পিছ। ইং পানি ফুটি ডালে  
দিতু।

আত ধনাং যিতেগা দেহিরি কৃষ্ণ পক্ষর রাঙিরা জোনাকহান  
নিকুলে আহের।

- জারহানৌ হবা অয়া পড়েছেতা না। কাকালিহানাং  
ধরেছে। ইজ্জু অনা হিনপেইরি। বয়সৌ অইলনাই।

ফামে হমেইলিগা। ঘুমহান পারা অয়া গেছেগা ঔবাকা  
খাংতা কাকালিহানাং তপ্তা আহান লাগিয়া ঘুমহান বাগিল। বহকে  
চেক আগ তপ্তা করিয়া কাকালিহানাং সেক দেনাং লাগেছে,  
ফুতিল বেয়েয়া।

এহান হাবিতে দরা অয়া আছিলি ঔগই আহির পানি  
বেলেয়া কাদানি অকরল। খামকরতে না খামর।



## নামরিল হজক বিছারেয়া

ড॰ স্মৃতি কুমার সিংহ

এক

বেলী হমানির পরহান। জিরানিয়া গাঙর তিনজুরা পথগ।  
গুরুর পারা আহানর গজে বাগা দাতসুরি নিকালেয়া আহিয়া নঙেছে  
সাত বছরর বাবাসৌ। কাদাং কাকালিং আত দিয়া নাতিয়করে  
ডানডি করিরা শংখলেইমা - 'হবা করে দাতসুরি নিকালেয়া আহিয়া  
থাক। মনে মনে মাত, ববেইঅববেই, মোরে তোর হবা দাত ঔগি  
চালাক করে দে।'

নাতিয়করে মাতে মাতে তেইও দিনহানাদে চেয়া একীন  
অয়া হমা দিল। পথগং, তানুর চারিবেদে, উবা অছি বাবাসৌর  
লগর ঔতা ফঙেদে আহানি নুঝারিয়া চরে চরেদে খুক খুক করিয়া  
আহিতারা। ববাকরে আকফির বারো লগর শৌতারে আকফির  
চেয়া বাবাসৌও লাজপা লাজপি করিয়া আহিল। তা লাজপারতা  
তার গারিগং ফুতি নেই ঔহানরকা নাগই। ববাকর কথা ইলয়া  
চালাক করে তার বাগেছে দাত ঔগি উঠক বুলিয়া হাবির মুঙে,  
তিনজুরা পথগং, গুরুর পারা আহানর গজে আহের এহানরকা।

'অবায়, হবা করে দাতগি নিকালেয়া আহিংতে নাবুলিয়া  
অটগি চিপেয়াহে আহের। দাত বাণুরা। দাতগি নিকালেয়া মাত,  
ববেইঅ ববেই...'

শংখলেইমা। জিরানিয়া গাঙর হাবিংত আর্য় বুড়ীগ। বয়স  
চারিকুড়ি বছর সকছেগাগ। এবাকাও লাঠিগ নাধরিয়া ঠিকদিয়া  
আট্টী। আন্দির গাঠি বরণহান। থং গারিগ। হাকতাক আহানাং  
পিদেছিলী বরি কানর ফুলগিয়ে লামলাম করেছে কানহানি।  
কানহানিং এবাকা দলাতেরা ফুলগি। তেইর নিরালে, গালে, আহির  
দ্বিয়পটে লেহানেই খাচ। মেইখং ঔহান যেমন জীরনর মানচিত্র  
আগ। খাচহান লেহে নানান অভিজ্ঞতা, জ্ঞান।

মাহি-মন্ত, দৌদুকর হাবি জ্ঞানল পালছেগ শংখলেইমা।  
লামর দৌ হমা দেনা, আপাবপা ডাহানি, উছিল সিলকরানি,  
পাহাংপার লিচেংর চাপাল, চাপকউলীর বুনি আজারার চাপাল,  
এতা হাবির নিয়মনীতি হারপাছে আকখুলী গুণরতী বুড়ীগ। গাং  
এহানর আকগইও তেইরাংত জ্ঞান এতা না সিলকরলা। ইমে  
জিলক তারালেইমাই সিচ্ছিল খানিমানি সিলকরানি অকরলতা।  
এতা ঠাচা করেকুরা মানু গাঙ এহানাং কমইলা। ঠিচালাই করিয়া  
তেইরে আহেকুরাই বপইলা। তেইর জরম পুতক কার্তিকসেনাও  
আজিকালি এতা নাকরানি অকরল। ইমে বহক এগ আনানির  
পিছেদেংত তেইর তাম্রাগ পারা পুতক এগ তঙাল অইলতা।  
আজি তেই দেখিলী জরি ঔগ সদাই পিদিয়া থাইলইছ বহক ঔগও  
চুম পথগং আহিলইছ। তেইরতাও কি দোষ। ইমে মদনচান মাষ্টর  
ঔগই তানুর মুরগি খাদিলতা। গাং এহানর মানু এতার মুরও।  
ঔতাও, শংখলেইমাই আগেকার বুজন গিরিগিখানিরাংত পাছে  
জ্ঞান এতা, নিয়ম নীতি এতা চেৎকরে ধরিয়া থছে। তেইরতাও  
আরতে কইদিন। যানির দিন আহিল ববেইরে একিন অয়া হমাদিয়া  
তেই আতর তারাহানিল চুলগ মাঠিয়েইল। তেইর চুল সেটুকাপা।  
কাপকগ পারা। যেমন, সংসারর মায়া, মোহ, ভোগ, বিলাস হাবির  
রং পুছিয়া, ঔকখি অয়া, জরমর দিনহান বাছেয়া আছে ফিরালহান।

তানজা ঔগং মদনচান সাইকেলহানাং চড়িয়া ঔপেইং  
ফৌঅইলহা। সাইকেলহানাংত লামিল। তাব উরনে খাদির  
পানজাবি আহান, পিন্দনে জিন প্যান্ট আহান। পানজাবিহানর  
আতহানি কুছকরেছে। পুলেইকু মেইখংহান বুজে বেপরুবা পাতল

দাড়ি। মদনচান বাবাসৌ বারো তার জেঠী বনক ইমাসৌরে ঘরে বাগাদের অজাগ। বিজ্ঞান বারো অংক। বিএসসি পাশ করিয়াও চাকুরি নাপাছে হাঙে ইমে গাঙর ঘরে ঘরে শৌ বাগা দিয়া চলের। কিয়া, হবা অয়াও চলের। আমার রাজ্য সরকারর চাকুরি নিকুলতই নিকুলতই বুলিয়া বাছেয়া থাইতে চাকুরির বয়সহানও লিতইল। গেলগামারি বিয়াও করল। মুঙর গাঙর শেফালিকারে।

গুরুর পারা আহানর গজে নঙেছে বাবশৌরে চেয়া মদনচানে বেকাদে মুকসি আহান দিল।

‘আবক কিতা করুরিতাথাং ?’

অজাগরে দেহানিয়ে বাবাসৌ উঠিল। তা লাজপেয়া ববাকর পিঠিহানাং খাংচেৎহান ধরিয়া লুকেইলগা। মুঙর বাগা দাতগি গজর অটগল গুরল। বাকী শৌতাতে ঔপেইৎত দাবদিলা।

‘নাহে, এরে বাবাসৌর দাত এগ এবুজ নাউঠিল হাঙে ববেইরে ডাহে ডাহে মাগুরিতানা।’

‘বাছা আবক, ববেই গিরক ঔগরতা কইগ দাত আছেগ ? বত্রিশগ ? না আরাকও নিয়াম ?’

‘কিয়া ?’

‘গাং এহানর শৌ এতারকা এনাদে তার হবা দাতগি মাগে মাগে বুলুরি দৌ ঔগরতে চানাপা টুনডাগ করে দিলেনাই।’

‘তোর ঔতা অকরলেতা, বারো।’

‘ঔতাও গুরু নায়া গুরুজনর পারাহানাদে চেয়া মাগলে হবা অছিলছাং। হাংকা বাবাসৌরতা গুরুর দাত উঠিয়া সেইকুপ করানি অকরলেতে।’

বাবাসৌ আর ঔপেইং নাথাইল। লাজহানে ঘরেদে দাবদিলা।

‘অইলগা এর গিরক। পাথারি উরে থাইতে খংকাকলেই লাগিয়া মরগ ফাঙছিলগনা। মিহে এরে তিনজুরা পথ এগং চাপাল আহান বারো চেং মাছ আগরাং উছিল সিলকরে দেখিলু আরহে আজি মানুগ অয়া আটরতানাই। বিজ্ঞানর মেয়েক আগ তামকরে বেলেয়া চানাপা ..।’

শংখলেইমাই মদনচানরে গুজুরে গুজুরে ঘরেদে আলইলী। কানহনর ধলাতেরা ফুলগির দোলনহানে বাগেইল - তেই নিয়াম নুঙেই নাছে। মদনচানে তেইরে চেয়া আহে আহে বারো সাইকেলহানাং কইল।

দুই

সেক্কাং শংখলেইমাই দৌ হমাদিয়া জিলক তারালেইমার তুলো য়ারিপরি দিয়া মাংকলে বহেছে। বহক গৌরীয়ে তানুরে চাহা দিল। চাহাছিটাং আকচুম দিয়া শংখলেইমাই বহকরে বাখান করল,

‘না তারালেইমা, তোর বইজি রাধানিতে জানেতানা। আমার ঘরর চাহাই আলাদা। ঔহানলহে বারার ঘরে চাহা ফুটি

বুললে - হু হুঁক।’ তেই মেইখংহান বারাদে বুলেয়া থতাহান কুছকরল। গৌরীয়ে তারালেইমারে চেয়া মুকসি আহান দিয়া কিংতাও নামাতিয়া ঘরে ভিতরে হমেইলীগা। হারপাছেনাই হৌরিয়কর দস্তরহান। চাহাছিটা নালমছে পেয়া বাখান। লমইবতাই, তেইর হৌ য়ারি ঔতাং পরবগাতাই, গালেইতেউ শাং নাইতইগ। বুড়ী এগর নিত্যিকার মারাক নেই গালিনা। গারিং নালাগেইলে লমইল। মিছলগ যিবগাতাই বারো পানিসানি।

চাহাছিটা লমকরিয়া শংখলেইমাই সেংসেঙর খেরি ঔগ বারাদে থইল। তারালেইমাই কানচনপুরী নারিকলর আরিশৌ আগং হজক আককারি লাগেয়া মালকরে দিল।

তারালেইমা, শংখলেইমার আকখুলী জিলকগ। গাঙে বিয়া দেখিগ। সুরাখহান পেইলেই মালকর কাদাং চেপয়া মাহি-মস্ত্র, নিয়মনীতির জ্ঞান এতা হিকিরিগাগ। মালকর বিদ্যাহান লেমেদে কিয়া মাঙইত ? তেই ছাড়া মালকর জ্ঞান এতা আর থকুরা আছিতা ? বেয়ক জেঠা ঔগতে চানাপা তেইর বইজকর খৌগ অইল। দৌ দুক এতা তাও নাকরানি আংকরল। তেই মালকরে আংকরল,

‘ইমা, মণিগ ঔগ সাকতি হপন আহান দেহিয়া খাং লাগে লাগে উঠেরতা। তার বুড়াবাই বাহাছপার তলে আহিগি পাকদিয়া তারে চেয়া বাছেয়া থার উনি।’

হজকারি আকচুম দিয়া শংখলেইমাই মাংল, ‘ঔনা পিতৃপক্ষহান বিংতা অইল আর বপাকে দেহারতা। আপাবপা লামে আলনি অকরলানাই।’

আরিগ আতহানল পুছিয়া শংখলেইমাই বিধানহান দিল, ‘পিতৃপক্ষং দৌরাং সিদ্দা আহান দিছ। বুজন ঔগই মনেইল আচা আদাক ঔতা পারিলতা বরা দিছ। কিংতাও নেই। রাতি শৌগ ঘুমজিতইগা ঔপেইং ‘মনিগ, তি মোর গৰ্ভং থাক, মোর গৰ্ভং থাক, মোর গৰ্ভং থাক’ বুলিয়া তিনখুরুম সলকরিয়া তার গারিগ হাবি মাঠিয়া দিছ। বারো ঘরগ স্ত্রতে তুপয়া পড়ের হরনির আগা ঔতা আগ হিয়রগদে থদিছ। লমইল।’

‘শংখলেইমা, অ শংখলেইমা।’ কাদার ঘরেৎত তেইরে বুড়ী আগই ডাকল। আধারগং ডাহেকুরীগরে নাদেখলেও, নারগং চিনিয়া তেই খুমকরল, ‘হ, বইজী।’

‘খুল্লাকপা লকেইর মরার ঘরে আহের কালি আপাবপা ডাহানিরকা তোরে বার্তন দেছি ঔনি। খানি ঙালয়া যানারকা মোরাং মাংল।’

‘যিতৌগা বইজি।’ তেইরে হবাকরে খুমকরিয়া এগদে বারো তারালেইমারে মাংল,

‘বাই, মোর নৌরলআহান খুলীগই, নিংকৌহানাং জেঠইলী বুলিয়া বুড়া সায়া ডাহিরী নমুনাহানতে - ‘তারালেইমারে চেয়া বারো মাংল, ‘কাদার ঘরর কামারা দাদাই বুড়াকালে আনে বেলল আরো বইজি বুলুরিতা। নাইলে - তোর দাদা বারে ধরিয়া উবা অনি অকরল ঔপেইং কইনাগ অয়া আহিলীগ। হারপাছং ? কামারা

দাদার তিন নম্বর গিধানকগনা।’

‘ইমা আগেদেতে গিদানী মামীয়ে নাং ধরিয়া ডাকলে নাও সৌঅছিলে। আরো হারৌহে অছিলে। এবাকাতে কিয়া সৌঅউরিতা?’

‘না সৌঅয়াতে। নাংহান না ধরিয়া, কার্তিকসেনার মালক, নাইলে তারালেইমার মালক বুলিয়াও ডাক এনে।’

‘হাইদে তোর ওতা থ। হান্তে ইমা আপাবপা ডাকতে কিতা বার লাগেরতা?’

মালকে জিলকরাং আপাবপা ডাহানির বিধানহান সিলকরল-শরাত্তর আগেকর রাতি খৌর বর্তি হাতগ, এইরা তাংখা হাতহান তুলসীপুঙে দিয়া .....

এফির জিলকে ইমে তেই পাছে হপন ঔহানর য়ারিৎ পড়তইগাগ বুলতে বুলতে তারালেইমাই আংকরল, ‘ইমা তোর হপনর বার ঔহানতে কুনদিন বাগেইতেইগ?’

শংখলেইমা ইম্পানি অয়া হজক পিয়া থাইলী।

‘মি ছাড়া তোর জ্ঞান এতা সিলকরেকুরা আকগও নেই। না তোর বহকে সিলকরতই থাং? মোরে বাগেইতেউ হিনপাউরীতাতে।’

‘হেয়া, তোরেহে হপনর বার ঔহান দিতুনাই। আর কারেতে দিতু। আপ্পানেও সময় আইলে-’ বারো তেই হজকারিৎ মেইখু দিল। জিলকে অমাটিক লগ ধরেছেথাঙৌ হপনর বার ঔহান তেইরে নাবাগেইরী। শংখলেইমাই হপনর বার আহান পাছে। ঠাংচাই ঠাচিয়ে তিলর দিন আহান ঔ বার ঔহান টেঙারাংত নিংশা আহানাং উহুলিয়া .....। ঔহানলহে লয়া লয়াং তেইর নাংহান ফরদেছেনাই।

‘অ গিধানক, মি ঔসাদে দিনখেল নাচেয়া যিতৌগাগ নাগই। যানির সময়হান আহিলে আপ্পানেও গারিগই জানেইতই। তুমারে হাবিরে ডাকদিতো। ঔবাকা তোর কানে কানে বারহান বাগেইতো। এগ ইমে সিমি গারিগ নাগই। বাবাই মস্ত্রল শেংকরে দেছে গারিগ, হারপেইছ। মরগহান চেং করে গাঠি দিয়া থনার মাহিহান হিকছে জেলাগ।’

ভাতর বারার আঙুলিগল বিঙর বারার আঙুলিগ চেংকরে গাঠি দিয়া ধরিয়া আহিথম পাকদিয়া তেই জিলকরে চেইল।

তারালেইমাই মালকর পিঙলা আহিথমমেদে চেয়া ডরপেইল। তেইর ইমা এগ হুংতুমেও ডরপেইলগ। মরগহান পেয়া গাঠি দিয়া থনি পারিরীগ।

‘ইমা, মোর গারিগও শেংকরে দে বেনাই।’ তারালেইমাই হেইচা করল।

তানজা ঔগৎ মদনচান শৌগিরে বাগা দেনাং আহিল। উঠানে সাইকেলহান উবা করিয়া, মাংকলে কায়া শংখলেইমা বারো তারালেইমারে দেহিয়া মাংল, ‘অ। তারালেইমা। হপনর বারহান পেইলেগ?’

‘আহিল ঔরে।’ শংখলেইমাই তারবেদে নাচেয়া হজকারিদে মেইখু দিল। তারালেইমাই মাংল, ‘মদনচান, তি ইমারেল কিয়া পানা অরগথাং। তোর জেরতাকর সানিপাতিকহান ডাকতরে আলকরানি পারেছিলাগ? তোর বিজ্ঞান ঔহানে পারেছিলগ? ইমার হপনর বারর জরিগইহে আলকরেছিলনাই। পাহুরতা?’

‘অ, হবা অছে। বারহান পেইলে বাগেইছকো। মিও জরি আগ নিমগাতা।’ আহে আহে তা ঘরে ভিতরে হমেইলগা।

‘ইমা, এগই লেরিক বাগা দিউরি বুলিয়া শৌগিরে লমকরে দিল। দাদার মুরগও বুলাদিল।’

‘এগই নাগই। ঔরে তোর বইজক ঔগই মূল মুর খৌরিগ। মাকুর মাংপা ঔতা খৌরেয়া তোর বেয়করে বুলেয়া থেছেতা। নাইলে মোর পূতক পারাতা আছিতা। ডাঙর অইলতা পেয়া ঠাংচাই ঠাচিয়ে তিলর রাতি মি থেছেইহানল না উবা দিলে দুবাং নানিকুলিলগ। নিতি রাতি মি হিকাদেছু মস্ত্রহানল গারিগ বাধদিয়া ঘুমজিলগাগ। যেগদে সালইতেও—’

‘ইমা, মি ডিলইতো। কইতে মণিগ—’

মণিগ টিভিগর মুঙেৎত এল নুবারিয়া মালকর কাদাং উবা অইলতা। ববাকো তারকা থছিলী মজা পঙিতল ঔগ তার আতে দিয়া চুমা দিল। তানু ঘরে যানারকা উঠানে লামলা।

‘বাছেই, বাছেই। তিরি সেনধাহান। হবা নাছে। দৌআলা ডঙরগর কাদার আলটহান লালয়া যিতেগা পারগর তিরাজারির গিরক ঔগই, মাতে পারিলহান অছেতা। শৌগই সাকতি হপন দেহেরতাই’

শংখলেইমাই হইরৌর আঠি কতগ, তিরার আঠি কতগ বারো হরনির আগা আগ সলকরিয়া তেইর আঙালুরির তেনা আকেইহানল তারালেইমার বারো মণিগর পাম্পলগিং বাদে দিল। ঘরে যিতেগা হবানেই দৌরে না ধরবাতা বুলিয়া। তারালেইমা বারো মণিগ আর ডরভয় নেয়া ঘরেদে গেলাপা। শংখলেইমাই বারো হজকারিৎ মনহান দিল।

মদনচানে বাবশৌ বারো ইমশৌরে লেরিক বাগা দিয়া তানুর কুঠাগং বহেছে। পইলাই তা বাবশৌরে পানিবৃৎত বাগা দেনা অকরল -

গাট, খং, বিল, আদির পানি এতা বাম্প অয়া দিনহানাং কারগা। কিয়া কারগাতা? তপ্তা অইলে বৌহান যাঙর। যাং বৌহান গজে কার। গজে ইঙইলে বাম্প ঔতা ধুলির কণা য়মকরিয়া অর পানির কণা। পানির কণা পুলয়া অর মেঘালা। মেঘালাত পড়ের বরণ .....

‘অজা বরণর আগে দিন গুজুরের ঔহানতে?’ বাবশৌরে আংকরল।

‘ঔহানতে কণা ঔতা ঘষা খেয়া চার্জ অরতা। উন্টা চার্জ উতা কাদাকাদি আইলে বিদ্যুৎ....।’



বাবাশৌ উপনি হিনপেয়া আহিথম কুচকরল। কুচ আহিথমল বনকরেও আকফির চেয়া বারো অজগর বেদে চেইল।

বাবাশৌর পিছেদে ইমাসৌরে বাগাদেনা অকরল মদনচান। আজি তেইরে চন্দ্র গ্রহণ কিয়া অরতা ওহান বাগা দিল। পৃথিবী এহানর ছেয়াগ জুনাহানাং পড়িয়া কিসাদে চন্দ্র গ্রহণ অর এহান মদনচানে চেহানাং আকিয়া তেইরে বুঝাদিল। তেইও বুঝল। বনকরে অজগই বাগাদিল চন্দ্র গ্রহণর পাঠহান হুনিয়াও, আকেছি চেহান চেয়াও, বাবাশৌরে উপনি নুঝারল। কিয়া জুনাহা গরন ধররতা হারপানি মনেইলেও তা এরিল। তার পাঠহান নাগইতা থকয়া আর হুনিয়াও নামনেইল। তার লেরিকহানাং আছে ছবিহানাং, মেঘালাংত পড়ের বরনর পানি পাহিয়া যারগা গাটহানাং, তা মাছ, আগই কেরবং আগই আকানিং মেইখ্যু দিল।

‘অজা ওতাইলে, জুনাহানাং হামেছা কালা কালা করে দেহিয়ার ওতাতে কিতা ?’ ইমাসৌরে আংকরল।

‘ওতারে জুনাহা কলংক বুলতার। জুনাহানাটৌ আছে টেঙারা বারো গাং। ও গাং বারো টেঙারার ছেয়া কিতা ওতা কালা করিয়া দেহিয়ারতা।’

ইমাসৌরে মনহানাং খানি ককপেইল। তেইর মুরগ নঙিল। জুনাহা হানর সাদানে সাদান মালয়া আহিরী, জুনাহানর সাদানে ডাক ডাক করিয়া আহিরী, বুলিয়া তেইরে যোগইও পানতামনা দিতারা ও জুনাহানাং কলংক ! এমাটিক কঙালা, নৌ নৌ করের, বানাপেইল জুনাহানও গাং গাং ! তেই হজম করানি খানি হিনপেইল।

শৌগিরে বাগাদিয়া লমকরিয়া ছুটি দিয়া মদনচান টিবিগং খবর হুনিরিকা কার্তিকসেনা বারো গৌরীর লগে বহিলগা। শৌগি ববাকর কাদাং গেলাগা। যারি হুনিয়াং।

‘বুড়ীমা, আজিতে অজাই বরন কিসাদে অর ওহান বাগা দিলগতে। বুড়ীমা, বরনর আগে কিয়া দিন গুজুরেরতা ?’

‘বুড়ীমা, বরনর যারি আহান দেনে।’

নাতি নাতলরে পেইলে শংখলেইমা নিয়াম হারৌ অইরী। আগেতে যারি হুনিরিকা ইমে তেইর লগে দিনে রাতিয়ে চেপঅ চেপঅ থাইলাতা। আজিকালিতে লেরিকচানা বারো টিবি চানা ওতালই নিয়াম থাইতারা। ওতাও, সুরাখহান পেইলেই ইমে ববাকর উরহানাং। মন্তম কারকা তেইর কাদাং চেপইতারা ওহানও বালা। তেই যারিহান অকরল।

এসাদে এসাদেতে, হাকতাক আহানাংতে, দিন এহান মাটিহানর চানাপ্লা কাদাং আছিলগনা। দিনহানরে আমার আপাবপাই দৌরাজা বুললা। দিনহানর তলে গাং আহান আছিলতা। গাং ওহানর শৌরে দিনহানর তেরা এতার হাদিং লুকা লুকি খেললগ। লিকলিকা জুনাহানাং বয়া যারি হুনাগ। বুড়াবুড়ী ওতা জারর পরে বেলিহান বেড়ি দিয়া আত হেদে হেদে দৌরাজার লগে যারিপরি দিয়া বহিলাগ। আকদিনতে গাং ওহানর জেলা আগ ঘরর

গিরক ওগর তুলো কৌলি লাগিয়া সৌঅছেতা। সৌঅয়া উঠানে রুকর গাহালি আগং ডিগল সুক আগল ধান দুহিরীতা। গাহালিগং ধান বরেয়া সুকগ গজেদে তুলিয়া দিল পার ওতা, উঠানহান পেয়া নিকুরিয়া খাংকরল। হৌগদে বুলতে, পারহান লেহে সুক ওগ ডক্, ডক্ করে দিনহানাং থেঙইলগা। দিন ওহান দুহানিহানে কেকোয়া খানি গজেদে কাইলগা। জেলা ওগই সৌঅনিহানে দিনহানর লাংলা এহান নাদেখল। তার কেকানিহানও নাহুল। আরাকও সৌঅয়া জবর জবর করে পার দেনা অকরল। দিনহানে আকতাও নামতিয়া পারহান লেহে খানি খানি করে গজে কাইতে সৌঅইল। তা সৌঅনিহানে বেলার নিংশার ধূমা ওতা গটা গটা অয়া বলানি অকরল। সৌঅনিহানে আকয়া দিনহান গুজুরানি অকরল, তার আহিগি জিলকানি অকরল। গুজুরগহান লেহে মাটি এহান চিলা চিলা অইব মাটিক নিকুরানি অকরল। গাঙর মানু ওতা পরলেই আহান অইল এ বুলিয়া হাবি দিনহানর তলে পুলইলাহা। জেলা ওগরে জুংকরে গালেইলা। হাবিহানে দিনহানরে হমাদিয়া ডিগলগ অয়া পড়িয়া মাগলা। হে দৌরাজা গিরক নাসৌঅইনে। খানি তাপথা অ দেনে। আমার গিথানক আগই হরনাপেয়া লালকাম আহান করে বেলাছে। তেইরে ক্ষমা করেদে। তাপথা অদে। বারো আই, তলে লামিয়া আই। আর নাকরতাঙাই। হে দৌরাজা গিরক।

দিনহান খানি চামইল। দৌ জিলকানিহান কমইল। তা তলেদে চেয়া মাংল, হে মোর গাঙর মানু। মি হুদা গজেদে কানাহে জানুতা। তলেদে লামানি মি নাজানুরে। মি আর তলে লামানি নুঝারতৌ। তুমার কাদাং আর আহানি নুঝারতৌ, তুমার তুলো বয়া যারি দেনা নুঝারতৌ।

দিনহানর কথাহান হুনিয়া গাঙর বুজন, কনাক, হাবিয়ে লৌ মেলে মেলে কাদানি অকরলা। দিনহানর তেরার হাদিং লুকালুকি খেললা, জুনাহানাং বয়া যারি হুনালা তার হাবিংত বানার গাঙর শৌতা আত টিংদে টিংদে লৌ মেলে মেলে কাদতারা ওহান দেহিয়া দিনহানও আর জারে নুঝারিয়া আহির পানি বেলা বেলা জুরি জুরি কাদানি অকরল। তার আহিরপানিয়ে গাংহানর লপুক পাহানি অকরল। গটা বলেছিল তার শৌঅনির নিংশার ধূমা ওতা পাতল অনি অকরল। এবাকাও, আর তলে লামানি নুঝারিয়া সৌঅইলে দিনহান গুজুরের, দৌ জিলকার, তার নিংশার ধূমা গটা বলের, তা বানাপার শৌতারে নিংশিং অয়া জুরি জুরি কাদের। দৌরাজার নিংশার ধূমা ওতাই মেঘালা, আহিরপানি ওতাই বরগ।

বিষ্ণু বিষ্ণু।

শংখলেইমাই যারিহান লমকরিয়া নাতি-নাতলরে চেইল। ইমাসৌ বাবাশৌ একেবারে মন্তমুখ। আহিথম চিকমিক। নুঙেইহানে বাবাশৌর মনহান কেতুকেইল পারা। গজর অটগল গুরিয়া থর বাগা দাতগি চানাপ্লা নিকুলেছেথাঙও খিয়াল নেই। তা ববাকর

উরহানাং চিংগ অয়া ঙায়া দিনহানাদে চেইল। তেরার হাদিয়েদে তাও লুকানুকি খেলানি অকরল। ইমার্শৌও ববাকর জাংহানাং ঙায়া দিনহানাদে চেইল। ডাকডাক করেছে জুনাহানাদে চেইতে চেইতে তেই ববাকরে আংকরল,

‘বুড়ীমা জুনাহানাং কাল কাল করে দেহিয়ার ঔতা কিতাথাং?’

‘ঔতাতে নিয়াম শেং, আরুপি বস্ত্রহান এনা।’

ইমার্শৌ নিয়াম হারৌ অইলী, ‘কিতা ? কিতাথাং?’

‘ঔতাতে নামরিল হজকর গাছ এনা।’

‘নামরিল হজকর গাছ ? ঔতাতে কিসাদে ঔপেইং উঠিলতা? জুনাকেতে অঞ্জিজনও নেই, পানিও নেইগতে।’

‘ঔহান আরাক ডিগল য়ারি আহাননা। হাইদে, আরাক আকদিন দিতৌ।’

‘না না আজি দেনে বুড়ীমা, দেনে। আজি অজাইতে ঔতা জুনাকর কলংক বুললগতে।’

‘অবাই, গমনেই। বিষ্ণু, বিষ্ণু।’

‘অজাৰ বিজ্ঞানর য়ারি ঔতাংত বুড়ীমার য়ারি এতাই নিয়াম নুঙেই।’ বাবার্শৌয়ে মাংল।

শংখলেইমা হারৌ অইলী। শৌগিয়ে য়ারিহান দেনারকা বারো গেটেইলা। জুনাহানাদে কুপকরে চেইতে চেইতে আতজোড় করিয়া হমা আহান দিয়া মুরগ মাঠিয়েয়া তেই নামরিল হজকর য়ারিহান অকরল।

এসাদে এসাদেতে, অলকগ লকেইর ঘর আগই নামরিল হজকর গাছর আঠি ঔতা কিসাদে করেথাং পা বেলাজিতা। বরিষার পইলা বরন পড়লে রুবেইবাংতা বুলিয়া কুলা আহানাং, উঠানর আগাং, রইদহানাং সরাদেছিতা। ঔ ঘরর বাঘগ পারা কাল কুকুর ঔগই আহিরি পট নাবেলোয়া ঔতা রাহিয়া বয়া আছে। সুপ কাদাংত নাসেচের। ভয়ংকর কুকুর ঔগরে দৌরে পেয়া ডরপেইতারাগ।

সরালেলে দিনহানাং তা আটের পথগদে যিভেগা গজেংত আঠি ঔতা দেহিয়া চিনে বেলল। অবাই পরলেই আহান অইলহে। তা বাকি দৌতারে ডাহিয়া মাংল - চেই চেই। অলকগ লকেইর উঠানে নামরিল হজকর আঠি। চেই। টেইপাং মানুর ঘরে নামরিল হজকর গাছ উঠলেতে আর উপায় থাইলতা ? ঔতার পাতা আহান খেইলেই টেইপাং মানুও দৌর সাদানে অমর অইতই, চির যৌবনল থাইতাই। বিপর্যয় আহান অইতাই। না না, কুনোমতে টেইপাং মানুরে নামরিল হজক পানা নার।

‘আবক, মরার ঘরেংত নাকিতা?’

‘হাই।’

মদনচান সাইকেলহান ঠেলা ঠেলাআটিয়া লগ ধরল।

‘তি, সাইকেলহানল য়ারগা মানুগ যাগানে। কিয়া লগ ধরলেতা? মি নাও ডরাউরিয়ে। এগ বাবাই মস্ত্রল শেংকরে দেছে গারিগ। দৌ দুকে কাবু করানি পারবাগ নাগই।’

‘নাগই আবক, কথা আহান আংকরিং করে’

‘কি কথাহান।’

‘কালি বাবার্শৌয়ে ইমার্শৌয়ে মাংলতা, জুনাহানাং নামরিল হজকর গাছ আছে ঔনি। ঔতার পাতা আহান খেইলেই মানু অমর অয়া থাইতার ঔনি। হাইহান ?’

‘হাইহান নায়াতে। তিতে কুরাং ঠাচা করতেইতা। যাগা।’

‘আবক না সৌঅই। হুনেছংগ ? জুনাকে নুবা লাম আহান পরতারাগা। ঔপেইং মানু নেই হান্তে রকেটল ফামফামেংত মানু জুনাকে নিতারাগা।’

জুনাকে রকেটল মানু যিতারাগা পৌহানতে শংখলেইমাই হুনেছংগ। মদনচানে নাহানতে নামাতের। তেই কিংতাও নামতিয়া ইমে হুনিয়া থাইলী।

‘ক্ষেতিবারিতে অকরেছি। কিন্তু রোরাউলিতে নেই। লগুন আমেরিকাং তে এবাকা রোরাউলিতে আছিথাং ? ঔহানেহে আমার ভারতর গাঙে গাঙেংত রোরাউলি বিছরা বিছরা রকেটল জুনাকে নিয়া যিতারাগানাই।’

মদনচানরে ঠাচা করত নাকরত করে শংখলেইমাই তারে চেইল।

‘আবকতে হাকতাক আহানাং গাং এহানর হাবিং হবা রোরাউলিগ আছিলে বুলিয়া আবকর বহকে, মানে শেফালিকাই মাংলতা।’

‘শেফালিকাতে মুড়র গাঙ্গরগনাই। আহিলো দেহেছনাই। ঔহানে মাতেছেতা। লক্ষীগুলি।’

‘হান্তে এবাকাতে কুরাং রোরানি পারতেইতা? পারলেইছতা-’

‘কিগ, মোরে নাচিনেছং। এবাকাও লপুকগং মোর তুলো ফাংনা দিয়া রোরাং লামিয়া চাকাতা। আক হাটনে বি কিয়ার আহান না লমকরলে মি বাপকর জিলক নাগই। হারপেইলে ?’

‘আবক গেলেগাতে আমারতা লাভ আহান অরতা। নামরিল হজকতে আরতাই চিনানি পারতাইথাং। আবকেতে পারতেই।’

‘কিয়া নুবারতৌতা ? দৌআলা গাছ এনা। হাবিংত তঙালতা।’

‘পারিয়া দ্বি তিনপাতা আকতা আনানি পারলেতে আবকও বারো পুরিজেলাগ অয়া অমর অয়া থাইলে বারো মিও বারো শেফালিকাও চিরযৌবনল।’

‘তিতে এতা কিতা ঠাচা নাকররগই আজিতে কিয়া ? না মোরেল রস কররতা ?’

‘আবক, বুড়া অনি বারো মরানি কুংগই মনেইতারাগ। ঠাচা করিং নাকরিং খেয়া হুংতুমেও ফল পেইলে কিহান ক্ষতি। বনািজিতে য়াকরুরি, এরে মাহিমস্ত্রহে নাকরুরিতানাই।’

শংখলেইমা জুম মারলী। তেইর পিঙালা আহিথমে রং

সাংকরা আরাক হপন আহান হঙনির গইগ লাগিল। তেইর মেইখংহান ঙালইল। হুংতুমও জুনাকে গিয়া নামরিল হজক আনানি পরলেগাতে- মদনচানে রেংকরে তেইরে চেয়া হারপেইল। রসহান লাগিল। তা লুকেয়া মুকসি আহান দিল। মেইখংহানাং ডাঙর চিন্তা আহান যালকরিয়া তা তেইরে মাংল,

‘হাস্তে আবক বেরা আহানতে আছে।’

‘কিতা ? শংখলেইমা উঙইলী।’

‘সিবেই ঔতা রকেটগৎত জুনাকহানাং লামতে বারো রকেটগৎ কাইতে আস্তা গারিগ তন্ন তন্ন করে হংকরতারা ঔনি। তানুর আহিং ধূল দিয়া জুনাকর কুনো বার আহান আনানি অসম্ভব।

‘অবায়। সেরকরে তিন চারি পাতা যাহানার তলে লুকেয়া আনতৌখাং তানু হারপানির মুরাং নেই। যানাহে যিংগানে।’

শংখলেইমা জুনাকে যানিহান লেপইলীহান দেহিয়া মদনচানে মাংল, ‘হাইদে আবক, মি রকেট আলা ঔতার তুলো টটরেয়া চেইং। কিন্তু পিছেদে বারো আমারে পাছরবে।’

‘অবায় ঔহানতে কিসাদে।’

‘বারো আরাক কথা আহান। গাঙর আরাক জীব পক আগই না হুনকা। মিয়ে বারো আবকে। বিজ্ঞানর মাষ্টরগই আজিকালি নামরিল হজক বিছারার বুললে মিও লাজপাউরিনাই।’

‘চুমছেচুমছে। হে সেইতা সেইতা, মোর থতাহান পচক।’

শংখলেইমা জুনাকে যানা লেপইলী। না, তেইরতা যানাই লাগের। জুনাকেংত নামরিল হজক আনিয়া তেইরতা প্রমাণ করানি লাগের, আগেকার বুজন গিরিগিথানীয়ে মাতে গেচ্ছিা যারি এতা মিছাতা নাগই। বুজনের কথা মাটিং নাপড়ের। বিজ্ঞান আলা এতারে তেই আকখুরুমতে জন্ম করতই। নামরিল হজক খেয়া মরণহান জয় করিয়া বারো পুরীজেলাগ অয়া তেই তানুরে কুমেইহান দেহেইতই। ডেইনাগাছি বাছেই। এখুরুমহে হারপেইতই। মদনচানে এগদে বারা কতিরা অইলরে মাহিতে হুদা জিরানিয়াতে কিয়া, আস্তা লয়াগ হাবি আকসাটে আত করানি যাকরতইগ। নিত্যিকার সাদানে আজিও মাংকলে বয়া শংখলেইমাই জুনাক হানাদে চেয়া চেয়া খালকরল।

আজিকার জুনাক এহান খানি তঙাল অছে পারা। আর আর দিনেংত ঙালহান ঠৈঅছে পারা। গাছ ঔতাও টাংখেই শেঙছে পারা। জুনাকহান কাদা অয়া আহেরছাং।

তেই জুনাকে ফৌঅয়াই, সুরাখহান পেইলেই, ইমে ঔপেইতেই নামরিল হজকর পাতা কতহান খাহে বেলতই। মাতে পারিলহান অছেতা। লুকেয়া আনতে সিবেয়ে ধরে বেললেতে আর তেইও নাপেইতই। কিতাপারা কতপাতা আনে পারলে তেই কারে কারে দিতইগ ?

মদনচান বারো শেফালিকারেতে দেনাই লাগতই। কার্তিকসেনা বারো তারালেইমারেও দিতই। ইমার্শৌ - বাবার্শৌ - মনিগরেও। বহক গৌরীরেতে মরলও না। হুনাগ পারা পুতক

এগরে তেইরাংত কারলইলগ। গাঙর মানুতে পিছেকার কথা, নিজর বহকগই মাহি মন্তু, দৌদুক এতা নাকরিরী। তেইর হপনর বাবর জরিগ পেয়া কামহানসাও নাকরিরী। গৃহশত্রু বিভীষণ। সাদহান হবা বুলিয়া নাপালহানে মাটিহান নাদেছরীতা। ডেইনী, নামরিল হজক খেয়া বারো পুরীজেলাগ অইলেহে দেখতেনাই মিও কিসাদে হবাগিদেইগ।

ইনে মোরতা লালইল। মোরেও দেনে - বুলিয়া জুনাকেংত আহানির পিছে বহকে তেইর জাঙে পড়িয়া মাগলে হুংতুমও নাদিয়া পারতইগ ? নিজর আকখুলী বহকগনাই। তেইহে ঠিকপেয়া খুচাপীং তিনপরল ফিরে দিয়া আনেছেগা।

যৌবনর সম্ভোগ, ধনর বিলাস লমকরিয়া, হিংসা নিন্দা হাবি ত্যাগ করিয়া, বানপ্রস্থর মাংকলে শেঙয়া বাছেয়া বহেছেগ শংখলেইমা। নামরিল হজক খেয়া অমর অনার বারো পুরীজেলাগ অনার হপন আহান গর্ভধারণ করানির লগে লগে তেইর দেহ মন তঙাল অইল।

আকদিনা বিয়ানে পখরিগৎ হিনেয়া লেহাওজারর গুরিগৎ উবা অইলীগা। ধলাতেরার পটা লেহাও দুগ কানহানং দিল। তুলসীপুঙে দৌ হমাদিতে তেই বের অইলী। নামসাগ পিদিয়া তলসীপানি পিনাহান পাহুরিয়া শংখলেইমা চিন্তা আহানাং বিভোর অইলী - মদনচান এগই হুংতুমও তেইরে জুনাকে যানার ঠৌরাং করতইগ। এগরে ঠাচা করিল মানুগতে নাগই। লমইতেগা নিজর কইনাগরেনেই আকখুলীগরে চরেদে দিয়াপেঠার। শেফালিকাইতে দৌআলা গাছ ঔতা চিনানি পারতইখাং ? শেফালিকাই তেইরে বেলেয়া আকখুলীচই নাযিতইগা। তেইতে লেরিক লেইশৌনিয়াম তামকরিরীগ, আমার রীতিনীতি এতাও যাকরিরীগ। তেইরে নিয়াম নিংকরিরীগ। য়েপেইং দেখলেও জাঙর ধূলি লয়া একীন অয়া হমা দিরীগ। ঔহান কিতা বুলতাং, বেয়াপার মন এনা।

দিন এহান নানান চিন্তা, সন্দি এতাল দরফর করিয়া সেজ্ঞাং মদনচান তানুর ভিটাগৎ হমানির আগে গান্টাহানাং শংখলেইমাই তারে থেংকরলগা।

“মদনচান বাছাতা। কুনো পৌ কিতা ?”

মদনচানে সাইকেলহানাংত লামিয়া মাংল, “আবকর নাঙে দরখাস্ত আহান রকেটআলা ঔতারে দিলু, চেইক কিহান অর।”

“মোরতা গিয়া কিতা করতগা। লেইপিরিকর গাছও চিনানি নপবারিরীগই নামরিল হজকর গাছ চিনানি পারতইখাং ?”

“তেই নাচিনলেও মিতে লগে আছুনাই। তেইরেও কমরগ না নিংকরিছ। খাবাল মুকতিয়ারর জিলকনা। তোর সাদানে তেইও কলেজগ লমকরেছেগ।”

‘রোবদৌরাও হবাকরে নাজানেগতে।’

‘ঔতারকাতে মি আছুনাই। বালা আহান পড়তে হুদা রোবা জানলে অরখাং। তেইর নুংশি নার ঔগল এলাহান লয়া রোবা অকরবাংখাং - জুনাক লামহান থরক্ থরক্ নিকরবতাতে থয়া।’



‘হাইদে আবকে মাতুরী মাহিতে আহের কালি তেইর দরখাস্ত  
আহানও দিতোগানাই।’

এসাদে করে মদনচান বারো শংখলেইমার ফিস ফিস  
য়ারি চলতে থাইল। আহির রম করিয়া বেলা বুলল জন ঔগ  
এবাকা তেইর আহির মণিগ অইল। তা সেন্ধাং আহনিহান ডিলইলে  
তেই ঘর মাংকল করিয়া থাইরী। আকদিন মদনচানে বাগেইলগা  
- তানুর দরখাস্তহানি মনজুর আছে। ঔদিনেত জুনাকে যানারকা  
হাতে হাতে তেই ফুতিফালি জুং করনি অকরল। যোগদে গেলেগাও  
মরণর ফুতি সৈনায়ী নিলগা ঔগই এফিরতে ঔতা জুনাকে যানার  
মচাহানাং সুপ নাবরেইল। পিদিয়া যিতইগা দলা ফিরে ঔহান  
ছড়া অর দলা ফিরে নালইল। নাপুর আঙলুরি আহান, তেনুরাভুর  
মইরাংফি আহান, খেলমাটির আঙেই আহান লইল। কইনাকালর  
খুচাপীর তলফুতি বারো ইনাফিহানও আদ্যেকার জাপিগৎত  
নিকালেয়া চেইল। তেইর যৌবনহান ঠিপ ঠিপ অয়া আছে পারা।  
তেই ঠিপ বাগিয়া মাঠিয়েয়া বারো ঠিপকরিয়া মচাহানাং বরেইল।  
বারো পুরীজেলাগ অয়া, এ ফিরে এহান পিদিয়া, আঠুর তলে  
পড়ের চুলকাতা এরদিয়া, কানহানিং লেহাওগি পিদিয়া  
জুনাকহানাং তেই লামিয়া আহিতই ঔপেইং বহক গৌরীয়ে  
চিনানি পারতইগ ? কুরাং পারতইতা। তেইর থতাদে মাটি  
হমেইতাইগ। পুতক কার্তিকসেনাইতে পারতই। তাতে তেইর  
এরে রূপ এহানর খানিমানি কনাকে দেহেছেগনাই।

আকদিন লেরিক চানা লমকরিয়া ইমশৌ বাবশৌ আর  
আর দিনর সাদানে ববাকর কাদাং যারি হানিং আহিলা।

‘বুড়ীমা, আজি নুরা যারি আহান দেনে।’

শংখলইমাই নাতি নাতলে মাংলে দিতৌ বুলিয়া তেই  
রচিয়া ধছে যারি ঔহান অকরল -

এসাদে এসাদেতে অলকগ লকেইর নিঙল আগ তেইর  
উপযুক্ত বর আগ বাছতে বাছতে নাপেয়া বিয়া নায়া বুড়া  
অইলীতা। খচখচ মেইখংহান, শিংলেইশেং আত জাং। নিঙল  
ঔগর বাপক ঔগই খালকরিয়া পথ নাপেয়া সরালেলরে হমাদিয়া  
ডাকল। সরালেলে তার মানাই এগর ডাকহান ছনিয়া তার হনার  
কেইরাকহান লামা দিল। কেইরাকহানাদে কয়া বাপক জিলক  
সরালেলর ঔপেইং ফৌঅইলাগা। তানু সরালেলরে হমা দিলা।  
বাপক ঔগই আতজোড় করিয়া মাংল,

‘হে দৌ গিরক, আমার হাবির দৌগ, জীব এতारे  
হংকরেছংগ, তানুর ভাগ্যহানিও ইকরেদেছংগ। মোর জিলক  
এগরেও হংকরেছংগ। তেইর ভাগ্যহানাং তেইর বর এগ কুংগ  
ইকরেদেছি। আমিতে বিছারেয়া নাপেইলাং। ঔহান হরপানি মনেয়া  
তেইরেল আহিলুতা।’

‘হে আপাং বাপকগ। মোর এপেইং আংকরলেহা মিকুপ  
এহানাং মর্ত্যরমা যুগ আহান লালইল। গিয়া পেইতরাইগা তোর  
দারানালা ঔতাই তুমারে নাও চিনতাই। হাইদে তোর জিলকর

ঠৌরাং আহান করে দিং।’ সরালেলে ঔতা বুলিয়া নামরিল হজকর  
পাতা আহান জিলকরে দিল।

‘ঘরে আলয়া যিতেগা গাটে হিনেয়া এ পাতা এহান খেইলে  
বারো পুরীজেলাগ অইতই। তোর কপালে আছেবর ঔগ আশ্বানেও  
নিজে আহিতই।’

তানু সরালেলরে হমা দিয়া বারো কেইরাকহানাদে লামিয়া  
আহিলা। গাংহান বাহি তঙাল আছে। আটতারা মানু ঔতা  
আকগরেও তানু নাচিনতারা। ঘর পানার আগে গাটহানাং হিনেয়া  
জিলকে নামরিল হজক পাতা ঔহান খেইল। মিকুপহানাং তেই  
বারো পুরীজেলাগ অইলী - খলর বাণ্ডরাহানর সাদানে চামহান,  
বনথরোগির সাদানে আতহানি, বেলগির সাদানে যাহানি বেতগাছর  
সাদানে কাকালিহান। .....

পরীগ পারা অইলী জিলকরে চেয়া বাপকর হারৌর সীমা  
নেই। গাঙর মানুরে ডাকয়া চেইলা। এবাকর চিরির তার দারানালাই  
তারে পইলা নাচিনলেও নিঙল এগর বাপকর যারিহান ছনিয়া  
বারো বংশর পুরেলর বাহাতুপে বাপক এগর নাংহান পেয়া ঘরে  
ঙককরিয়া বরেইলা। লয়া লয়াংত গাবুরাপুরেই এতা তেইরে বিয়া  
করানি মনেয়া আহানি অকরলা। বাপকে ডাম তুলানি নুরারের।  
নিঙল এগই আকগরেও ঠিক নাপেইরী।

আগদিনতে তেই গাঙর নিঙল ঔতার তুলো গাটহানাং  
হিনেইরীতা সরালেলে দিনহানাং তা আটের পথগদে যিতেগা  
গাটহানাং হিনেইরী পরীগ পারা এরে নিঙল এগরে দেহিয়া ডাকইল।  
মর্ত্যরমাও এমাটিক হবা নিঙল আছিতাকো। তা অর জারে নুরারল।  
হনার কেইরাকহান গাটহানর পারগং লাগিলগা। সরালেল  
কেইরাকহানাদে লামিল। নিঙল হাবিয়ে হমা দিলা। তা পরীগ  
পারা নিঙল গরে আংকরল, ‘কতি হবা অছংতা হে গিথানক, তি  
কিসাদেগ, তোর নাং কিনাং ?’

‘হে প্রভু, মোরে নাচিনলাংথাং ? নামরিল হজকর পাতা  
দেছিলাং নিঙল ঔগ মি। মোর নাং মাদই।’

‘অ। তোর বাবারে ডাকদে। মি তোরে বিয়া করানি  
মনাউরি।’

‘বুড়ীমা, মাদই-সরালেরর যারিহানতে আগেদেও  
দেছিলেগনা। পাছলেতা ?’ বাবশৌরে মাংল।

‘ঔহানাংতে আজিকার এতা নেয়ছিল। বুড়ীমা, তিতে বানেয়া  
দেউরীহান পাউরি ?’ ইমশৌরে মাংল।

‘আজিকার যারি এহান নুঙেই নাছে।’ বাবশৌ উঠিয়া গিয়া টিবিগর  
মুঙে বহিলগা। ইমশৌও ঔপেইং গেলিগা।

শংখলেইমাই খলকিয়া আহানি অকরল। শৌগি যানিয়ে  
তেই হারৌহে অইলী। আজি আকখুলীগ অয়া থানিয়ে তেই  
মনেইরী। স্বয়াং সরালেলে পেয়া তেইর রূপহান দেহিয়া - মাতে  
পারিলহান আছেতা। জুনাকেত আলয়া আহিতে পথগং  
সরালেলরে উনাউনি অইতেও পারে। মাদই-সরালেরর যারিহানর

বাকী পর্বহানল তেই আকখুলীগই মাংকলে বিভোর অইলী।

রাতি ফামহানাং ঙায়া শংখলেইমা অলাং আহানাং গড়াগড়ি দেনি অকরল। তেইরতা ইমেও ঘুমহান পাতলগ। আজিতে চানাপা আহিগি জিপানির নাং নেই। তেই অউলিজউলি খালকারানি অকরল -

তেইতে বারো পুরীজেলাগ অইতই চুম। বুড়া ঔগতে আর নেই নাই। তারেতে আর আলথক করে আনানি পারতইথাং। থাইলইছতা, তারেও সৈনেই।

বাছেই, তেই বারো পুরীজেলাগ অইলে নুৰাকরে কারে বানাপেইতইগ? না বিয়াতে আর না। তেই আর শৌর মালকগ নাইতই। মালক অয়া কিহানতে কানা অইল। দশমাহা দশদিন গৰ্ভং থয়া, রকং পানি করিয়া জরম দিল। কুগং কলকরিয়া নিজরে হুদালা করিয়া ডাঙর করল। ফরহান হিকানির পিছে হাবি পাছরলা। তেইর মরণহান বাছেয়া থাইলা। না, তেই আর বিয়া নাকরতই। সরালেলরে পেয়াও না। কারিফাবার যারিহানও আকহান না।

গাংহান বেলেয়া তেই কুরাঙও নাজিতইগা। নুৰা যৌবনহানল মেনকা, রস্তা অয়া তেই জিরানিয়াতেই পালয়া থাইতই। তেই বারো পুরীজেলাগ অইলে ও গাঙর, গাবুরাপুরা এতা সৈনেই তেইর পিঠিৎ লগ ধরতইগ। তেই কারে কারেতে বাছতই ? ধলামানু, হুনাশৌ, ধনঞ্জয়, না সক্ররে ?

ঘুমনেই রাতি নঙেইং, তিনকুড়ি তিনবছর কিতা আগে বারো ফৌঅইলীগা শংখলেইমা। হৌদিন দিনর সল বাছানির পাগালা বৌহানে বারো চৌরিয়া করল তেইর মনহান। তেই ফৌঅই লীগা ফাওরাব আফির গছানির ছলে সেনাতলেপইলাতেইরে সকাছিল দিনে, রাসর গোপীগ করে তেইরে হাজা দিতে বলদেবে ষ্টিগ আংহানাং থয়াও বিছারেয়া নাপেয়া ঠিলকরেছিল দিনে কৃষ্ণজরমর নৌ সিংনাং উল্টেছিলনৌগর তলেংত হরিকুমার যামুঙে তেইরে কলকরিয়া গাটনার পাৰগং থছিলগা দিনে, তাম্ফাসেনার তুলো বিয়ার পিছেকার রাতি ফাম তিলনির দিনে।

### পাচ

আকদিন মদনচানে হই হই করিয়া শংখলেইমারে পহরিপারগর লেহাউজারির তলে ডাহিয়া হাতেক করে বাগেইল, 'আবক রকেটগ আজি সেক্কাং এরে দিতই। আমার পিঠির হো গোচরাহানর কাদার টেঙারা ঔগং রাতি নঙেইং ফৌঅইতইহা।'

শংখলেইমার আহিখম চকমক করল। তেইর আস্তা গারিগং দৌ জিলকেইল পায়া।

'আবক মোরতা আজিতে কাম মাই। তেইও যিতইগাগনাই। আবক যানাহান অইলে সময়ং ফৌঅইছগা। নাইলে বেলেয়া যিতইগা। পারতেইতা?

শংখলেইমাই মুরগ লরেইল সিচ্ছিল। হারৌহানে তেই

মাং মাঙইলী।

'আজিতে ছুটির দিনহাননাই। শৌ বাগাদেনাং সেক্কাং নাহিতৌ আরো এবাকা পৌহান দিলুতা।'

যেসাদে হই হই করিয়া আহেছিল ঔসাদে হই হই করিয়া মদনচান সাইকেলহানাং চড়িয়া বেলেয়া গেলগা। কতোহান গিয়া সড়কগর বাউকহানাং আছে গকুলজারির পিঠিৎ লুকেয়া দূরেইংত বুড়ী এগই কিহান করিরীতা চেয়া থাইল।

বেলীহমানির পরহান তেই অস্তির অয়া বাছেয়া থাইলী। আজিকারবেলী এহান হমেইংগা নাবুলের। পিঠির টেঙারাগর খংনাংজারে সেকপিগর সাদানে যালয়াহে থাইল পাউরি।

সেক্কাং তারালেইমা আর আর দিনর সানে আহিলী। মালকরে হজকারি দিল। আজিতে শংখলেইমাই যারিপরি অ ডিগল নাকরল। আহান দুহান কথা টটরেয়া তারালেইমা বেলেয়া গেলীগা। হপনর বারহানর ঔনা তেইর জুনাকে যানার যারিহানও জিলকরে নাবাগেইল। মদনচানরে তেই জবান দেছেগা।

টিরিগং পৌ অকরানির লগে লগে তেইও বদাগর কাদাং বয়া পৌ হুনি অকরল। রকেটগ আজি জুনাকহান তানকরিয়া এরে দেনার পৌ তেই নিজর কানহানল হুন্ল। ধূমা নিকালেয়া এরে দিল ঔহান তেই নিজর আহিল টিরিগর পর্দাহানাং দেখল। বাবশৌ ইমশৌ আতর তালি দিলা। শংখলেইমাও হারৌ অইলী। তেইও মাটিহান এরেদিয়া হাকহানাং ফরদিল। নিত্যিকার সাদানে মাংকলে জুনাকহান চেয়া বারো বহিলীগা। আজিতে আর মনশিক্ষা নাদল। আরো বহকরে চালাক করেভাতে হমানিরকা থৌকরানি অকরল, 'রাতিহান ডিলইল। টিরিগর মুঙে থাইলে চলতইতা? ভাতে হমাগা। আজিতে বক আহান লাগেছেতাও উপায় নেই। সেরকরে ভাতখৈ ইরলপা আহান করবেতা নাকিতা ? বেইনং কতগই কারল কতগই বাজি আহান করলে লমইল। কইতে এগদে দে মি হৌনানি হংকরে দিং।'

বাবশৌ বারো ইমশৌ ববাকর কাদাং যারি হুনিং আহিলা। তানু যারি আহান দেনারকা ববাকরে গেন্টানি অকরলা। শংখলেইমারতা আজি যারি দিল সময় নেই। তেই নিজে আরাক যারি আহানল গনচাল অছে। তানুরে মাঠিয়েয়া তেই মাংল, 'আজিতে যারি নেইনাই। তুমার অজাগও নাহিল। আজিতে তারতা ছুটিনাই। মোরেও দিন আহান ছুটি দেই বেনাই। তুমি ঙালল ভাতপানি খেয়া ঘুমজেইগা। মিও। কতদিন পিছে হববা, নুঙেই যারি আহান দিতৌ। হুতারাই। যে নুঙেইহান।'

'কিহান ? কিহান ? আজি দেনে ?'

'আজিতে মিও যারিহান হারনাপাছু।'

'ঔতাইলে বুড়ীমা কালি দিছ।'

'কালি নাগই - এ 'তেই জুনাকে কইদিন থাইতইগাগ ?

লেপকরে নুবারিয়া তেই মাংল, 'হাইদে কতদিন পিছে।'

শৌগি ববাকরে এরে দিয়া বারো বাপকর কাদাং টিরিগর



মুণ্ডে বহিলাগা। শংখলেইমা তানুরে চেয়া মুকসি আহান দিল -  
তেই জুনাকেত আলয়া আহিলে শৌ এগিয়ে তেইরে কি  
নিংকৌহানল ডাকতাইগ ?

রাতি ভাতপানি খেয়া হাবি ফামে হমেইলাগা। বাবাসৌ  
ইমাসৌতে পড়তে ঘুমজিলাহে পাউরি কার্তিকসেনা বারো গৌরী  
তানুর কুঠাগৎ ফিস্ ফিস্ করিয়া য়ারি দিতারা। কুমবাকা  
ঘুমজিতাইগথাং। তেই ফুতিফালির মচাহান হিয়রগদে লুকেয়া  
ভায়া থাইলী। হাদি হাদিৎ ফামহানাং বহিরী বারো ভাইরী। এবুজ  
না ঘুমজেছি। বেরা আহানহে লাগিল। সময়হান বিংতা অনির  
লগে লগেতেই দরফর করনি অকরল। অইতে অইতে হাবি ইম্পানি  
অইলা। শংখলেইমা উঠিয়া ফামহানাং বহিলী। কানহানি হিঙারোয়া  
হল। কার্তিকসেনা ঘগারা চেলছে। গৌরী তুমিল আছে। নাহ,  
চানাপা ঘুমজিলা। ফামহানাং বয়া বয়া কাপক পারা নুবা আঙালুরি  
ইনাফি পিদিয়া তেই তাল্প লামলী। ফুতির মচাহান হিয়রগৎ  
আছল দিয়া, মনে মনে বারগর দৌ বারো সেনামাহি কোণগ হমা  
দিয়া, ঘুমজেছে ফামহান উঠ উঠ উঠ বুলিয়া তিনখুরুম উঠেয়া  
দুরাহান মুকেয়া নিকুললী। বেরহানাং গুয়া আছে লাঠি ঔগ লইল।  
চারিকুড়ি বছর লালইতেও এবুজ লাঠিগ ধরিয়া না আট্টীগ।  
অইলেও আজি লইলতা, মাতে পারিলহান অছেতা রাতি উতি  
পথে কুকুর-মেকুর। তেই স্বরফামহান চেয়া বিঙেদে কাকেইহান  
লয়া মাংকলেৎত উঠানে মচাহান ধরিয়া লামলী। পূর্ণিমার  
জুনাকহান ডাকডাক করেছে। শংখলেইমা মিঙালর যমহানাং  
হাংকৈ অয়া চারিবারা আকফির চেইল। ঘরর কুকুর ঔগ টংগিগৎত  
আকফালে তেইর মুংহানাং উবা অয়া রহানি অকরল। তেইদাত  
কামারেয়া লাঠিগল আঙেইল। কুকুর ঔগ দুরেইং দাবদিয়া গিয়া  
খাঙয়া উবা অইল। তেইরে চিনিয়া লেজগ লরেয়া তুমিল অইল।  
শংখলেইমা তুলসীপুংগ পেইলগা। কুকুর ঔগ ইম্পানি অয়া লগ  
ধরল। তেই লাঠিগল বারো আঙেইল। শুভ কাম আহানাং জিতেগা  
এতা মায়ার বেরাগাঠুনি। জিয়া জিপুতরাংত এগইহে তেইর  
মায়াহান জিঙেছে। ঔতাও কুকুর ঔগ দুরেই দুরেই অয়া তেইর  
লগ ধরল।

মদনগাছির গান্টাহান পেইতেগা তেই চানাপা ফ-ফ-এইল।  
মেংমকা জিরেইল। গান্টাহান মুকেয়া তেই তানুর চুরিতলগৎ  
উবা অইলী। কুকুর ঔগ গান্টাহানাং উবা অয়া থাইল। মদনগাছির  
কুকুর ঔগই বেরু কুকুর এগ দেহিয়া আমারাক দিয়া রহানি অকরল।  
শংখলেইমাই নারগ চিপেয়া ডাহানি অকরল, 'মদনচান, অ  
মদনচান। শেফালিকা, অ শেফালিকা।

রাতি নঙেইং কুকুর ঔতার রহনে বারো তেইর ডাকহানে  
মদনচান বারো শেফালিকা হজাক অইলা।

'হা, শংখলেইমা আবকনা কিতা !' শেফালিকাই  
মদনচানরে মাংল।

মদনচানে কিংতাও নামাতিয়া তেইরে চেয়া মুরগ লরেইল।

'মি বারে বারে মাংলু। সরলা বুড়ী এগরে এসাদে না  
লাংকরি। থকনেই। পাপ বইতেই। এবাকাতে ?'

'মিতে হারপাছুথাং এ নঙেই নংতলে এমাটিক দুরেই ফাম  
এহান পেয়া আটিয়া আহিতই এহান।'

'তি দৌদুক, মহিমন্ত্র নাকরর। ঠিক আছে। তোর বিজ্ঞানল  
থাক এনে। হুদালা বিজ্ঞানল সমাজ আহান না পালর। লোক  
বিশ্বাসও জাত আহানর মূল্যবান সম্পদ এনা।'

মদনচান মুরগ নঙেয়া তেইরে গিলিক করে চেইল।

'তিতে অনু পরমাণুর বিজ্ঞানল তামকরেছংগনাই। মোর  
ডেকি সমাজ বিজ্ঞানল তামকরলে হারপেইলেইছ এতার মূল্য  
কিতা। সমাজ আহান মানুল হজরতা, পরমানুল নগাই।' মদনচানরে  
যৌকরে পরথেয়া শেফালিকাই মাংল, 'এবাকাতে যাগা বুড়ী  
ঔগরে কিসাদে বুঝারগাতা বুঝাগা।'

মদনচান মুরগ নঙেয়াই থাইল। তা অনুতাপ আহানাং  
ডহানি অকরল। শেফালিকারে তা হেইচা করল, 'মোরতা লালইল।  
তি মাতুরী ঔতা হাইতা। মি কিসাদে আবকর মুণ্ডে উবা  
অইতৌগাতা। যাগানে, তি খানি বুঝগানে।'

তেইরে নাচিনিয়া টটরতারাহাং বুলিয়া এফির নারগ  
নিকালেয়া শংখলেইমাই মাংল, 'মদনচান, মি এনা, মি।'

সদাই মুর ঠিকদিয়া থার মদনচানে আজি মুর নঙাছে  
ঔহান কুপকরে কতপর চেয়া শেফালিকা উঠলী। দুরাহান  
আংকরিয়া তেই নিকুললী।

'অবায়, শেফালিকা তিতে এবুজ না সালছংতা !  
রকেটগতে ফৌঅনির পরহান অইল। ডিলইলে বেলেয়া যিতইগা।  
সালগা, চালাক কর।' শংখলেইমার মেইখঙেৎত হারৌহান পাহিয়া  
পড়ের।

লিকলিক করের কুমেইর ফুতিফালি পিদিয়া, নামসা পিদিয়া  
ফুতির মচা আহান ধরিয়া জুনাকে সালছে শংখলেইমারে দেহিয়া  
তেই আর হ নুবারল। গাং এহানর আর্ষ, গুণবতী বুড়ীগ, আমার  
আপাবপার জ্ঞানর ভাণ্ডারগ আজি চুরিতলে, এসাদে। শেফালিকার  
গাল দ্বিগিগদে অর করে আহিরপানি পড়িল। চুরিতলগৎ লামিয়া  
তেই কিংতাও নামাতিয়া শংখলেইমার জাংহান কলকরিয়া হমা  
দিয়া পড়লী।

'অবায়, শেফালিকা ! কিতা করুরিতা ! উঠ ইমা।'

'আবক তারে ক্ষমা করেদে। ক্ষমা করেদে -'

তেই শংখলেইমার জাংহানি আরাকৌ চেংকরে ধরিয়া  
কাদানি অকরল। মদনচান তাল্প ঘর ভিতরেৎত মুরগ নঙেয়া  
নিকুলিয়া আহিল। তাও শংখলেইমার জাংহানি কলকরিয়া হমাদিয়া  
মাংল, 'আবক, মিতে তোরাং পাপ কাম আহান করলু, মোরে  
পারলে ক্ষমা করেদে।'

শংখলেইমা কুপকরে তানু দ্বিগিগরে চেয়া থেইলী। নুবা  
হপন আহানল নানছিল তেইর মেইখংহান বারো খজখজ অইল।



গারগর চামহান বারো য়ালইল। পিঙালা আহিখম মাথনেই জালা  
আহানল পুরপুরানি অকরল।

‘অ। অ। হারপেইলু। উম। শংখলেইমার নারগ হক আগই  
ভিতরেৎত ডিফা দিল। তেইর য়ালছে কানহানির লেহাউগি তাল্ল  
তাল্ল দোলানি অকরল। লাটিগৎ ভরহান দিয়া মাটিহানাদে চেয়া  
থাইলী। আতহানল তানুরে মাটিয়া দিল।

‘উঠো। কিংতাও নেই। তুমিহে হারো অয়া থায়।’

মেইখংহান তুলিয়া জুনাকহানাদে চেইল। পূর্ণিমার  
জুনাকহান ডাক ডাক কৰেছে। নামরিল হজবর গাছ ঔতা আজিযো  
টাংখেই শেঙয়া নিকুলেছে। তেই আহিখম জিপেয়া হমা দিল।  
জিপা আহিখমেৎত দিফুটা তপ্তা আহিপানি মাটিং পড়িয়া মিকুপে  
হকিল। তেই পিঠি বুলন দিল। এবাকা তেই কি মেইখংহানল  
ঘরেদে আলইতইতা। তেইরে বিছারেয়া নিকুলে থাইবা পুতকর,  
বহকর, বারো গাঙর মানুর মুঙে কিসাদেতে উবা অইতইতা। ইমামো  
বাবামো হজাক অয়া থাইলে - উহ। তেই ঘরেদে কাকেই আহান  
কারল। হেইফেই নাইফেই দিয়া পড়তে শেফালিকাই তেইরে  
ধরল। মাটিং পড়িল লাটিগ মদনচানে তুলে দিল। তানু তেইরে  
ধরে ধরে গান্টাহান পেয়া আহিলা। শেফালিকা উবা অইলী।  
মদনচান ঘৰপেয়া খিলকরে দেনারকা তেইরে ধরে ধরে  
আগুরেইল।

‘কিংতাও নেই, মি পারতো। কইতে লাটিগতে।’

লাটিগৎ ভরহান দিয়া তাল্ল তাল্ল ঘরমুহা কাকেই কারল  
চারিকুড়ি বছর শংখলেইমা। পূর্ণিমার জুনাকর মিঙাল এহান হাবির  
বরিহানে তেই চানাপা নঙেছে। ঘরর কুকুর ঔগ তেইরে বেরি  
দিয়া বুলে বুলে লেজগ লরা লরা দাবদিয়া দুরেইৎ য়ারগা, উবা  
অর, বারো আলখক আহের, বারো দাবদে য়ারগা।



## কলির যত্নোচ

সুখেন্দ্র কুমার সিংহ  
গৌহাটী

একাঙ্কিকা  
(সম্পূর্ণ কাহনিক)  
চরিত্র পরিচয়

গোলাপ সেনা	বয়স ৫৬ বছর - অবসরপ্রাপ্ত সৈনিকগ
ধনঞ্জয় বয়স	৫০ বছর - গোলাপ সেনার বন্ধুগ
নানুচাউবা	বয়স ৪০ বছর - গাঙরগ
গৌরমোহান	বয়স ৬০ বছর - গাঙর বৃজনগ
দঙগ	বয়স ৪০ বছর - গোলাপসেনার গিধানক
ফুলরানী	বয়স ৩৫ বছর - ধনঞ্জয়র গিধানক

ধন এইগা	বয়স ৪৫ বছর - গাঙহানর বামুনগ
নন্দলাল	বয়স ৪৫ বছর - গাঙর মাষ্টরগ
পল্টু	বয়স ১০ বছর - গোলাপসেনার পুতক
সবিতা	বয়স ৯ বছর - ধনঞ্জয়র জিলক

### প্রথম দৃশ্য

পরিবেশ :	গোলাপসেনার বারহ ধনঞ্জয়র ঘরগি হাদিত জীবরর বেরহান। বেরহানল উঠান দ্বিহানি খেয়ছে।
নির্দেশনা :	উঠানহানর বেরহানর দ্বিহাপারে দঙগর বারহ ফুলরানীয়ে উবা অয়া তর্কাতর্কি করতারা
নাট্য চরিত্র :	গোলাপসেনা, ধনঞ্জয়, দঙগ, ফুলরানি, নানুচাউবা
দঙগ	: তি হাজারতা মাতিয়াও কানা অইতয়হান নাগয় উগো মোর বাটে পরেছেগ।
ফুলরানী	: কিতা বুললে, চরে বরগল্লা অছততা ? কি হকহান থায়া মোরগ বুলউরীতা ?
দঙগ	: অবায় মোরে চরগ বুলিরিহে, মি ঘাম বেলেয়া য়করানি তি মালিকগ অনি (বারাদে চেয়া) ছন ছন গিরিগিথানি কলি ঘোর কলিহায়হান।
ফুলরানী	: দঙগ ঈচে এবাকাও ঠাকহান থায়া টটরাউরীতা, হবায় হবায় ইম্পানিগ অ’ -
দঙগ	: (হস্তক দিয়া) কিতা বুললেদেখতে উপুগ মুকাদিতু ?
ফুলরানী	: কিতার উপু মুকেইতেইতা ? মি মুকানি অকরলেতে কুকুরর মুরে চুচ জারতৌ পারা, হারনাপাছত - (নানুচাউবা আহিল)
নানু	: অ-হো-হো-কিহান অইলাইতা বউজীগাছি আজি হাপ্তা আহান অইলতোমার কৌলি গালি এতা ছনিয়া গুরুয়ে গাস্ খানা এরেদিল। -
ফুলরানী	: চা-নে নানু গিরি মোর বি-হানাত রুয়াছু খন্টুম জারিত খন্টুম আগ ধরেছে, উগো মোরগ নাগয়- তেইরগ বুলিরিতা এহান কোন দেশর যারীহান।
দঙগ	: অবায় মূল যারী হানতে কিয়া নাফুকারাউরীতা ? উহানতে মাঠাহানল গুরিয়া টটরাউরীতা। তি রুইলেতে কিতা অইল, তোর খন্টুমজারির লতগো মোর বি-হানাদে গেছেগা উহানতে মাতানি লাজ পাউরী থাৎ ?
ফুলরানী	: দেখলে দেখলে গিরি-এহান কিসাদে জীবগই য়াকরতই যারীহান - তেইর বি-হানাদে লতগো

গেছেগা বুলিয়া খল্টুমগো তেইরগ বুলিয়া ডাঙর  
অয়া দাবী করিহতা - এহান কিসাদেগেই যাকরতই  
য়ারীহান।

নানু : দঙগ বউজী- এহানতে খাটলর যারী উহান  
পারা অইল। তোর গাছজারির খাটলর সেয়াগো  
মোর উঠানে পরেছে থাংতে খাটলগ মোরগ -  
(মুকসি আহান দিলে)

দঙগ : গিরি-। গিরিরেতে মি সিঙ্গ বুলিয়া ঠাচা করেছিলু.  
গিরিতে আপাঙর যারী দিয়রনা- গাছজারী  
তেইরজার অইলতে কিতা অইব - যকরানিতে  
মি যকরেছু নায়। সরকারে পেয়াও মাতের জরম  
দিরি উগরাংতো যকরিরি উগোরতা পুরাপুরি  
হকহান।

নানু : কিসাদে যকরলেতা বউজী?

দঙগ : মোর বিহানেদে গেছেগা খল্টুমর লত্ উগোরে  
দিনকারে লেহে হিনাদিয়া যতন করেছু আরহে  
খল্টুমগ চাঞ্চল অয়া ধরেছেনায়।

নানু : আহ্ বউজীতে যশোদা অলইলেতা?

ফুলরানী : গিরি হার নাপাছত 'কলির যশোদা'

দঙগ : মোরে টিটকারী কররাইতা? হোভা নাইতয় -  
মি হেমানর জিলক্গোরে অইলেতে মাতৌরিতা  
খল্টুমগ মি নিতৌগা -ই-নিতৌগা-বউজী কৌলি  
গালি নাকরিয় তোমার মাপু উগি অন্তরংগ  
উদাকগি-আকপেইতে থাইক্ বুলিয়া নুবা ঘর  
হংকরিয়া পরলাইগা এহানাত্ এসাদে কৌলি  
অইলেতে -

দঙগ : নানুগিরি উরে কৌলি লাংপী উগরেহে মাত।  
আমার বংশত কৌলিতে থাক্ মানুহ আগরে  
হা-হুম অয়া না টটরাছি, আজি (কাদানির হক্গো  
আনিয়া) গর পাতিয়া আয়া এসাদে কৌলি  
লাংপী নাঙ এহান হানানিত পইলুতাকো-

গোলাপসেনা : কিতা অছে থাং?

দঙগ : (কদানির হক্গ আরােকৌ জবর অইল)

গোলাপসেনা : অ-হারপেইলু, (মইলকর উগদে উদ্দেশ্য করিয়া)  
তোরে বারে বারে মাতলুগোনা, তল জাতিয়া  
উতার লগে থতাহান না লাড়েইস্ বুললু গোনা?

ফুলরানী : গিরি হলে, নায়, হোভা জাতর যারী

গোলাপ : নানু মাতেদে চূপ অয়া থাকা

ফুলরানী : এহানলো সাবিত্রির মালকে মাতলো উহান  
লগরতা যুগত নাইলে তীর্থত নাযিয়গা বুলিয়া-  
মি আগরে বারে বারে মাতলু পুরানা ভিটাগো  
এরা নাদিক বুলিয়া।

ধনঞ্জয় : কিতা অছেতা? ভিটারয়ারী উঠেছেতা-

ফুলরানী : কিতাতে অইত বারহ খল্টুমগল লংকা কাণ্ড  
যুতেছি-

দঙগ : উরে দেখলে নানুগিরি হেয়ক আহানিয়ে রং  
সাংকরলতা।

ধনঞ্জয় : ঔ বারা উহানাদে মিচিল আহিল নাচেইছ্ নিয়াম  
আকছিতা এফুরতে উচকরে বেরহান দিতৌগ,  
আহির মিল্লংহান পেয়া নাপরক-

গোলাপসেনা : অ ধনঞ্জয় মোয়েইর কথালা হাক্হানাত কা-  
ছত উহান বেরতে কিয়া পাকালো ওয়ালগ দে-

ধনঞ্জয় : তোরে মি কিব্রাউনা মাতেছু (গোলাপরে উদ্দেশ্য  
করিয়া)

নানু : বাহা দাদাগাছি তোমার এহানতে চুম নাইল,  
মানুয়ে দেখলে লাজপেয়ার

গোলাপসেনা : মি কতদিন অইল চাউরীতা না এতা নিয়াম  
কা-আঞ্চিল অছিতা-

ফুলরানী : (ধনঞ্জয়রে ধরিয়া) না টটরেই ঘরে হাট এতা  
লাজ ডর আছি মানু নাগয়। নানু গিরি তিও  
যাগা-

দঙগ : (গোলাপ সেনারে উদ্দেশ্য করিয়া) হাট-এতারে  
বারহ মানুহ আক্ তা বুলিয়া গনিয়া-চেইক  
খল্টুমগ কোংগই নিতারাগাতা (গোলাপসেনা  
বারহ ধনঞ্জয় নিজর মৌয়েইল ঘরে হমেইলাগা)

নানু : হে হরি কোম্পেইত থায়া দেহরতা ঘোরকলি,  
ঘোর কলি (নানু নিজর ঘরে গেলগা)

## দ্বিতীয় দৃশ্য

পরিবেশ : ধনঞ্জয়র গরগো। গোলাপসেনার ঘরগোর  
উবেদে চেয়ার আহানর গজে ফিটা আহান  
পারিয়া থাইতয়।

নির্দেশনা : ফুলরানীয়ে উঠানহান ছরিয়া থাইতয়। পল্টু  
বারহ সবিতায় বেরহানর দিয় বারাদে উবা অয়া  
থাইতাই।

পল্টু : তোমারে আমি খল্টুমগ নাউ দিতাঙায়।

সবিতা : আমিও তোমারে খল্টুমগ খানা নাউ দিতাঙায়।

পল্টু : ইমায় মাতলো উগো আমারগ।

সবিতা : আমার ইমায়উ মাতলো আমারগ

পল্টু : এ আমারগ

সবিতা : এ আমারগ

ফুলরানী : সবিতা ঘরে হমাগা

সবিতা	: চা-নে ইমা আমার খন্টুম উগো তানুরগ বুলতার (দঙগ আহিলি)	দেসিতায় আমি কাম কররতাই আরাক আকপেই ... আজিহু পুরি জজমান বন্ধ।
দঙগ	: (পুতকরে উদ্দেশ্য করিয়া) এগদে আয় বাবা ঘরে হমাগা।	দঙগ : হোভা অছে আমিও নুবা বামুন হংকরিয়া এরেদি তাঙায় - (পুতকরে উদ্দেশ্য করিয়া) পন্টু ...
পন্টু	: ইমা খন্টুম উগনি তানুরগ বুলতার	নন্দলাল মাস্তরে ডাক আহান দেগা -
দঙগ	: উতা জমিদার বারহ মিরাজদার না, বাবা ঘরে হাট (বুলিয়া আতহানাত ধরিয়া ঠেলা ঠেলা নিলগা)	ধনএইগা : কিতাউ নেই ঈচে এহান লম্‌করিয়া আহৌরী -
ফুলরানী	: সবিতা ঘরে হমাগা বিয়ানত সেলপুংহান রহানি অকরল মাহেইতে হৈপদ পরতইগ (সবিতারেল ঘরে হমেইলিগা) (ধন এইগা আহিল)	গোলাপসেনা : না না নাইতয়। জিনিষ যোগাড় করে দেই নন্দলাল মাস্তরে আমার শাস্তিহান করতই - (ধনএইগায় জিনিষ পত্র যোগাড় করিয়া ঘটগো বহেয়া মস্ত্র পাঠ করের বারহ ঔম শাস্তিবুলে বুলে ধনঞ্জয়, ফুলরানী বারহ সবিতারে পানি ছিটার। উবেদে নন্দলাল মাস্তর আহিল)
ধনএইগা	: কইতে কোংগ আছতা ? গোলাপসেনার ঘরেদে যানার পথগো কোংগদে ? (ফুলরানী নিকুলি)	নন্দলাল : (দঙগরে উল্লেখ করিয়া) ঈচে কিতারকা ডাছয়েইলেতা ?
ফুলরানী	: এইগা আজি বিয়ানততে ?	গোলাপসেনা : আমার ঘরগোর শাস্তি আহান করেদে -
ধন	: হাই দঙগ ঈচে উগয় কাম আহান করে দেনা বুলিয়া মাতুলো থাংতে পথও বের দেছ থাংতে পথগ নাপেয়া অসুতা।	নন্দলাল : উতাতে দাদা বামুনের কাম, আমি ক্ষত্রিয়য় করে পারিলতা নাগয়।
ফুলরানী	: (ঘরর ভিতরেদে উদ্দেশ্য করিয়া) এ ফুললাইগ, এগদে আহ। (ধনঞ্জয় আহিল)	দঙগ : বামনগইতে উরে চা আমি ডাকলাং আর.....
ধনঞ্জয়	: কিগো থাং ? (এইগারে দেহিয়া) অ এইগাগো আজি বিয়ানততে ?	গোলাপসেনা : অইতয় নন্দলাল মি এববাকার গায় দিবসহান করতৌগ - সালকিরামগ আনুগা মি বাবক বার্তন দেউরীয়া বারহ তোর বহক উগরে অনিয়া ভাতে বরাদে আজিহু পুরি তি আমার বামুনগ।
ফুলরানী	: মি তোমারে নামাতেছিল, এইগারেল দঙগয় কাম করয়েইতয় বুলিয়া - হানতে এইগা দঙগর ঘরে যানা নাইতয় আমার ঘরগোরতা শাস্তি আহান করে দে -	নন্দলাল : উহানতে অপরাধী অইতাঙায় - আপা-বপার বার্তন দেনা লাগের.....
ধনএইগ	: ঈচে আরাক দিন আহান অইলে হোভা অইব তা-না কিতা ?	গোলাপসেনা : অপরাধী অইলে মি অইতো .... আপা-বপা নাইলেউ চলতই অকর অকর.....
ধনঞ্জয়	: অ এই গাগৌ, আমিতে কিতা জজমান নাদিয়ারগ ?	(নন্দলাল উপায় নাপেয়া বার কিতা যোগাড় করিয়া লাগেছে উপেয় গৌরমোহন বারহ নানু আয়া দেখ্তারা যে দ্বিয়গদে শলকরানি অকরেছি)
ফুলরানী	: (ধনঞ্জয়রে উদ্দেশ্য করিয়া) জিনিষ এবাকার গাই যোগাড় করেদেই - এইগা শাস্তিহান হোভা করে করেদে -	গৌরমোহন : হাঃ নন্দলাল তিতে কোম্বাকাহ বামুন কোলে জরম অইলেতা ?
ধনএইগা	: উতাইলেতে তুরাকরে জিনিষ আন (এইগা যোগাড়ে লাগিল) (দঙগ আহিল)	নন্দলাল : দাদা মি নাকরতে গোলাপসেনাদায় জবরদস্তি...
দঙগ	: হাঃ এইগা উহানতে কিহান (দেহিয়া) এ ফুললাইতা চেয়া আহ (গোলাপসেনা আহিল) উরে চেই বামানুগোরে পথমেরাকে খামকরিয়া... চেই... চেই...	গৌরমোহন : কইতে গোলাপ বারহ ধনঞ্জয় - তোমার এহানতে কিহান - নানুয়ে হাবি যারী বাগেইল। সামান্য খন্টুম আগর সালে এতাপারা বিপর্যয় এহানাত খেঙছতা। বারহ গোলাপসেনা তিতে নিয়াম অনায়ায় করেছত, গাছজারির লতগো তোর উবেদে গেছেগা বুলিয়া ফলগো দাবী করর উহান সুপকরেও চুম নাছে। উতার গজে খন্টুমগৌ ছকাং অয়া আছে খানার উপযুক্ত নাছে। দাদায় বিচার করেদে নাইলেতে ঘর দ্বিয়গির অবস্থাহান
গোলাপসেনা	: এইগাশৌ উহানতে নাগয়হান করর - বার্তন	



দেখলেনায়। দাদায় খন্টুমগ চিলা করিয়া দ্বিভাগ  
করিয়া বাটেদে।

গৌরমোহন : কচমা আছে খন্টুম উগো - খানাও নুয়ারতাই।  
যেতাও অক্ গোলাপসেনা বারহ ধনঞ্জয় খন্টুমগ  
দ্বিভাগ করেদিং ? যাকররাই নাই। (গোলাপসেনা  
বারহ ধনঞ্জয়ে যাকরলা)

হুকাং খন্টুমউগো আনিয়া দ্বিকরত করতে  
দেখতারা ভিতরগ পচেছে গাছজারিত বিষ  
দেনায় অছেতা।

গৌরমোহন : লাভহান করতা অইল ? পুষ্ট অয়া ধরলে দ্বিয়  
ঘরে বাটিয়া খেললায়ই ছ, এবাকাতে কোনগয়  
খা নুয়ারলাই।

দঙগ : এবাকাতে খেইবাই নাই -

নানু : বউজী (দঙগরে উদ্দেশ্য করিয়া) কলির যশোদা  
বুলতেতে মথুরার পুতানা হিনচাপীগো অছত।  
আরাক আহান কর খন্টুম এজারি গুরিগোন্ত  
উছলেদেই, বাজারেত্ব লয়া আনিয়া খেইতারাই  
উহানে তোমাং উপযুক্তহান। ঘোর কলি -

যবনিকা



দেবভূম

যযাতি

পরশর মুনির আশ্রমে, দ্বি আগ অকরিয়া আমি  
হাবি-তিরুমল ভেঙ্কটেস্বামী অনন্ত লিঙ্গম, ভরদ্বাজ, কৌশিক,  
বারো সংগীতা - বৈয়া যারীপরী দিয়া আছিলাঙ। আমি দেবভূম  
দর্শনে আহেছি। হিমালয়র ধাওলাগিরি পর্বত শৃঙ্গমালা, পীর-  
পাঞ্জাল পার্বত্য অঞ্চল, কুলুভেলী, রোটাং পাস, লাছ্যাল-স্পীতি  
ভেলী, এ অঞ্চল এগরে দেবভূম বুলতারা। তিব্বতর কৈলাস  
পর্বত, মানস সরোবর, উত্তরাঞ্চল প্রদেশর দেওবন উত্তর কাশী,  
অলকানন্দা, যোশীমঠ, কেদার নাথ, বদরীনাথ, এতারাউ দেবলোক  
বুলতারা। এ দেবভূমে, যক্ষদেশ, কিন্নর দেশ, মৈনাক পর্বত,  
বহ্নিক পর্বত, নৈমিষ কানন, মায়া কানন, শ্বেত শৃঙ্গ পর্বত,  
কৈলাস পর্বত, অপসরা পর্বত, সুমেরু পর্বত, সোমেশ্বর পর্বত,  
গন্ধমাদন পর্বত, চতুর্দশ সহস্র শিব-শৃঙ্গ পর্বত, শিবরাজ  
গিরিশৃঙ্গলোক, বারো স্বর্গ-ভোরণ আছে বুলতারা।

পঞ্চপাণ্ডব বারো দ্রৌপদী স্বর্গারোহণে এ অঞ্চলেদেই  
গেছিলগা বুলিয়া আমার মানুর বিশ্বাস। ভগীরথী গঙ্গাং হিনেয়া

গঙ্গামাটির নাম্ছা পিদিয়া তানু উত্তরেদে হিমালয়ে গেছিলগা  
বুলিয়া মাতেছি। পথে মেঘনাদ পর্বত, কেদার পর্বত, মণিমেহেশ,  
মায়া সরোবর, মায়া কানন, মেঘবর্ণ পর্বত; ভদ্রকালী পর্বত,  
ভদ্রেশ্বর, হরি পর্বত (দ্রৌপদীর পতন অছিল) বদরীকাশ্রম (পরশর  
মুনির দর্শন) রৈবত পর্বত (সহদেবর মৃত্যু) চন্দ্রকালী পর্বত  
(যোড়শ সহস্র পঞ্চানন দর্শন বারো নকুলর মরণ) নান্দীঘোষ  
পর্বত (অর্জুনর মরণ) সোমেশ্বর পর্বত (ভীমর পতন) পারিজাত  
পুষ্পমাল্য লাভ, গন্ধমাদন পর্বত (হোনার ধাম্পাল) মহেশ  
শিবলিঙ্গ দর্শন, চতুর্দশ সহস্র শিবলিঙ্গ দর্শন করিয়া যুধিষ্ঠির  
স্বর্গদোয়ারে ফৌয়ছিল। উপেইংত স্বর্গরাজ্য মাত্র যোজন আহা  
ন পথদুরেই আছিল। উপেই ইন্দ্রপুরী / অমরাবতী / স্বর্গরাজ্যেংত  
ইন্দ্র, ধর্মরাজ আহিয়া যুধিষ্ঠিরে স্বর্গদোয়ারেত্ত ওকরিয়া স্বর্গে  
নেছিলগা বুলেছি। আমার মানুষে মৃতগরে মহাভারতর এ  
স্বর্গারোহণ পর্বতহান ১০দিনহাবি পাঠ করিয়া হুয়েইতার।  
আজিযো পৃথিবীর অজস্র মানু, তীর্থদর্শনে, হিমালয়র এ অঞ্চলে  
আহিতারা। দ্বি ফোয়া ফোয়া তিরুমল ভেঙ্কটেস্বামী অনন্ত লিঙ্গমে  
দেবভূমির ছবি আহান আকিয়া ইম্পানীগ অছিল।

বিশ্বাস-অবিশ্বাসর সন্দেহো কৌশিকে মাতেছিল- ঠাচা  
না করিয়াউ কি উপায়! য়েপেই হাজার হাজার মানুষে বিশ্বাস  
করতারা উপেই মি আগর অবিশ্বাসে কিহান আহের যারগা।  
ফাষ্ট এক্সপ্রেসে আহমেদাবাদ গান্ধীনগর, উদয়পুর, আজমীড়,  
জয়পুর, অত্রা, মথুরা, ফরিদাবাদ ঐয়া দিল্লী আহেছিলাঙ। দিল্লীংত  
আহালা ঐয়া রেল শিমলা গেছিলাংগা। শিমলাংত বাসে মণ্ডি  
ঐয়া পরাশর নগরে গেছিলাংগা।

আড়াইদিনর পথরহীনে হাবিয়ৌ ঠুয়ছিলা। রেণুকা  
সরোবরে হিনেয়া প্রসাদ লঙ্কারানির পিছে ফামে পড়তেই হাবিহান  
ঘুমজেছিলাঙ। শিমলাংত মণ্ডি চারি ঘণ্টার পথ। ৮০ মাইল  
বিস্তারবিস্তি। মণ্ডিংত পরাশর নগর ২২ মাইল। সেন্দার আগে  
আগে হাবিয়ৌ উঠেছিলাঙ। আশ্রমর সেরক আগয় আশ্রমর  
চাতালে দ্বি আগ অকরিয়া থদেছিল। আমি হাবি দ্বি উগর চারিয়ৌ  
বারাদে কৈয়েয়া বহেছিলাঙ। পূজারীগয় চাহা আকেইকাপ দিয়া  
গেছিলগা। চা-পিয়া পিয়া ভরদ্বাজে যারীহান দেছিল -

পরশর মুনি বহু যুগ ধরিয়া এ আশ্রমে যজ্ঞ, অধ্যয়ন,  
দান, তপস্যা করিয়া আছিল। এ চারিয়ৌ হানরে আত্মগরীমা প্রচারর  
আচরণৌ বুলতারা। কিন্তু সত্য, ধৈর্য্য, ক্ষমা, নিরোভ এ মহৎ  
গুণ এতা হুন্দা মহাত্মারাঙ দেহিয়ার। মাতিয়া শোলোক আহান  
দেছিল -

ইজ্যাধ্যয়নদানানি তপঃ সত্যং ধৃতিঃ ক্ষমাঃ।

অলোভ ইতি মার্গোহোয়ং ধর্মস্যাষ্টবিধঃ স্মৃতঃ॥

তত্র পূর্বচতুর্বর্গো দত্তার্থমপি সেব্যতে।

উত্তরস্ত চতুর্বর্গো মহাত্মান্যেব তিষ্ঠতি।

কৌশিকে, ভরদ্বাজর কথাহানি হাদিলো আকুয়ালি  
নুয়ারিয়া মাতেছিল- এতাত্তে বিনি, উদাসীন মানুর আচরণ অথবা  
মুনিষ্যির আচরণ। আজিকালির পৃথিবীৎ এতার কোন অর্থনেই।  
শাস্ত্রর কথা এতা পাকড়তে ছনতে নুঙেই লাগের। প্রকৃত কর্ম্মেতে  
এতা এবাকা সিকিহান, মাহেইগর ডেকি পুংকাৎ অচল। এবাকাতে

‘ধনমাছঃ পরং ধর্ম্মং ধনে সত্যং প্রতিষ্ঠিতম্’

এবাকাতে বিনি বিভূতি বৈভব, বিদ্যা, ধন সঞ্চয় এতা ন মনার  
মানু উগর কোন দাম নেই, কচুর ছকানা পাতাহান পারা। যেসাদে  
- পানীনেই ঘাট, মাছনেই বিল, ফলনেই গাছ, জোনাকনেই রাত্তি,  
কর্ম্মনেই জন, জীৱনেই জন্তু, ছনেই হরপ, পাংকলনেই আন্তি,  
বীজনেই মস্ত্র, বেদহীন বামন, এতার কোন মূল্যনেই। বিনি শাস্ত্র  
মিয়াম না পাকড়ি। জনমহান পাকড়তে যিঠেগা। শাস্ত্রয় তোরে  
বিভূলাগ করে বেলতৈ। শাস্ত্রর কথাএতা যেসাদে উপনিহীন উসাদে  
শাস্ত্রমতে চালানিয়ৌ হীন।

- স্বর্গ, নরক, এতা মিথ্যা নাঙ। পৃথিবীর মানুরকা  
অদরকারী। মানুরমাই আছে স্বর্গ, নরক, মানুর মাই সুরাসুর।  
আবশ্যকীয় গুণ উপাস্য। দেহধারণ উপকরণ কাম্য। আশ্রয়  
ফাম আহান প্রয়োজন। আত্মীয়-কুটুম, পরিবার-পরিজন-পালন  
কর্তব্য। মানুর তুলো তিলেয়া থানা সহায়। সংসারে মানুগ এয়া  
বর্ত্তিয়া থানারকা যেতা নাইলে নার উতা আবশ্যকীয় খৌরাং।  
তারো এবাকা মাংলে কথাত্রতা শাস্ত্র সন্মত এলেউ - আমি  
সাংসারিক মানুরকা উতা পালন হীন হান্তে মোরাং সংসারর পথি  
হিসাবে গ্রহণযোগ্য নার। জ্ঞান মার্গে, ভাব মার্গে, তত্ত্ব মার্গে  
আধ্যাত্মিক মার্গে গেছিগাতারকা বা যানা মনেইতারা মানু রাঙ  
প্রযোজ্য ঐতে পারে। অর্থাগমে যেহানি লাগের ঔবিদ্যা বারো  
জ্ঞান, তালকরে পারলেই আমি সংসারী মানু এতারকা যথেষ্ট  
খালকরৌরী। এবাকার শাস্ত্রসন্মত মত এসাদে অনা থক -

‘যস্যার্থান্তস্য মিত্রানি যস্যার্থান্তস্য বান্ধবাঃ।

যস্যার্থাঃ স পুমান্ভ্রোকে যস্যার্থাঃ সঃ হি পশুতঃ।।

ভরদ্বাজ কৌশিকরে বুঝাছিল, পশুতে, জ্ঞানী-গুণী  
মানুয়ে, ধনবান মানুরে নাউ ভজতারা। আশা আকাঙখার পীড়নে  
লোভী অছি মানুয়েই ধনাকাঙ্খালো ধনবান মানুরে ভজতারা।  
তি মাতর আবশ্যকীয় খৌরাঙ এতা আকাঙ্খায় ডাহেরতা। স্বভাব  
এহানতে তোর মনর চিন্তাধারার বহিঃপ্রকাশ। স্বর্গতে মন এহানে  
হাজরহান। বিষয়ান্তমন আরাকৌ বিষয় আশয় ডাহিয়া মানুর  
জাগতিক বন্ধনহে দরা করের। মন এহান সময়ে সময়ে নানা  
তঙাল তঙাল রূপ ধরের। আশা-আকাঙ্খা-খৌরাঙ যতৌ থুঙর  
ততৌ বাডের। কর্ম্মআহানে আরাক কর্ম্ম আহানরে বার্ত্তন দেৱ।  
বিষয় বাসনা মিটিয়া ঔনা নেই। বাসনা চিন্তার উদ্রেক করের।  
চিন্তায় দুশ্চিন্তা আনের। দুশ্চিন্তায় মনহানরে খলপীখলক করিয়া  
অলাঙ করের। অলাঙ মনহানে কর্ম্ম সম্পন্ন করে নাৱের। অসম্পন্ন  
কর্ম্মে জঞ্জালর সৃষ্টি করের। ঔ জঞ্জাল সেঙকরতে মানুর

কর্ম্মশক্তির অপচয় অর। তি মাতর কথাহান যাকরলে মাতানি  
লাগতৈ —

‘কঙ্কনস্য তু লোভেন মথঃ পক্ষে সুদুস্তরে।

বৃদ্ধব্রাহ্মণ সম্প্রীভঃ পথিকঃ স মৃতো যথা।।

তি মাতর-পাপ-পুণ্য এতা মনর বৃথাভারনা - এতার ওয়াখলল  
কর্ম্মর ব্যাঘাত অর - কিন্তু আত্মজ্ঞানে হোভা হোভানেই কর্ম্ম  
বাছেনুয়ারলে কর্ম্মর তুলো কুকর্ম্মো করতেই। কু-কর্ম্মে তোরে  
নিন্দারপাত্র করতৈ। তোর শত্রু মাহি ঐতাই। তি নিশ্চয় এহান  
না মনেইতেই। তি ধন সম্পত্তি তালকরর, মানুরে বশে থনারকা,  
জীৱনে নুঙেই ঐয়া থানারকা, বিপদ-আপদ অনায়াসে লালনিরকা।  
মানুর সহায় না পেইলে কিসাদে নুঙেই ঐতেই। চারিয়ো বারাদে  
শত্রু-বৈরী, বেড়ি-গাঠনির হাদিৎ জিনাহান বিষম ঐতৈ। তারো

## বিজ্ঞাপন

প্রথিতযশা ঔপন্যাসিক, নাট্যকার, গীতা উপনিষদর  
অনুবাদক, শ্রীহিন্দ্র কুনার সিংহর “ঈশ্বরর বাণী”

(গীতার ভাবানুবাদ)

দামঃ রূপা আকুড়িহান। “ঈশোপনিষদ” (ভাবানুবাদ)

লৈরিক এহান বিনামূল্যে বিতরণ করতারা

(প্রাপ্তিস্থান : শ্রীগোপী সিংহ, দুধপুর, কাছার)

“পূণ্যতীর্থ মণিপুর মাটি” (কবিতা সংকলন), গোলাপ  
সিংহ, দাম : রূপা পনর হান।

ডঃ স্মৃতি কুমার সিংহর সাড়ে তিন আতহপন (ছোটগল্প  
সংকলন), দাম : রূপা ৫০ হান

স্মৃতি কুমারর ছোটগল্প (সংকলন), দাম : রূপা দশহান

‘বেদের বাণী ও ধর্ম্মতত্ত্ব কথা’ সেনা সিংহ সাহিত্য ভূষণ,  
(৩৫০ পৃষ্ঠার লৈরিকহান), দাম : চিহ্ন স্বরূপ রূপা ৫ হান

‘হাকর জাল তেরা’, (কবিতা বারো এলার সংকলন),  
শ্রীনরেন্দ্র চন্দ্র সিংহ, দাম : রূপা তিনশহান  
(৪৫২ পৃষ্ঠার লৈরিক ৩০১০ হান কবিতা বারো এলা)

মণীন্দ্র কুমার’র

“নীল যমুনার পারে”

রঙীন প্রচ্ছদপট, রঙীন ফটোলো

বৃন্দাবন পরিক্রমার তথ্যবহুল

সুখপাঠ্য উপন্যাস

বৃন্দাবন পরিক্রমার মানচিত্রলো

(তীর্থ যাত্রীর সুবিধার কা)

দাম : মাত্ররূপা ৫০ হান।

কর্মর বাহু বিচারর কাউ আত্মজ্ঞান থানা থক । কিয়া বুজ্জে -  
কর্মতে কারণ-বদ্ধ । বারো কারণ বাসনা-বদ্ধ । বাসনা বারো মনে  
আবদ্ধ । মনতে দুহান - অচেতন বারো সচেতন । মনে রিপু বারো  
ইন্দ্রিয় ঘুমজিয়া থাইতারা । ষড়রিপু, একাদশ ইন্দ্রিয়, হাবিহান সং  
নাইগে । হাবিরে হজাগ করানি থকনেই । জ্ঞানদীপ পারা দীপ নেই ।  
ঐ জ্ঞান দীপল মনদীপ থালকর । মনদীপল কুপ করে চা, হারপা  
কুং রিপু হোবা, কুং রিপু শান্তি ।

হোবা সত্বরিপুয়ে বাগেইতাই কর্ম উতা কর । কর্মতে  
কর্তব্য নাই । কর্তব্যাত্ত শ্রেষ্ঠ ভাব নেই । সং ইন্দ্রিয় সং কর্মর  
বারাদে নিতৈগা । অসং ইন্দ্রিয় অসং কর্মর বারাদে নিতৈগা ।  
সং বৃত্তিলো হংকরা জগৎহানেই স্বর্গ । অসং বৃত্তিলো হংকরা  
জগৎহানেই নরক । মি তোরে মাতুরী ছন । সং জীবন আহান সং  
ভারে চলিয়া যানারকা যেহানি ধনর প্রয়োজন উহান আবশ্যক ।  
ধন যেহানি লাগের উতাৎত মিয়াম ঐলে-ধ্বংস অনিবার্য ।

‘ধনাদর্পং, দর্পাং ক্রুধং, ক্রুধাং কলহং, কলহাঙ্কংসম ।’  
ধনতে জাঙর ধূলিপারা অনিত্য বস্তু । জাঙহান বেল্লে লাগের,  
জাঙহান উঠেইলে পরের । ধনতে চঞ্চল । আকদিন তেরাং আকদিন  
মোরাং । শাস্ত্রে উহানে মাতেছি -

অর্থাঃ পাদরজোপমা, গিরিনদী বেগোপমম্ যৌরনং  
আয়ুয্যং জললোলবিন্দু চপলং ফেনৌপমং জীবিতম্ ।  
ধর্ম্যং যো ন কৰোতি নিন্দিতমতিং স্বর্গাগলোদঘাটিনং  
পশ্চাত্তাপ যুতো জরাপরিগতঃ শোকগ্নিনা দহতে ॥  
সন্তোষামৃত তৃপ্তানাং যৎসুখং শাস্ত্ৰচেতসাম্ ।

কুতস্তধনলুন্ধানামিতশ্চেতশ্চ ধাবতম্ ।

ভরদ্বাজর কথা এতা ছনিয়া কৌশিকে ঠিক নাপেইল ।

খাল করে - আজিকার একবিংশ শতাব্দীত য়েপেই মানু ধন-  
সাম্পাল ছাড়া আকতাউ না হারেপেইতারা, ধন-সাম্পাল ছাড়া  
কোন আহান কর্মই নার এহানাং আমার বিনিয় শাস্ত্রলো থাইনাকর  
বৈদিক, পৌরাণিক, সত্য, ত্রেতা, দ্বাপর যুগর আচরণ বিধি হিকানীং  
গৈগ অছে । ফঙেদে মাতের -

বিনি, মাতর কথা এতা হয়তা । কিন্তু যুগর উপযোগী  
নাইগে । কিয়া বুজ্জে - এযুগে বিদ্যালকরতে অজস্র ধনপয়সা  
লাগের । এবাকাতে খেতি বাতি, ঘর-দোয়ার সামালানিতৌ আটেল  
পয়সা লাগের । আজিকালি জিনা মানেই ধন পয়সা আমদানি  
করানি বারো খরচ করানি । তারো নাটিকার গিরক আগই মাতেছিল-

টাকাঃ স্বর্গঃ টাকাঃ ধর্ম্যঃ টাকাহিঃ পরমং তপঃ

টাকারিপ্ৰীতিমা পূর্ণে প্রিয়ন্তে সর্ব মানবাঃ ।’

এবাকা দিন আরতাউ কঠিন অছে । ধন-বারো জীবিকার সালে  
দেশ-ঘর-বারী বেলেইয়া দোয়াদে শহরে গঞ্জে বিদেশে যানা  
লাগের ।

এবাকা ‘অর্থাঃ পাদরজোপমা’ নাইগে, এবাকা অর্থঃ  
শিরো মুকুটঃ ।

রূপার নাঙ জয়রাম, রূপা ঐলে হকি কাম । এহানেই  
মস্ত । বারো বিনি এহান আগেউ আছিল । যেমন -

‘যত্ররাজা তত্র কোষো বিনা কোষান্ন রাজতা ।

স্বভৃত্যেভ্যস্ততো দদ্যাৎ কো হি দার্টুন যুধ্যতে ।’

‘ন নরস্য নরো দাসো দাসস্ত্বর্থস্য ভূপতে ।

গৌরবং লাঘবং বাপি ধনাধন নিবন্ধনম ।’

তারো বিনি লেইরিক লেইছৌ না তালকরলেউ ধনতে তাল করাগি  
লাগের । এবাকার সমাজ ব্যবস্থাত -

ব্রহ্মহা হপি নরঃ পূজ্যো যস্যার্ক্তি বিপুলং ধনম ।

শশিন স্তূল্যবংশোহপি নির্ধনঃ পরিভূয়তে ॥

মহাভারতে ব্যাসদেবে মাতেছিল -

অর্থস্য পুরুষো দাসো দাসস্ত্বর্থো ন কস্যাচিৎ ।

ইতি সত্যং মহারাজ বন্ধোহস্মার্থেন কৌরবৈঃ ॥

পিছেদে অনন্ত লিঙ্গমে যারীহান দেছিল, রেবল হিমাচল প্রদেশে  
মণ্ডিনগর ২২ মাইল দক্ষিণ-পূরে । বিপাশার দ্বিগো পার কুলুপেয়া  
কাংড়া ভেলী । বিপাশা রবি, ইরাবতীর অববাহিকার কুলুৎত রোটং  
পাস পেয়া কুলু ভেলী । রেবল, লোমব মুনির বাসভূমি । কুলু-  
কাংড়া রোটং পাস-স্পীতি ভেলী, এতা হাবি মৈনাক পর্বত বা  
পীৰ পাঞ্জাল পর্বত শ্রেণীত । শতদ্রব দক্ষিণ পারে হিমাচল  
প্রদেশের নামগিয়ালেৎত শিমলা পেয়া বিস্তৃত পার্বত্য ভূমির নাঙ  
আছিল বুশাহর রাজ্য, মহাভারতর কিন্নর দেশ ।

হারপেইলে সংগীতা, পরাশর মুনির নাঙহানলো  
এফামহানর নাঙহান পরাশর নগর অছেতা । পরাশর মুনির  
আশ্রমহান রেণুকা সরোবরর পারগৎ । পরাশর মুনি এপেই তপস্যা  
করিয়া আছিল । রেণুকা পরশুরামর মালক । পরশুরামর বাপক  
আছিলতাই জমদগ্নি মুনি । পরশুরামে বাপক জমদগ্নির আদেশে  
মালক রেণুকারে বানুক আহানলো ছেদেইয়া মারেছিল । রেণুকার  
রকত পুঁলেয়া এ সরোবর এগ অছিল তারো এ সরোবর এগরে  
রেণুকা সাগর বুলতারা । রেণুকারে নয়নাদেবী দুর্গাউ মাংতারা ।  
এপেই নয়নাদেবীর মন্দির আগৌ আছে ।

পরাশর মুনি এগ ভৃগুমুনির বংশধর । তানুর বংশহান  
মুনিঋষির বংশরমা জবর নাঙ ফিটা অছিল । ভৃগুমুনি এগ ব্রহ্মার  
পুতক । ভৃগুমুনির পুতক ঔর্ক । ঔর্কর পুতক বশিষ্ঠমুনি । মানালির  
তিনমাইল দূরেইং বশিষ্ঠ মুনির আশ্রমহান আছে । বশিষ্ঠমুনির  
পুতক ঐলতাই শক্তি । শক্তির পুতক পরাশর । পরাশর মুনির  
ঔরবে মৎসগন্ধার গর্ভে জরম অছিল ব্যাসদেব । কৃষ্ণদ্বৈপায়ন  
বেদব্যাস । ব্যাসদেবে পয়লা তক্ষশীলার কাদাৎ সরস্বতীর পারে  
আশ্রম পাতেছিল । পিছেদে অলকনন্দার পারে বদরিকাশ্রমে আশ্রম  
পাতেছিলগা । মৎসগন্ধারে পরাশরে হাদাপেয়া পদ্মগন্ধা সত্যবতী  
নাঙদেছিল । সত্যবতী মাছুয়া দাস রাজার নিঙলগ আছিল । ভীষ্ম  
বাপক শান্তনুরকা তেইরে নিয়া বাপকরাং বিয়া দেছিল । ব্যাসদেব  
জরম অছিল উপেয় মৎসগন্ধা (সত্যবতী)র বিয়া নাছিল । এ



ব্যাসদেবে বদরিকাশ্রমে বেদহানরে চারিভাগে ভাগ করেছিল। মহাভারত বারো গীতাহান লেঙকরেছিল। মহাভারতে ৬০ লক্ষ শ্লোক আছিল। উতার ৩০ লক্ষ শ্লোক নারদে স্বৰ্গলোকে পাকড়িয়া ছুয়াছিল। ১৪ লক্ষ শ্লোক শুকদেবে গন্ধৰ্বলোকে পাকড়িয়া ছুয়াছিল। ১লক্ষ শ্লোক বৈশম্পায়নে মৈত্ৰলোকে জন্মেজয়রে ছুয়াছিল। শুকদেব এগ ব্যাসদেবর পুতক। চারিবেদ, মহাভারত বারো গীতা লেংকরিয়া ব্যাসদেব ভারতভূম তথা পৃথিবীং অমর ঐয়া থাইল। মণির ১৫ মাইল দক্ষিণ পশ্চিমে সুরিন্দর নগরে শুকদেবর আশ্রমহান আছে। ব্যাসদেব মালক অদৃশ্যস্তির গর্ভে বারো বছর থাইয়া বেদ পাকরেছিল বারো শুকদেবৌ ষোলবছর মালকর গর্ভে থাইয়া বেদ পাঠ করিয়া আছিল। এসাদে পুণ্যাত্মা দেবতুলা ঋষি মাহি এপেই আশ্রম পাতিয়া আছিল। আরো এফাম এহানরে দেবভূম বুলতরাত। কৌশিকর এমস্বিধ কথা ছানীর পিছে ভরদ্বাজ কোন উচ্চবাচ্য না করিয়া বহেছিল ফামেংতে উঠিয়া গিয়া রেণুকা সাগরর পারগং গিয়া বহেছিলগা।

মোরতা অরশ্যে দেবভূমি চানার কোন খৌরাং নেয়ছিল। চাকুরীর সময় তিনবছর মানালীত আছিল। ঔ সময় বুলে বুলে এ অঞ্চল চাছিল। হৈমবন্ত পর্বত মালা বা হিমালয় পর্বত শ্রেণীর উত্তরে গ্রেট কারাকোরাম রেঞ্জের, তার লগ লাগিয়া লাডাখ রেঞ্জ, দক্ষিণে পীর-পাঞ্জল জাসকর পর্বত মালা ধাওলাগিরি, খানি উত্তর পূর্বে কৈলাস পর্বত মালা, তার খানিগজে তিব্বত মালভূমি, তার দক্ষিণে মানস সরোবর। বিশেষ করে পীর পাঞ্জাল পর্বত শ্রেণীমালা, ধাওলাগিরি পর্বত শ্রেণীমালা, কৈলাস পর্বত শ্রেণীমালা বারো শিবালিক পর্বত মালা এহানির ভিতরে আছে আমার দেবভূমি। বৈদিক যুগর হিমগিরি বা হিমবন্ত পৌরাণিক যুগর মৈনাক পর্বত, বহলীক পর্বত, নৈমিষকানন, কৈলাস পর্বত, অপসরা পর্বত আদি। এপেইতেই আছে দেবলোক, পিতৃলোক, গন্ধৰ্বলোক, যক্ষদেশ, কিন্নরদেশ, মায়াকানন। এহানাতেই আছে বশিষ্ঠাশ্রম, ব্যাসদেবর আশ্রম, শুকদেবর আশ্রম, পরাশর মুনির আশ্রম। বিশ্বমানব সমাজর জাগতিক উন্নতির কাজে তপস্যা করিয়া ঔ তপস্যার ফল মহাকাব্যাকারে ইকরিয়া গেছিগা। এহানরে দেবভূম মাতানিহান ভুল নাথাইব। উতারমা প্রাকৃতিক দৃশ্যতৌ এ উপত্যকার সাদানে নয়ন-মন-চরকারা ফাম পৃথিবীং বিরল। খানি আহান জিরণ লৈয়া অনন্ত লিঙ্গমে বারো মাতানি অকরল -

- তুমি আচরিং অথাইবাই। এবেদে দেবভূম বুলতারা বারো এপেই জিপুতে মালকৌ ছেদেইয়া মারতারা। এহান কিসাদে দেবভূম য়েপেই আসূরিক কৰ্ম অর।

সংগীতায় কৌশিকে একবাক্যে মাংলো - কিসাদে আচরিত নানি। স্বয়ং ভগবানর অবতার বুলতারা পরশুরাম দৈর্ঘ্য, অহিংসা, শান্তির প্রতিমূর্তি বশিষ্ঠ মুনির শিষ্য (বশিষ্ঠ মুনিরাং কাড়-ধেনুর বিদ্যা তামকরেছিল) ঐয়াউ মালকরে বানুকহানলো ছেদাছিল উতার গজে একুশ খুরম পৃথিবীহানাংত ক্ষত্রিয় নিম্নল

করেছিল।

অনন্তলিঙ্গমে মাতেছিল - উহানতে পিতৃবাক্য লঙঘন করানি মহাপাপ তারো পিতৃ আজ্ঞা পালন করানিরকা করেছিলতা। আমার শাস্ত্রে আছে -

পিতা স্বর্গঃ পিতা ধর্মঃ পিতাহি পরমং তপ।

পিতরি প্রীতিমা পূর্ণে প্রিয়ন্তে সর্ব দেবতাঃ ॥

জগদগ্নির গিথানক রেণুকার তাউ দোষ আছিল। তর্পন সলকরাগিরকা বিন্দু সরোবরেংত পানীফুটী আনানীরকা গৃহিনী রেণুকারে জমদগ্নিয়ে মাতেছিল। রেণুকা বিন্দু সরোবরে গিয়া ঘৃতাচীরে চেইয়া বিভূলা ঐয়া আছিল। পানীলো আহিতে ডিলছিল। তর্পন সলকরানি নাছিল, হানতে ছৌয়েয়া পুতক পরশুরামরেল কাম এহান করুয়াছিল। জেঠাজেঠী জিপুং চারিয়োগীয়ে মাতৃবধ পাপে না পরতাজাই বুলিয়া পিতৃবাক্য লঙঘন করেছিল। হাবির খুলা পুতক পরশুরামে পিতৃবাক্য খেতেগা বেইবনী চারিয়োগীরে বারো মালকরে, আতে ধরেছিল বামুকহানলো

## বিজ্ঞাপন

### পাকড়িক -

প্রথিতযশা সাহিত্যিক শ্রীব্রজেন্দ্র কুমার সিংহর 'সুদর্শন চক্র'

(ব্যঙ্গ হাস্যরসর যারীর লেরিক)

দাম : রূপা আককুড়ি দশহান।

পুংলল (কবিতা সংকলন), দাম : রূপা দশহান

জার্নাল (ফিচার), দাম : রূপা আককুড়ি দশহান

জিনজিনি (চৌপদী), দাম : রূপা দশহান

সিকাডেইনি (ছরকাংয়ারী সংকলন)

দাম : রূপা আককুরি হান

বিষ্ণুপ্রিয়া মণিপুরী ছন্দপরিচয় (কবিতা ছন্দ কিসাদে করে

হিকানি-গরেষণামূলক লেরিক), দাম : রূপা তিনকুড়ি হান)

টোনাটিং (ব্যঙ্গহাস্যরসর কবিতা সংকলন)

দাম : রূপা দশহান।

মেইকেই (নাটক), দাম : রূপা আটহান

পানার ফাম : অপরূপা অফিস, গৌহাটি এডওয়ার্ড

অফিস, গৌহাটি

ডঃ স্মৃতিকুমার সিংহ, তেজপুর

সন্তোষ সিংহ, হিংগালা

অশ্বিনী কলাকেন্দ্র, বারোমুনী।

### বিষ্ণুপ্রিয়া মণিপুরীর ফুতিফালি

উন্নত মানর ফুতি ফালি পানা মনেইলে যোগযোগ করিক -

Mobile No. 94353 70762, 94352 32707

Phone : 03844 222935

ছেদেইয়া মারেছিল। পিছেদে পিতৃবরে বেইবুনিগী বারো মালক জিংতা অছিল। কিন্তু বানুকহান মাতৃবধ পাপে আতেতত ছুটা নুয়ারেছিল। নানা তীর্থ বুলিয়া পিছেদে কোশল নগরে বিষ্ণুশা বানমউগর পরামর্শে ব্রহ্মহুদে হিনেয়া তার আতেতত বানুকহান পড়েছিল। সংগীতায় আঙকরেছিলী - রেগুকার কিহান দোষ আছিল। খানি মানি ডিলছিলী - এহান নাই।

অনন্ত লিঙ্গমে মাতেছিল - বিন্দুরোবরে গিয়া পানী আনতে ডিলনীয়ে স্বাভাবিক কারণে জমদগ্নি রেগুকার গজে নুঙেই নাছিল -

দুষ্টাভার্যা শঠং মিত্রং ভৃত্য শ্চেত্তরদায়কঃ।

সসর্পেচ গৃহে বাসো মৃত্যুরেব ন সংশয়ঃ।

সংগীতায় মাতেছিলী - পানী আনতে ডিলছিলী উহানেই কি হবা নেই স্ত্রী অনার কারণ। এহান থকনাছে কথাহান।

অনন্তলিঙ্গমে মাতেছিল -

আহারো দ্বিগুণঃ স্ত্রীনাং বুদ্ধিস্তায়াং চতুর্গুণা।

ষড়গুণো ব্যবসায়শ্চ কামশ্চাষ্ট গুণঃ স্মৃতঃ।

নারীচরিত্রহানেই প্রায়ক্ষেত্রেই এসাদে হানতে কার্যকারণেত্ত খানি আহান খেয়েলে মূনির মনে খালআহান হমার। যেমন মাতেছি - ন তাদৃশীং প্রীতিমুপৈতি নারী, বিচিত্র শয্যাং শয়িতাপি কামম্।

যথা হি দুর্ব্বদি বিকির্ণ ভূমৌ প্রযাতি মৌখ্যং পরকাস্তসঙ্গাৎ।।

নারী চরিত্র বিশেষজ্ঞই আরাকৌ মাতেছি -

ন দানেন ন মানেন নার্জবেন ন সেবয়া

ন শত্রেণ ন শাস্ত্রেণ সর্ব্বথা বিষমা স্ত্রিয়ঃ

ন সা ভার্যোতি বক্তব্য্য যয্যাং ভর্ত্তা ন তুষ্যতি।

গৃহীণীর আচরণে জমদগ্নি তুষ্ট নাইল হানতে কিসাদে রেগুকারে যাকরত?

অসত্যং সাহসং মায়া মাৎসর্য্যং চাতিলুপ্ততা।

নির্গুণহম শৌচত্বং স্ত্রীনাং দোষা স্বভাবজা।।

পানীসিটা আনতেগা কিয়াকা ডিলছিল? ঘৃতাচীরে চেইয়া বিভূলা অছিলী, এ সত্য কথাহান তেই কিয়া মাতে নুয়ারেছিলী? মাংলেউ দোষজ্ঞান, নাউ ঐলৈছ। কারণ বিয়াঅছি মোয়েইয়ে পরপুরুষর রূপে মুগ্ধ অনাহান দুশ্চরিত্র নারীর লক্ষণ হান -

রাজা কুলবধুঃ বিপ্রা মন্ত্ৰিগণশ্চ পয়োধরা।

স্থানভ্রষ্টা নি শোভন্তে দস্তাঃ কেশ নখা নরাঃ।

স্থানভ্রষ্টা কুলবধুর কিহান বা থার মান ইজ্জৎ। নারীর মন পদ্মপত্রে জল বুলিয়া চতীদাসেউ মাতেছে। চাগকায়তে বহু কথাই মাতেছে

ন স্ত্রীনাংপ্রিয়ং কশ্চিৎ প্রিয় বাপি ন বিদ্যতে।

গাব স্তৃণমিবারণ্যে প্রার্থয়ন্তি নবং নবম।।

পানং দুর্জন সংসর্গঃ পত্যাচত বিবহোহটম।

স্বপ্নশ্চান্য গৃহে বাসো নারীনাং দুখনানি ষট্।

স্বাতন্ত্র্যং পিতৃমন্দিরে নিবসতির্বাভ্রোৎসবে সঙ্গতি

গোষ্ঠীপুরুষসন্নিধাবনিয়েমো বাসো বিদেশে তথা।

সংসর্গঃ সহ পুংশ্চলীভিরসকৃদ্ব্তের্নি জায়াঃ ক্ষতিঃ

পত্যুর্বার্ধ কর্মীর্ষিতং প্রবসনং নাশস্য হেতুঃ স্ত্রিয়াঃ।।

সংগীতায় মাতেছিলী -

এ কথা এতাত হায়তা। অতি স্বাধীনতা, বিয়ার পিছেদে মালক বাপকর ঘরে মিয়ামদিন থানা, মেল, সভা-সমিতি, উৎসবে মূনির তুল গলগলানি, বিদেশে অনাস্থীয়র লগে থানা, দুশ্চরিত্রা জেলেইর তুলো থানা, নিজর কর্মনাশ, নিজ স্বামীর সমালোচনা, হেয়জ্ঞান, হিংসা এতা স্ত্রীচরিত্র নাশ করে। কিন্তু রেগুকারতাতে উসাদে নাছিল নাই। কিয়াকা তারে চরম শাস্তি দিলতা।

অনন্ত লিঙ্গমে মাতের - কথাতে এহান নাইগে নাই। তর্পন পারা দেব কর্মহান গৃহীণীগর সালে অসম্পন্ন ঐল হানতে ধর্ম-কর্ম্যে ব্যাঘাত ঐলনাই। যে গৃহীণীগর তার স্বামীরে দৈব কর্ম্যে, ধর্ম্যে কর্ম্যে সহায় না করে ঐ গৃহীণীগলো তা কিহান করত। উতারমা পুরুষ চরিত্র বহুক্ষেত্রে স্ত্রীচরিত্রে সন্দিহানৌ অর।

শশিনীব হিমার্তনং ঘর্ম্মার্তানাং রবাবিব।

মনো ন রমতে স্ত্রীনাং জরাজীর্নোদ্ভ্রিয়ে পতৌ।।

এহানাং অনন্তলিঙ্গমে যারী আহান দিল -

গৌড়দেশে কৌশাস্থী নগরে চন্দন দাস বুলিয়া ধনবান মহাজন আগ আছিল। তার বয়স পড়ানি অকরেছিল। কিন্তু তার কামনা বাসনার অন্ত নেয়ছিল। ধনমদেমন্ত চন্দন দাস লীলাবতী নাঙ্গর পরমা সুন্দরী ভরাভাদর মাহার যৌবনবতী নুঙেইপা কারবারী আগর নিঙলগারে বিয়া করেছিল। কামদেবর বিজয় বৈজন্তী ধ্বজর সাদানে যৌবনবতী লীলাবতী বুড়া চন্দন দাসর তুলো থানাহান নুঙেই না পেইলী। জার জবর পেইতার মানু যেসাদে জোনাকর মিঙালে নুঙেই না পেইতার, অলাঙ হীনপেইতার মানু যেসাদে রৈদর তাপহান না মনেইতার উসাদে মৌ-পুরী জেলেইয়ৌ বুড়া-জরা হেই নাউ মনেইতার। লীলাবতীযৌ উসাদে চন্দন দাসরেল তৃপ্তী নাছিলী। চন্দনদাস কিন্তু লীলাবতীরে আহির থংমেইহান পারাক খালকরিয়া থছিল। মিনিট আহান মিচ্ছিলেত্ত থেয়নি নাদেছিল। অতৃপ্ত লীলাবতী কুল মর্য্যদা ধন-দৌলৎ বিসর্জন দিয়া আরাক গাভুরা পোয়া ধনবান কারবারী আগর তুলো চরেদে প্রেম-পীড়িতি করিয়া থাইলী।

আকদিন লীলাবতী গাভুরা পোরাশৌ ঔগর তুল হোনার পালঙে জোনাকর সাদানে ফামে আরদিনকার ডেকি লাল বিলাস করিয়া থাইতে চন্দন দাস আহে পড়িলগা। লীলাবতীয়ে গাভুরা পোরা শৌ উগরে ফামহানাংত ঠেলা দিয়া বেলেইয়া বুড়া চন্দন দাসরে চুলে মুরে দ্বিআতল ধরিয়া মেইথঙে ঘাড়ে অতি খৌরাং



দেহুয়েইয়া চুমা দেনা অকরলী। ও সুরাকে চরর মুনি উগ নিকুলিয়া গেলগা।

সংগীতায় যারীহান হনিয়া মাতেছিলী -

- এতা গুটিং আকেইহান অর। মি মাতিং বুন্নেতে বুড়া এগয় ভর যুবতী, লীলাবতীর সাদানে পরমা সুন্দরী নিঙল আগরে বিয়া করানি থক নাছিল। চানকো মাতেছিল -

দুরধীতা বিষং বিদ্যা অজীর্ণে ভোজনং বিষম।

বিষং গোষ্ঠী দরিদ্রস্য বৃদ্ধস্য তরুণী বিষম।।

অধ্যয়ন না করের উগরাঙ বিদ্যা, হজমশক্তি নেই মানুরতা ভোজন, লেইরাপা আগরতা খাকুরা পাল আহান, বুড়া আগরাং যুবতী বিয়া, এতা বিড়ম্বনা মাত্র নাগৈতা? চাণক্যয় সাবধান করলেউ মানুষে কান নাউ দিতারা। কিন্তু চাণক্যর কতহান নীতি শ্লোক সর্বদা মানানী হীন। যেমন -

নদীনাং শস্ত্রপানীনাং নখিনাং শৃঙ্গিনাং তথা

বিশাসো নৈব কর্তব্যঃ স্ত্রীষু রাজকুলেষু চ।।

এহান এলেতে মানুহ ঘাটে নাউ লামতাই। ঘাটর পারে ঘরবাড়ী নাউ হংকরতাই। মেকুর, কুকুর, গরু, মইচ, নাউ পালতাই। দেহরক্ষী বুলিয়া খুচু খুন্নেই ধারী প্রহরী নাউ থৈতাই। বিয়াসাদী নাউ করতাই। রাজ কর্মচারী রাজাদেশে নাউ থাইতাই। কিন্তু কথা আহান খালকরাগির মত যেমন- রেণুকারে নয়না দেবী, দুর্গা বুলিয়া পূজা করানিহান। গিধানক যদি ছত্ৰুমে করেউ হোবা নাইলি এইছ, সশচরিত্র নাইলি এইছ, দেবী বুলিয়া মানুষে পূজা নাউ করলা এইছ। হানুতে মি মাতানি মনাউরীহান - জমদগ্নি মুনি ধীর স্থির বুদ্ধির মুনিগ নাছিল। বরঞ্চ তকাতাঙ মানুষ আছিল। তারো কিস্তাউ নেই হরকাং কথাহানাং খানিগ্নালেইলেক এলী বুলিয়া এতাপারা গৃহিণী আগরে আকতাউ খাল না করিয়া খালপালহানে জাতেয়া মারে বেলাছিল। পিছেদে অপরাধী মনে অনুতাপ আহিলে বরদিয়া জিংতা করেছিলতা। স্ত্রীচরিত্র যেহানী আপনে মাংলাং এতাউ সর্বদা প্রযোজ্য নাইগে। স্থান-কাল-পাত্র ভেদে কাচিং শতেক হাজারর গুটে আকেইহান দেহাদের উহানল সর্বসাধারণে সর্বদা প্রযোজ্য নাইগে। দুষচরিত্রা নিঙলপী, ইমা-ইন্দোল হুন্দা নাইগে, দুষচরিত্র মুনিশৌ, গাভুরা পুয়েই, মুনি মানুষৌ পদে পদে কু-কর্মর ফল ভোগ করতারা। যেতাউ অক ছচিয়ার এয়া থানা হোবা।

কথা টটরতে টটরতে খানার সময় অছিল। কৌশিকে হাবিরে রাতিকার আহাররকা উঠেইল, বারো বাগেইল - হরিয়ানা টুরিষ্ট ডেভেলপমেন্ট করপোরেশনর বাসহানাং পাঁচহান সীট বুক আছে। বিয়ান ৭ বাজিৎ দেবভূম দর্শন যাত্রার কা মণ্ডিৎত বাসহান সালৈতে। মি কাংড়াৎত লাছয়াল-স্পীতিভেলী রোটাং পাস এতার পরিচয় আহান দেখিলু -

- কাংড়াৎত বিপাশার পারগী ইলৈয়া উত্তর পূবেদে ধাওলাগিরিমালার তলে তলে দীঘল কাংড়া ভেলী কুলুং গিয়া লমছে। কুলুৎত মানালী পেয়া ৩২ মাইল দীঘল কুলুভেলী।

কুলুৎত পূবেদে ১৩ মাইল গেলেগা রোটাং গিরি পথ পার এলে লাছয়াল স্পীতি ভেলী। লাছয়াল স্পীতি ভেলীৎত ৩৫/৪০ মাইল পূবেদে ডাংকার সুমেরু গিরিপথ। এপথে তিব্বত চীন যানা যাকরের। শতদ্রর দক্ষিণ পারে বিলাস পুরেৎত উত্তরেদে শিমলা, রামপুর এয়া উত্তর পূবেদে কল্লী, হোরকাঙ কৈলাস, অপসরা পর্বত বাম্পাভেলী এয়া নামগিয়াল - শিপকী গিরিপথেদেউ চীনা তিব্বত যানা যাকরের। দ্বারকার শ্রীকৃষ্ণ, বৈকুণ্ঠর বিষু, স্বর্গর ইন্দ্র, বরুণ, অগ্নি, ছাড়া ব্রহ্মারাংত চিং করিয়া হর-পার্বতী, কালী, হনুমান, কুবের, যক্ষ-কিন্নর, দৌ-দুক এতা লোমশ, পরাশর, ব্যাসদেব, শুকদেব এ মুনিষবি এতা এ অঞ্চল এগৎ বাস করেছিতা।

- হিমাচল প্রদেশর ঘাট - শতদ্র, তিব্বত কৈলাসে মানস-সরোবরর কাদাকাডিংত নিকুলিয়া হিমাচল প্রদেশ, পাঞ্জাব এয়া পাকিস্থানে চন্দ্রভাগার তুল তিলৈয়া সিদ্ধু মহানদীং পড়েছেগা। বিপাশা, লাছয়াল-স্পীতি ভেলীৎত নিকুলিয়া পাঞ্জাব প্রদেশে শতদ্রর তুল তিলছেগা। ইরাবতী, কুলুভেলীৎত নিকুলিয়া পাঞ্জাব জম্মু-কাশ্মীর সীমাগদে এয়া পাঞ্জাব-পাকিস্থান সীমা ছকৈয়া পাকিস্থানে চন্দ্রভাগার তুল তিলছেগা। চন্দ্রভাগা, লাছয়াল স্পীতি ভেলীৎত নিকুলিয়া হিমাচল, উত্তর-পশ্চিমে জম্মু-কাশ্মীর এয়া পাকিস্থানে বিলাম ঘাটহানর তুল তিলছেগা।

- শিপকী, নামগিয়াল, কলপী, রামপুর, বিলাসপুর, আনন্দপুর সাহেব, লুধিয়ানা ফিরোজপুর বারো ফাজিলকা হরকাঙ কৈলাস, অপসরা পর্বত, মেঘপর্বত (বাম্পা) শৃঙ্গার মহেশ্বর, ভীমকালী পর্বত, চণ্ডিকা পর্বত, মহেশ পর্বত, কামরুণ রাজ্য এতাহবি শতদ্রর দক্ষিণপারে, যেহানরে বুশাহর রাজ্য বা কিন্নর দেশ বুলতারা। কিন্নর রাজ্যে বৌ-বানা জবর। কামরুণ এহান উষা-অনিরুদ্ধর দেশ আছিল। কিন্নর দেশে যক্ষরাজ কুবেরর রাজ্য আছিল। খানি উত্তর-পূর্বে শিবরাজ গিরি শৃঙ্গলোক। এহানরে স্বর্গ-দোয়ার বুলতারা। খানি দক্ষিণ পশ্চিমে অপসরা পর্বত/পরী পর্বত। এহানর যোজন আহান গজেদে অমরবতী বা ইন্দ্রপুরী বা স্বর্গরাজ্য। ভারত-তিব্বত রোড শিমলাৎত রামপুর কামরুণ, ওয়াংটু, সাযহান, নামগিয়াল এয়া শিপকী গিরিপথেদে চীনে যানা যাকরের -

- আইব কালি আমি দবভূম দর্শন করতাঙাই। কপাল হোবা এয়া বরগ নাইলে রোটাং পাস লাল পারতাঙাই। মানালীৎত পথ-ঘাট হাবি বরফে গুড়িয়া থার। গাড়ীরকা ড্রেজারল পথ সেঙকরতারা। মানুতে বরফর গজেদে আটিয়া যিতা রাগা। হাবিরে গরম ফুতি, কালা চশমা লনারকা মাতেছিলু।

দিনহান হাবি কালা-চশমা পিদিয়া থানা লাগাই। বরফর গজে রৈদর মিঙাল পড়িয়া ঝরক ঝরক করিয়া আহি মিচ্চিলার। আহিগী খারাপ অনার সম্ভাবনা মিয়াম। রোটাং পাসে প্রায়েই বৌ-বানা জবর অর। হঠাৎ মেঘালা অর। ও মেঘালা বারো বৌ-



বানায় বরফর বরণ দিয়া মানুষ দিশাহারা এয়া পথ মাটুতারা।  
এহানেই হয়ত বৈকুণ্ঠধাম। স্বর্গহান। হয়ত এহানেই কুলু বারো  
মানালীরে দেবভূম বলেছি।

পরশর নগরেত আমি সুরিন্দর নগরে গেলাংগা।  
সুরিন্দর নগরে আমি শুকদেব মূনির আশ্রমদেখলাঙ। পরশর  
নগরেত সুরিন্দর নগর ১০ মাইল দক্ষিণে। সুরিন্দর নগরেত  
আরাকৌ ১০-১২ মাইল দক্ষিণে বিলাসপুরে গেলাংগা।  
বিলাসপুরে ভাকড়া-ডেম বারো গোবিন্দ সাগর, আনন্দপুর সাহেব  
দেহিয়া হোসিয়ার পুর এয়া যোগিন্দর নগরে গেলাংগা। উবাকা  
সেদ্ধা অছিল। শতদ্রুহানাং বাঁধগ দিয়া (পৃথিবীর হাবিস্ত উচ  
বাঁধ) সুরেঙ্গেদে পানী যোগিন্দর নগরে বিপাশাং এড়েদেছি।  
টেঙারার গজে অছেতায়, বিজুলীবাতির মিঙালে সেদ্ধাকার  
যোগিন্দর নগর ইন্দ্রপুরী মালছে। ভাকরা ডেম হংকরতে গোবিন্দ  
সাগরে বুড়েছিলা, বিলাসপুর বারো কাদাবারার হাবি মানুষে  
যোগিন্দর নগরে বসতি দেছি। আমি সেন্দা ৭-৭.৩০ বাজিৎ  
মণ্ডিশহরে আইয়া ফৌয়েলাঙ। ওঁরাতি আমি ফরেষ্টর রেষ্ট হাউস  
আগং থাইলাঙ। ওঁদিন গাড়ীয়ে রারো আটিয়া হাবিতায় প্রায়  
৬৫/৭০ মাইল বলেছিলাঙ। কিন্তু গাড়ীং হীনহান না পকছিল।  
নুয়া নুয়া ফাম বারো কাংড়া ভেলীর মনোরম প্রাকৃতিক দৃশ্য,  
পাহাড়ী বৌ-বানা, কাংড়া ভেলীর নুঙেই লাগা ইঙহানে, হোনার  
আপেল, পলার চেবী, হিমালয়ান রাপস বেরীয়ে আমারে  
তেজীয়ান করিয়া থছিল। ভাত-পানী খেয়া বাংলাগোর ফায়ার  
প্লেসর চারিয় বারাদে দেওদারর আরাম চেয়ারে ঘুম নাহেছিল  
পেয়া হাবিহান বহেছিলাঙ। অনন্ত লিঙ্গমে যারী আহান দেছিল-

- মণ্ডি, কুলু মণিকরণ চেইয়া আইব কালী আমি

মানালীং থাইতাঙাইগা। মানালী জওয়াহরলাল নেহেরুর অতি  
প্রিয় ফামহান। প্রায়েই সময় পেইলে এপেই আইয়া আছিলহা।  
তার আনা-যানার সালে ভুন্টরে এরোপ্লেনর উঠালামার ফাম  
আহান করেছিলা। লাল বাহাদুর শাস্ত্রী, অটল বিহারী বাজপেয়ী  
এপেই আহেছিলা। মানালীর ৩ মাইল দূরৈৎ বশিষ্ঠ মূনির আশ্রম।  
এআশ্রমে পরশর মুন্যৌ জরম অছিল। পরশর মূনি ছৌয়েয়া  
মানালী বেলেইয়া রেবল সায়েরে রেগুকা সরোবরর পারে আশ্রম  
পাতেছিলাগা। কারণৌ আছিল -

বশিষ্ঠ মূনি এলতাই পরশর মূনির বপাক। বশিষ্ঠাশ্রমে  
কান্যকুব্জরাজকুমার বিশ্বামিত্র মৃগয়াং আইয়া সৈন্যসামন্তলো  
অতিথি ঠেকেছিল। বশিষ্ঠাদেশে সুরভিয়ে অতিথি আপ্যায়ন  
করেছিল। বিয়ানে সুরভিরে জোড়ে নেনা মনেইলে সুরভিয়ে  
বিশ্বামিত্রের যুদ্ধে হারেইয়া বশিষ্ঠাশ্রমে আছিল। রাজকুমার  
বিশ্বামিত্র এ অপমান সহে নুয়ারিয়া বশিষ্ঠর গজে প্রতিশোধ নেনা  
মনেইয়া ব্রহ্মশক্তি পানারকা ব্রহ্মার তপ করিয়া ব্রহ্মশক্তি পেইয়া  
ক্রিয় মূনিঋষি অছিল।

কল্মাসপদ রাজার যজ্ঞহান বশিষ্ঠ মুন্যে করাগি নারতৈ

হারপেইয়া রাজায় বিশ্বামিত্রের যজ্ঞহান করাগিরকা দেছিল। রাজা  
কল্মাস পদ বারো বিশ্বামিত্র যজ্ঞকরাং জিতেগা পথে বশিষ্ঠর  
পুতক শক্তিয়ে অকনা অছিল। শক্তির তুলৌ বিশ্বামিত্রের কৌলী  
আছিল। কল্মাসপদে উহানে, পাইজন আগলো শক্তিরে বারাছিল।  
শক্তিয়ে শৌয়েয়া রাজা কল্মাসপাদরে 'নিশাচর এয়া মাউ-মাংস  
খেয়া থাক' বুলিয়া শাপ দেছিল। সুরাকহান দেহিয়া বিশ্বামিত্র  
মুন্যে রাজার গারীগং নিশাচর রাক্ষস আগ বরা দেছিল। রাজা-  
রাক্ষস উগয় বশিষ্ঠর পুতক শক্তিরে থা বেলল। উসাদে বশিষ্ঠর  
১০০গ জিপুং থা দিল। উবাকা শক্তির মালক অদৃশ্যান্তিরবগর্ভে  
পরশর মূনি আছিল। রাক্ষসগয় অদৃশ্যান্তিরে থানাং আইলে বশিষ্ঠয়  
কমণ্ডলুর পানী ছিটেইয়া রাক্ষস উগরে বারো কল্মাসপদ রাজা  
হংকরল। পরশর জরম এয়া, রাক্ষসে তার বাপক খুরতাক-  
জেড়তাক ১০০ গ হাবিরে খাছি হারপেয়া বশিষ্ঠাশ্রমে রাক্ষস  
নিধন যজ্ঞ অকরিয়া বহু রাক্ষস মারেছিল। বাপক বশিষ্ঠয় যজ্ঞ  
নিবৃতি করাগির উপদেশ দিলে পরশরে না করিয়া বশিষ্ঠাশ্রম  
বেলেইয়া রেবলে রেগুকা সরোবরর পারে আশ্রম পাতিয়া তপস্যা  
করিয়া আছিলগা।

পরশরর পুতক ব্যাসদেবৌ পরশর আশ্রম এড়েদিয়া  
তক্ষশিলাং দ্রিশাদবতীত সরস্বতীর পারে আশ্রম পাতেছিলাগা।  
পিছেদে জাহ্নবীর পারে বদরিকাশ্রমে আইয়া আশ্রম পাতেছিল।

যারীহান হুনিয়া কৌশিকে মাতেছিল - দেবভূমে,  
ঋষিমুনি এতারাং হিংসা নিন্দা কৌলীগালি, পরনারী,  
পররাজ্যলোভ জবর অছিল। কিসাদে এয়াতে এতারে মূনিঋষি  
বুলেছিলা। হিংসা নিন্দাশ্রল এহানরেউবা কিসাদে দেবভূমি আখ্যা  
দেছি।

অনন্ত লিঙ্গমে মাতেছিল -

“অবশ্যান্তাবিনো ভাবা ভবন্তি মহতামপি

নগ্নত্বং নীলকণ্ঠস্য মহাহিশয়নং হরে।”

অবশ্যান্তাবী বিষয় মহৎ মানুরাঙেই ঘটেব। উহানে নীলকণ্ঠ শিব  
দিগম্বর থার ভগবান শ্রীহরি মহাহরপে (অনন্ত নাগ) শয়ন করেব।  
এতাতে দ্যৌ-দুক, মূনিঋষির কর্ম্ম। অনাচার, অসত্য, অধর্ম দূরৈৎ  
করাগি তালকরিয়া করেছিলাত। উসাদে করে পাপ-সন্তাপ অনাচার  
নির্মূল করেছি আরোহে দেবভূম অছেতা নাই। এহানি মাতিয়া  
অনন্ত লিঙ্গম বহেছিল ফামেৎত উঠিয়া গেছিলগা।

পিছেকার দিন বিয়ান ৭ বাজিৎ আমি মণ্ডিত্ত বাসে  
নিকুললাঙ। মণ্ডি পুরাণা হিমাচল প্রদেশর মণ্ডি রাজ্যর রাজধানী  
আছিল। বিপাশার দক্ষিণ পারে মণ্ডিরে হিমাচলর 'বারণগ' বুলতারা।  
ত্রিলোকনাথ ভূতনাথ বারো শ্যামকালীর মন্দির দেখলাঙ। মণ্ডিত্ত  
নানা পথ নানাফামে গেছেগা। যোগিন্দর নগর এয়া পাঠানকোট,  
শিমলা এয়া চণ্ডিগড় দিল্লী। বিলাসপুর, লুধিয়ানা এয়া অমৃতসর।  
কুলু মানালী কেলং। কুলু মানালী রোটাং লাহয়াল স্পীতি রামপুর  
বাঙ্গা কল্লী এয়া নামগিয়াল তিব্বত।

বেলী ১০ বাজিৎ মণ্ডি বাজারে হমেইয়া আপেল, পীচ, চেরী, রাস্পবেরী, কলা বারো পরোঠা রুটী কিতা-কাতা লৈয়া কুলুয়েদে ছালৈনাঙ। শতদ্রহান লালৈয়া শতদ্রহ উত্তর পারেদে গাড়ীহান যানা অকরল। পথর বাতর বারাদে শতদ্রহ পার পেয়া মান্না ফাম। উতাং আপেল, চেরী এতার বাগান পথর বাঙ্গদে পর্বত। মণ্ডিৎত কুলু ৪০ মাইল পথ। মণ্ডি-কুলু এতা কিল্লর দেশে কুলু অতিহোভা 'হিল স্টেশন'। হাজার হাজার মানু কুলুশহরে বুলান্ আহিতারা। কুলুরে দেবভূমি বুলতারা। হোনার রঘুনাথজী মন্দির, রাজবাড়ী, মহাদেব মন্দির, শর্বরী বরনা, ধর্মগঙ্গা, পার্বতী গঙ্গা, পাণ্ডব-পুল, পাণ্ডবর খেতি, ব্রহ্ম সরোবর, রসকুণ্ড, রূপার খনি, ভূষ্ঠাৰ 'এয়ার স্ট্রিপ' মনি করণ, উষ্ণ প্রস্রবন এতা চেয়া আমি নাগর শহরে ফৌওছিলাংগা প্রায় সেন্দাসেন্দাং।

কুলুর হাবিরগজর দৌগা শ্রীরাম। হোনাংল হংকরেছিগ। ধর্মরাজে পঞ্চপাণ্ডবেরে পরীক্ষা করানিরকা যে সরোবরগ হংকরেছিল উহানাৎত নিকুলেছে ঘাট গঙ্গা। এপেই পার্বতী নাঙহানলো বৈয়া চলেছে বুলনা, পাণ্ডব পুলউহান পঞ্চপাণ্ডবে স্বর্গারোহণে যানার সময় পার্বতী গঙ্গা হানর গজে হংকরেছিল পুলহান। পার্বতী উৎপতাকাং পাণ্ডবে ধানখেতি করেছিল ফাম উহানরে ধানখেতি বুলেছি। হরেন্দ্র পর্বত (হরি পর্বত)র ব্রহ্মসরোবরেও আহেছে ব্রহ্মগঙ্গা। ব্রহ্মসরোবর পারে ব্রহ্মায় তপস্যা করেছিল। রসকুণ্ড স্বর্গেৎত মৈর্ত্যং লামিয়া আহেছে স্বর্গধারা (গঙ্গা)। রসকুণ্ডর কাদাং রূপার খনি আছিল বুলেছি।

ভূট্টারেৎত মণিকরণ যিতরাগা। পথহান ১৯ মাইল। বুড়চল গাটহানর গজে রুবর কেণ্ডি লিভার ব্রীজর গজেদে গেছেগা পথ। উপেয় আছে হর-পার্বতীর মন্দির বারো পৃথবীর হাবিস্ত তপ্তা (১০৪° ডি) উম প্রস্রবন। এহে পার্বতীর কানর মণি-কুণ্ডল মাঙলে মহাদেব ছৌয়ছিল। মহাদেব ছৌয়নিয় পাতালেৎত শেষনাগ দৌগয় মণি-কুণ্ডলগী আনিয়া পার্বতীরে দেছিলহা বুলেছি। ধর্মগঙ্গার ধর্মসরোবরে ধর্মরাজে পঞ্চপাণ্ডব-দ্রৌপদীরে পানী পীতে প্রশ্নোত্তর বিছাড়াছিল বুলতারা।

ঔরাতি নাগরে আছিল। নাগর কুলু উপত্যকার রাজা জগত সিংর পুরাণা রাজধানী আছিল। বিয়ানে রাজ প্রাসাদ চেইয়া ROERICH art gallery চাছিলঙ। সোয়েংলভ-রৌরিকে-বোম্বাই চলচ্চিত্র অভিনেত্রী দেবিকারানীরে বিয়া করেছিল। নাগরর কাদাং পাণ্ডবে হংকরেছি ৫ হাজার বছর পুরাণা ভীম কালীর মন্দির চাছিলঙ। এপেই আগে নরবলী আছিল। নাগর শহরর মাইল আহান উত্তরেদে পুষ্পকানন দেহিয়া বারো হোটেলগং আলছিলঙ। মাদানে নাগর বাজারেৎত হোনার আপেল, পলার আপেল, চেরী, কিতা কাতা লৈয়া আমি মানালীং গেছিলাংগা। মণ্ডিৎত মানালী, প্রায় ৬২ মাইল পথ। আমি মণ্ডি-কুলু-মানালী-রোটাং পথে আহেছিলাঙ। ঔরাতি মানালীং ফরেস্টর ডাকবাংলা আগং আছিলঙ। নাগর শহরেৎত মানালী প্রায় ১৩।১৪ মাইল পথ।

আমি কুলুৎত বিপাশারে দক্ষিণে থৈয়া উত্তরে মানালী গেছিলাংগা। মানালীর উত্তরে চন্দ্রভাগা। চন্দ্রভাগার উত্তরে কেলং। কেলংর উত্তরে লাদাখ। মানালীঘাটর পারগং মানালী হিল স্টেশন। মানালীর কাদাৎতেই কুলু উপত্যকাৎত ইরাবতী নদীহান নিকুলেছে। মণ্ডি, কুলু, হিল-স্টেশনেৎত মানালীয়েই মোর মনহান মিয়াম চরকরেছিল। টেঙারার গজে মালভূমি পারা মান্না ফামআহানাং বিরাট বিরাট দেবদারু গাছর হাদিৎ লিকলিক করের শহরগ। তলে মানালী ঘাটহানর এলা নাছার শব্দ। চারিও বারাদে বরফর রূপার পর্বত শৃঙ্গ। সারা দেহাগ ঝাপিয়া আছাংপা আচালা। গাড়ী-ঘোড়ার শব্দাশব্দ, মানুর ছন্দকার নেই। মনে অর নিঃশব্দ তপস্যাং তপস্যারত হৈমবতী পার্বতী। কিয়াউবা নাতে, এহানযে শিবরাজ গিরি শৃঙ্গলোক।

ফরেস্ট বাংলাগো ডাঙড় অছিল। কোঠা তিনগ আহান আমারে দেছিল। খানসামাগোয় আমার ভাত-পানী যোগাড় করিয়াই থছিল। ব'নার ঘরগর ফায়ার প্লেসহানাং ছি অকরিয়াই থদেছিল। তপ্তাপানীলো আত-জাঙ সেঙয়া ফায়ারপ্লেসে বহানির লগে লগে চাপরাসীগয় তপ্তা কফি আকেই কাপ দিয়া খানার সময় আঙকরিয়া গেলগা। আমি-খনি জিরেয়া খেইতাঙাই। ১০ বাজিৎ খানার টেবিল লাগেইলে ঐতৈ বুলিয়া তারে বিদায় দেছিলঙ। কফি পিয়া পিয়া ভরদ্বাজে মাতেছিল -

দক্ষ-যক্ষ-কিল্লরর বাসভূমিৎ এবাকা আছিলায় লামা, নেপালী, গাড়োয়ালী, হিমাচলী, পাঞ্জাবী, হিন্দুস্থানী, লাদাখী, কাম্বীরী, গুজ্জর এতা। অখচ এহান আছিল হিডিম্বক রাজ্য। রাক্ষসর বংশ পেয়া নেয়ছি। জতুগুহ দাহ এলেভীমগাছি এ হিডিম্বক রাজ্যে হমাছিল। হিডিম্বির তুল এপেই ভীম অকনা অছিল। হিডিম্বকরে মারিয়া ভীমে মালক কুস্তিবারো বেয়ক যুধিষ্ঠিরে মতিয়া হিডিম্বারে বিয়া করেছিল। ঘটোৎকচ এপেই জরম অছিল। কিল্লর দেশর তলহানাং কিরাংরাজ্য আছিল বুলেছি। কিন্তু কিরাংর বংশাবলি়ো এপেই নেয়ছি।

ভরদ্বাজর কথাহানি হুনিয়া কৌশিকে মাতেছিল -

- বিনির কথা এহানেতে আমারেউ অর্জুনর বংশধর নাউ মাৎতেই, কিয়াবুলে আমিতে পাণ্ডব নাগে বিষ্ণুপ্রিয়া মণিপুরী। ৪/৬ হাজার বছরে দেশ, কাল, পরিস্থিতিয়ে মানুর কত শত পরিবর্তন অগেছেগা - এবাকা দানব যক্ষকিল্লর দৌ-দুক বিছাডলে ঐতৈতা ? আছি মানু এতায় উতার বংশধর মাতানি লাগতৈ। ঐতিহাসিক যুগে এ কাবুল কান্দাহারেৎত ব্রহ্মদেশ পেয়া ইনার হিমালয়, আউটার হিমালয় পার্বত্য উপত্যকাং ভৌগলিক, রাজনৈতিক সামাজিক বারো অর্থনৈতিক পরিবর্তন ঐয়া গেছেগা। এবাকা পৌরাণিক সম্বন্ধ ফাম বারো ফামর নাঙে যেহানি আছে উহানী। উতাউ ঐতিহাসিকে এপেই হেপেই করতারা। পিছেকার দিনে মানালী চানার খৌরাঙে ঔরাতি জিরানী মনেইয়া আর কথাবার্তা না বাড়েয়া ভাত-পানী খেয়া হাবিয়ৌ ঘুমজেছিলঙ।



বিয়ান ৭ বাজিৎ আমি হাবি হিমাচল ট্যুরিস্ট ডেভল্যাপমেন্ট করপোরেশনের বাসে কাছিলাঙ। বিয়ানকার রৈদর মিঙালে হীরা-মনি মুক্তার মুকুট পিছেদে যোজন-বিস্তৃত ধাওলা-গিরি (ধবলগিরি) পর্বতের মুরে-দেহায় বরফর গজে রৈদর মিঙাল পড়িয়া নানা রঙ-বেরঙর দুটি ছড়াছে। চেইতে মনে অর হীরা-জহরত-মণি-মুক্তার জড়োয়া হোনার মুকুট নেকলেশ, কাঠি আংটি বৈদ্যু্যামনি, পুষ্পরাগমনি, ইন্দ্রকান্ত মনি, নীলকান্ত মনি, পিদেছে। মনে অর যক্ষরাজ কুবেরর ধন-রত্ন-ভাণ্ডার। টেঙারর ফামে ফামে হোনার বরণ, পলার বরণ, আপেল, পুষ্পরাগ মণি চেরী বেরী সফেদা নাসপাতির বাগানে রৈদর মিঙাল পড়িয়া কুবেরর রত্ন ভাণ্ডার মালছে।

পয়লাই চেইলাংগা হিড়িমা মন্দির। উতারপিছে মানালীর তিন মাইল উত্তরে বশিষ্ট মূনির মন্দির। মানালীর কাদাবারাং বশিষ্ট মূনির আরতাউ মন্দির আছে। উতার পিছে পূবেদে করে নেহেরু পার্ক। উতার পিছে রোটাং পথে প্রায় ১০ মাইল গিয়া চাছিলাঙ বশিষ্টাশ্রম। বশিষ্টাশ্রমেংত আলৈয়া আয়া মানালী-রোটাং লাছ্যাল-স্পীতি সড়কে ১৩ মাইল গিয়া পাছিলাং রোটাং পাস। রোটাং পাস বরফে গুড়িয়া আছিল। দ্বিয়োবারার বরফে গুড়িয়া থছে পাহাড় পর্বতে বরফর গজে রৈদর মিঙাল পড়িয়া আহি মিচ্চিলাছিল। কিন্তু আহিৎ হাবিরতাউ কালা চশমা আছিল হাশ্তে.. হীন নাছিল। হাবিয়ৌ বরফর গজে আটানী মনেইলে বাসহান থামেছিল। গাড়ীর কণ্ডাক্টরে হাবিরে সাবধান করে দেছিল লগছাড়া ঐয়া এবেদে-হৌবেদে মিয়াম দূরেই না যানি, বিশেষ করে বাসহান যেন আহির দৃষ্টির বাইরে নাযারগা। হদায় বাসহান নজরে থনা। কিতাপারা বৌ আইলে ত্তড়াকরে আলনী। রোটাং পাসে বৌ আইলেই বরফর বরণ আহের। বরফর বরণ আইলে ইঙহান জবর অর বারো দূরেইথনা দেখতারা। এমন কি আহিব মুঙর ৩০-৪০ ফুট দূরেইও না দেখতারা। উপেয় এবেদে হেবেদে গিয়া মাঙ পরতারগা। এতাহাবি ছনিয়া আমি বরফর গজেদে খেলা খেলা বাসহানৎত ২০০-২৫০ ফুট গেছিলাংগা। হেইরাপ সির্ সির্ করে পাতালা বৌ - আহান আইলে আমি ডর পেয়া আল পড়েছিলাংগা। রোটাং পাসহান ৬/৭ মাইল দীঘল। রোটাং পাস লালৈলে স্পীতি ভেলী। ঔ পথে প্রায় ৪০ মাইল গেলেগা লাছ্যাল লালৈয়া চীন। চীনা তিব্বত। আমি রোটাং পাশেংত আলছিলাঙ।

আমি দিনে মাদানে মানালী আহেছিলাং। সেন্দাং জোনাকহান নিকুলেছিল। উপেই মানালী বাজারে গেছিলাংগা। পুখর কাদাদে ফুতি-ফালি, সাজ-সরঞ্জাম, ফল-মূল-মদর দোকান মহি। সিন্ধী, পাঞ্জাবী, গুজরাটী, মারোয়ারী, হিন্দুস্থানী দোকানি মহি। হিমাচলিয়ো আছি। পশমিনা চাদর, কুলু কেপ, কুলু চাদর, ফল মূল আদিলো ফরেষ্ট বাংলাগোং আলছিলাঙ। জোনাকর পহর বরফর পাহাড়ে পড়িয়া মানালীহানরে রূপসী অঙ্গরা যুবতী

করে হাজাছিল। চারিও বারার পাহাড় পর্বত এতা ঝাটিক স্তম্ভ মালছিল।

বাংলাগোং আইয়া ফরার প্লেসর চারিও বারাদে কফি পিয়া বহেছিলাঙ। সংগীতায় অনন্ত লিঙ্গমরে আঙকরেছিল অজা আমিতে বিপাশার পারর মধ্য বারো উত্তর হিমাচল খানি মানি দেখলাঙ, শতদ্রর পারর দক্ষিণ হিমাচল বারো উত্তরাঞ্চলর কাদর হিমাচল নাউ দেখলাং। আমি উতা দেহানি নাকরতৈ তা।

অনন্তলিঙ্গমে মাতেছিল - কিয়া না করত। তবে এবাকা ঔ ফাম উতা চানার সীজনহান নাছে। মে মাহাৎত অক্টোবরর আধাআধি পেয়া ঐলে হোবা। উবাকা বরফ কমথার, পথঘাট চলানী নুঙেই অর। দক্ষিণ হিমাচল এহান বাহির হিমালয় বা শিবালিক পর্বতমালা বুলতারা। বিলাসপুরেস্ত কামোলী, শিমলা, নারকাণ্ডা, কামরুণ, রামপুর, বাস্পী, কাল্পী, ওয়াংটু, ছোট কৈলাস, শ্বেতশৃঙ্গ বা অপসরা পর্বত, সায়হান (পুষ্পকানন) নামগিয়াল ঐয়া তিব্বত কৈলাস গারতক - মানস সরোবরযানা যাকরের - এ পথ এগরে হিন্দুস্থান তিব্বত রোড, বুলতারা - এবাকা বহুপথ আছে। শিমলাৎত শিপ্‌কী আছিল বুশাহর রাজ্য বা কিন্নর দেশ। ওয়াংটু লালৈয়া জাসকার পার্বত্য উপত্যকার পিছে শৃঙ্গার মহেশ্বর পর্বত। তার পিছেদে সায়হানর উত্তর-পূর্বে ভারতর ছোট কৈলাস। তার পিছে শ্বেতশৃঙ্গ পর্বত অপসরা পর্বত। উহান লালৈয়া নামগিয়াল। এ নামগিয়ালেৎত ওয়াংটু পেয়া আছিল যক্ষরাজ কুবেরর যক্ষদেশ। নামগিয়ালেৎত শিপ্‌কী লালৈলে তিব্বত চীন। সংগীতায় মাতেছিলী -

- পৌরানিক নাঙ এতা ছনিয়া - যেমন শ্বেত শৃঙ্গ পর্বত, অপসরা পর্বত, ছোট কৈলাস, সুমেরু পর্বত, চতুর্দশ সহস্র শিবলিঙ্গ পর্বত ফাম উতা দেহানীতে আহের।

অনন্ত লিঙ্গমে মাতেছিল - পৌরানিক কথার সত্যতা থাক বা নাথাক তবে এ হিমালয় এগর নানা ফাম এতা দেহিল মত, হাশ্তে পারতে দেহানি লাগের।

মি মাতেছিল -

-এসাদে পাহিয়ারডেকি ফরদে ফরদে চেইয়াতেকোন কানা নেই। ফাম আকেইহানাৎ আকদিন-দ্বি-দিন থায়া আটে আটে চেইলেহেচানা। মানুর তুলো যারীপরী দিয়া ফাম ফামর ইতিহাস, মানুর চাল-চলন, আচার ব্যবহার, কন্ম ধর্ম, খেতি-বাতি, কৃষ্টি কলা-সংস্কৃতি, শিল্প-বাণিজ্য এতা না হারপেইলে হুদা দেশ ভ্রমণ, তীর্থ ভ্রমণ করলে পয়সা খরচ, সময়র অপচয়, কায়িক পরিশ্রম ছাড়া কোন লাভ মি নাউ দেখরী। তারো চানা মনেইলে সময় আতে করিয়া নিকুলানিয়ে বালা।

কৌশিকে মাতেছিল -

কিং ন লভতে পর্যটনেন, কিং বা প্রাপ্তোতি দর্শনাং  
কিং করিয়াতি ঐতিহ্যং শ্রদ্ধা, কিংনো লাভো কর্যনাং।  
দিশম ভিন্নঃ বাচম ভিন্নঃ ভিন্নঃ ফলানি ভিন্ন কন্ম্যাং



যশ্মিন দেশে যদাচরেৎ বৃথাএবাত্র অনুকরনাৎ।  
শ্রেয়ান স্বধর্মো বিগুনঃ পর ধর্মাৎ স্বনৃষ্টিতাৎ  
স্বধর্মে নিধনং শ্রেয়ঃ পরধর্মো ভয়াবহঃ।

অনন্ত লিঙ্গমে মাতেছিল -

দৃষ্টা পৃথিব্যাং অপারং বিজুতং জ্ঞানং পছাঃ অনন্তম  
কেনস্যাং বিজানিতং বৈচিত্র্যোয়ং স্থিতাগৃহং অনুক্ষণম।  
জ্ঞানোবিজ্ঞানোধারণ নরঃ বিদিত্বা ব্যাপ্তং চরাচরম।  
কূপ মোবিষ্টা মুণ্ডুকেন রুবনমোয়ং পৃথ্বী অতুলম।  
কহাত্ত দোয়াদে না নিকুলেছে কেরবংগে।  
মাংতৈ পৃথিবীংত ডাঙর মোর কহাগে।

তারো মোরে মাং বুললে আজি মি তোমারে হাবিরে

এনানেই মাতৌ, বুলিয়া মাতেছিল -

অনিত্যং হি জীবন মন্তস্য যঃ নো বেত্তি বসুন্ধরাম  
ধন্যমন্তস্য জীবনমুচ্যে যস্য বসুধৈব কুটুম্বকম।

এহানি মাতিয়া তিরুমল অনন্ত লিঙ্গম ভেঙ্কটেশ্বামী  
জোনাক পাহিয়া পড়েছে বরফে গুড়েছে ঘাসর লনহানাদে আটিয়া  
গিয়া দেওদারর বিরাট গাছ আক ঝারর তলে গিয়া হাকহানাদে  
চেয়া উবা ঐয়া আছিলগা। ভরদ্বাজ, কৌশিক, সংগীতা বারো মি  
ঔ বগার ফরি পারা ধলা লুঙ্গি বারো আচালা পিদেছিল মাদ্রাজ  
ইউনিভারসিটির ভারতীয় দর্শনর অধ্যাপকগারে আহিরি পট্টনা মারিয়া  
চেয়া আছিলোঙ দেবভূমে দ্যোগরে।



## শিশু মুক্তি

ডঃ অশোক সিনহা

দুইশ সাতত্রিশ নম্বর ফ্লাইটহান এরা দিলতা ঘণ্টা আহান  
সতরো মিনিট লেট করিয়া। ইমেতে সময়হান খারাপ নাগেলগা।  
প্লাস্টিকর চিয়ারে বয়া যাত্রী ঔতা চেয়া চেয়া লাল করাং লাগেছিলু  
সময়হান। এয়ারপোর্টর জগৎ হানৌ কতি বিচিত্র অগেছেগাতা।  
বুজন আগই বারে বারে নাতিয়ক ঔগরে বানাপেইল। পরে  
পুতকরে বির কাগজ ঔতার কথা বুজাং লাগেছিল। - খালকরলুতা,  
.....কর যাত্রা এহানাং আর আলথক অইতই বুলিয়া না নিংকরেছে  
বুজন ঔগই। হৌগদে বার মালক আগ জিপুত দ্বিয়গিরেল নিয়াম  
ব্যতিব্যস্ত অছে। উরর শৌগরে ধরিয়া ডাঙর ঔগর দাপদাবদি  
ঔতা সামারিরী। নমস্কার বৌদি। কলিকাতাং যাউরিগাতা।  
সুরেণদারে নাদেহৌরি তাতে। পিকুলুবাবু আনন্দ করাং লাগেছৎ  
নাগইতা।

বৌদি খানি চঞ্চল অইলি- পানী আনাং গেছেগাতানা।

এই পিকলু কতি দুষ্ট অছতা, এগদে আই কাকুরে টুইংকল টুইংকল  
ঔহান ছনাদে। পিকলু না মনার। মালকে এরা দেনা নাকরিরী।

- সোজা অয়া উবা! হাই এবাকা ছনাদে কাকুরে। দেনে

মণি তোমার ইস্কুলর ইতি মিসে হিকাদেছে ঔহান।

শৌগর প্রত্যুৎপন্নমতিত্ব মালকরাংতৌ নিয়াম। এসাদে  
চাপেংত নিকুলিয়া আহানির পথগ তা হবা করে হারপাছে। সোজা  
অয়া উবা অয়া আতহান তুলিয়া নমস্কারতে নাকরিয়া ব্যা করে  
কাদে বেলল।

মালকে সৌঅয়া মাতল কিতার অসভ্যতা কররতা

এমাটিক কনাক ঔগর গজে মালকর অত্যাচার ঔহান

দেহিয়া মেই থংহান বুলাছিল।

\* অসভ্যতাহানতে মালকে করলতা ঔহান কারেতে  
বুজেইতু। কইগ হাবি ঘরে যানাহান অসন্তর অইলতা কাকুরে  
এলা আহান ছনুয়ার যন্ত্রয়ার যন্ত্রনাং।

প্লেনহানাং বয়া খানি ঘুমহান পারা অয়া গেছুগাতা। খাংতা  
চিকারিআগ ছনিয়া ধান ভানাং পড়েছু বুলিয়া শব্দভেদী বাণগর  
সাদে মুঙেদে ছুটলু, গিয়াতে লাজ আহানাং পডলুগা মালক গৈই  
ডাঙর ঔগরেএড়ে দিয়াখলা ঔগরে ধরেছে। বাপকর উরহানাং  
(বাপকগই এইতই) ছয়মাহার শৌগ। ঔগরে চিপেয়া ধরিয়া আঙুলি  
দুগল শৌগর থতাহান আ করুয়াছে, বার মালকে চামুচ আহানল  
সেনকম বরাদেনাং লাগেছে থতা ঔহানাং। মেলকম সিটা  
থতাহানাং হমেইবতাই বাপকে শৌগর থতা ঔহান চিপেয়া গাটে  
দিয়া সেমকম সিটা গিলনিং বাধ্য করের।

ধমকহান পারাকরে দিয়া মাতলু - কিতা কররতা ?

মেইথঙ ঔহান করুণ করিয়া মালকে মাতল - খানা না  
মনার থাংতে।

বিশ্বাস করিক মি হংকরিয়া মাতুরিতা নাগই। এহান সম্পূর্ণ  
হাইহান। এরে নির্বোধ মালক বাপক এতাই তানুর শৌশুমারারে  
যেতা অত্যাচার করতারা ভগবানরাং মাগুরি ডাঙর অয়া মালক  
বাপকর গজে প্রতিশোধ নালকা। আজি পেয়া অসাদে মালক  
বাপক নাপাছু য়েগই মাতেছি যে, শৌগ-ঔগ ঠিকমত খার। এহান  
অদ্ভুদ অবস্থা আহান। মালক বাপকর অত্যাচার শৌগর খানার  
রুচিহান নষ্ট অর। খানার বার দেখলে পলানি মনার। ঔতার  
পিছেদে ডঃ বিলাস রায়, ডঃ অজিত দেবরায় ডাঃ আনন্দ  
চক্রবর্তীরে দুয়ারে দুয়ারে বুলানি অকরাতারা। কু নগই বুঝানির  
চেষ্টা করতারা কুনগই বীতশব্দ অয়া এনজাইম ইকরে দিতারা।

মি প্রায় আহৌগ মালকরে বিষয় এহান বুঝানির চেষ্টা  
করেছু। সুপ বুঝেইতে বুজা নুয়ারুরি। যদি মাতৌরি - শৌরে  
জোর নাকরিয়, ভক পেইলে আপপানৌ খেইতাই, তনু মাততারা  
- আর নুয়ারলাং ডাক্তর বাবু। বাপকে শৌগর মালকরে দোষ  
দের, শৌগর মালকে বাপকর গজে।

হবা করে খালকরিয়া চেইলে এহান অদ্ভুত লাগের। ঘটনার

ক্রম ঔতা এসাদে।

- শৌগরতা ভকহান না লাগলৌ মালকে জোর করিয়া খয়েইতই।
- ঔহানর ফলহান শৌগর খানার ইচ্ছাহান কমতই, ঔহানে পাকস্থলীগত পাচন রস কম নিকুলতই।
- জোর করিয়া খওয়েইলে বদহজম অইতই, গারিগ দুর্বল অইতই।
- গারিগ দুর্বল অছেহান দেহিয়া মালকে আরাকো জোর করতই। ঘটনা ক্রমর পুনরাবৃত্তি অইতই, নিয়াম করে, দ্বিগুন উৎসাহল।

বে শিরভগ মালক লকেয়ে শৌরে দিতারা খাদ্য ঔতা হুংতানা কিতা খালকরিয়া নাচেইতারা। খালকরিয়াচেইক খানিপ পারা নুন বার আনদি দিয়া হিজিমাছ কুংগই খানা পারতাইতা। হজাব অক, শৌগ অয়াও থাক মানুগ নাই। ঔ খাদ্য ঔতা কিসাদে ঠিকপেইতইতা।' খালকরিকতা, ঔতা খানারকা মালকে জিদ করলে শৌগর মনহান কিসাদে অইতইতা।

এরে মালক লকেই এতা নুয়ারাতা, তানুর মানসিক স্বাস্থ্য হুবা নেই। এতার আতে শৌর পাচমালি এরা দেনা চুম নেই। আমরতা বেশিরভাগ মানুরতা একান্নবর্তী পরিবার আর নেই। ঔইলে ববাক লকেয়ে শৌ এতার দায়িত্ব লনা পারলাইছ।

একুইশ বছর সতর দিন বয়সর মালকগই এবাকা সর্বসর্বাং। এতাহাবি খাংতা আতহানাং পেয়া মুরগ বুলাছে।

অবস্থাহান এবাকা যেহানাং পড়েছেগা ঔহানাং চালক করে আন্দোলন আহান অকরানি থকছে। শৌরে তানু মনেইতারা ঔসাদে জিংতা অনি দেনা লাগতই। হিজি মাছ ফুৎকরিয়া, ডাইলর গজর পানি ঔসিটা, খবল সিদ্ধ - এরে অখাদ্য এতা দেনা নুয়ারতাই। শাস্তিহান করে মালক ঔতারে ঔতা খাদ্য দেনা অক বার যেবাকাউ ঔতা খানারকা জোর করাগি অক। এরে মালক লকেই এতারে হাবির মুঙে আবৃত্তি করানিরকা বাধ্য করাগি অক বোকাউ, যেপেয়ৌ।

শিশুখাদ্যর প্রসঙ্গং বার আহিং। মালক লকেয়ে তানুর জিদ ঔহান এরা দিয়া ডাক্তারবাবু গাছির কথা হুলাইছতে এ প্রসঙ্গ এহানল মাতানির দরকার নেয়ছিল। মোর উদ্দেশ্যহান বাবা জাতীয় জীব ঔতার দৃষ্টি আকর্ষণ করানি। আপনাগাছিসম্পূর্ণভাবে নির্বিকার নাইলেতে এবাকার গাই কিহান আহান করিক।

- আপনার শৌগই নাহার ধাং ? ডাক্তার দেখ্যানি লয়ইলতা ? আপনার শৌগরে হাবির মুঙে যেবাকা হেবাকা আবৃত্তি করানিরকা বাধ্য করানি অরতা ? আপনার শৌগরে ঔতা অখাদ্য খওয়ানি অরতা ? ঔহানরে অইলেতে আপনি তলে দেছি নির্দেশ ঔহানি পালন করিক -

- ঔ খাদ্য ঔতা আপনার কইনা ঔগরে খানা বাধ্য করিক।
- আপনার কইনা ঔগই খানা নামনাছে ঔতা, খানারকা জোর করিক, নিককা, বিয়ান মাদান।
- মরুপ মাসাঙর মুঙে তেইরে আবৃত্তি করানিরকা বারে বারে মাতিক, নাইলে ধমক দিক।
- নাকরলে ডাক্তাররাং নিকগা বারে বারে।

ঔহান অইলে শৌ এতা মুক্তি পেইতইসাং এরে অত্যাচার বার বন্দী দশাংত।

(আনন্দ উজ্জ্বল পরমায়ু - লেরিকেংত)



## মানব স্বীকৃতির কাঙাল ?

ব্রজগোপাল সিংহ

ধন পয়সাত্ব মানু স্বীকৃতির যাম কাঙাল। ধ্যান আকর্ষণরকা কুকুরগো লেজ লরার, সৌগো কাদিয়া ইমাবাবার আদর পানা মনার। পিয়নগন্ত অকরিয়া ডাক্তার সাহেবগ পেয়া নিজর কামরকা সাবাসি পানা মনার। গৃহিণীগো বুললে নিজে নাখেয়া হাবি বিলাদিরী।

অন্যর গুণ দেহানির চেষ্টা কর, চাপলুসী না করিয়া সততাপূর্ণ প্রশংসা কর, প্রশংসা করতে কঞ্জুসী না করি - তি মানব ব্যবহার গুরুর আসন লাভ করতেই।

মনমোহক অনার চেষ্টা কর (BE A PLEASER)

মানুরে প্রভাবিত করানি অইলে মনমোহক অনা লাগতই (PLEASER)

P = Presentable. মার্জিত পোষাক, বেশভূষা ইত্যাদি।

L = Learn to Listen. ধৈর্যশীল শ্রোতাগো অ'পারলে অন্যর গজে প্রভাব পরের। তি অন্যর কাখালকরর, তানুর হবারকা দরদী - এ বিষয়ে প্রভাব পরের।' কম টটরা - যাম হুন। সাউথ আফ্রিকাত গান্ধীজি অইলে তিলকে মাতেছিল - বছর আহান সুপ না টটরেইস - হুদা হুন। গান্ধীজিয়ে কথাহান থছিল।

E = Enthusiastic. যোশ্ বা উৎসাহ সফলতার প্রধান অঙ্গ।

A = Attitude. সাকারত্মক মনোবৃত্তির অতি প্রয়োজন। অসীম আত্মবিশ্বাসলো অন্যরে Motivate করানি।

S = Smile স্বাভাবিক মুস্কান। হংকরা মুকছিহান নাগই। মানুগর আহিগত আহি মিলেয়া টটরা - প্রভাব পরতই।

E = Empathy for Others. সহানুভূতি - ব্যক্তি ঔগর

জাগাৎ নিজরে কল্পনা করিয়া - সহানুভূতিশীল অনা।  
 অন্যর দৃষ্টিভঙ্গীকে কদর করানি লাগতই। তাও যে কদর  
 যোগ্য এহান প্রকট করানি লাগতই।  
 পানা অইলে দেনা লাগতই - চিরাচরিত নিয়মহান।  
 বানা পানা অইলে বানা দে।  
 আহনি পানা মনেইলে আহনি দে।  
 প্রশংসা পানা মনার - প্রশংসা কর।

R = Remembr names. জগত্তর হাবিত্ত মধুর শব্দগ  
 নিজর নাঙহান। নিজর নাঙহান উচ্চারিত অইলে হাবির  
 ডাঙর প্রতিক্রিয়া অর সহযোগিতা আদায় অর। বিভিন্ন  
 মানুর নাঙ নিংশিং থনা অতি আবশ্যিক।

### তিন নিষেধ (Three Nevers)

কদাপি তর্ক (argument) নাকরিস - হুঁর তর্ক জিঙলেও যুদ্ধত  
 পরাজিত অইতেই। সহমত অনা হিকানি লাগতই। পয়লা সহমত  
 অয়া বা ধৈর্য্য ধরিয়া ছনিয়া নিজর অভিমত ব্যক্ত কর। শালিনতা  
 বজায় থ। পয়লা তোর প্রতি শ্রদ্ধা জাগা - সময়মত তোর মত  
 জ্ঞাপন কর।

কদাপি 'তি ভুল' এহান নামাতি : (Never say 'you are  
 wrong')। এহান করলেই তোর বোকামি অইতই। তি যে মানব  
 সম্বন্ধত অপরিপক্ব ঔহান ধরা পরতই। শ্রোতার আত্মা সন্মানে  
 এ শব্দ এগিবুলেটগি পারা আঘাত করতই। এহান তোর অধিকরাও  
 নেই বারো তোর উদ্দেশ্য ও সফল নাইতই।

কদাপি সমালোচনা (criticize), নিন্দা (condemn), বারো  
 নালিশ (complain) না করি।

যেবাকই তি সমালোচনা বা নিন্দা করতেই তি নাকারাত্মক  
 শক্তিতরঙ্গর সৃষ্টি করতেই তার আত্মসন্মানে আঘাত করিয়া।  
 শতগুণ শক্তিলো তা তার আত্মসন্মান রক্ষারকা যুদ্ধত উবা অইতই।  
 মূল সূত্রগো অইতই সমান শক্তি তরঙ্গত কথোপকথন।

### পাঁচগো স্বর্ণ কৌশল (Five Golden Skills)

১। মানুর প্রশংসা কর - মধু চহা বস্তুত্বে যাম আকর্ষণীয়।  
 মানব সম্পর্কত বিজ্ঞ মানুষে বরাবর অন্যর গুণ তল্লাস করতারা  
 বারো উপযুক্ত প্রশংসা করতারা। কিন্তু জ্ঞাবকতা (flattery)  
 নাগয়।

হুঁর হুঁর বস্তু, যেমন পোষাক, হস্তলিপি, পুস্তক সংগ্রহ  
 ইত্যাদির প্রশংসা মানব সম্বন্ধত জবর কাম দেয়। কোনগর  
 অবর্তমানে তার সমালোচনা থকনেই। এ অভ্যাস এহান রপ্ত  
 অইলে হারোপা জীবন পেইতেই। পিঠিত সমালোচনা করানি  
 অভ্যাসে পরিণত অর। এ জালে না পরানি।

২। আপত্তি দূর করাগি (Handling objections)

আত্ম বিশ্বাসলো মন দিয়া ছন। গভীরতা প্রকট করানি  
 হেতু নোট ইকর। অনেক স্থলেই মনর ভাবনা প্রকাশ করে পারলেই

মানুর চিন্তা সাকারাত্মক অনা অকরের। নিজে নিজেই সমাধান  
 নিকালতারা।

আপত্তি প্রকাশর সময়ইত তর্ক না করি, টোকাটুকি না  
 করি। নিজে আত্মরক্ষার (take defence) চেষ্টা নাকরি বা  
 তারে হয় প্রতিপন্ন করার চেষ্টা নাকরি।

যুক্তিপূর্ণ উত্তরও এ সময়ইত কার্যকারী নার, কারণ তানুর  
 আসল ডরহান ভারনাত্মক (emotioned) সংক্ষিপ্ত যুক্তিপূর্ণ  
 উত্তর দিয়া তানুর কথারে তানুর চাহিদার বারাদে বুলাদে।

কিন্তু তি 'না' বুলানি মনেইল কোন সময় 'হায়' নাবুলিস।  
 'হায়' বুলিয়া কথা থ নুবরানিত্ত 'না' বুলানি হবা। বারো কোন  
 সময়ে 'না' বুলিয়া কথা না অকরানি।

৩ গো 'F' formule (feel, felt, found) উত্তর  
 দিতে এসাদে মাতানি -

'মি তোর কথা হারপাউরি। কারণ পয়লা পয়লা মিউ  
 এসাদে খালকরেছিলু.....।'

'কিন্তু মি পেইলু যে এহান .....

উদাহরণ -

'মি তোর ভারনাহান হারপাউরি। পয়লা এবিষয় যেবাকা  
 মনে আহেছিল মিউ তোর ডেকি খালকরেছিলু। কিন্তু গভীর  
 ভাবে যেবাকা বিচার করলু ঔবাকা মি হারপেইলু যে এহান এসাদে  
 করলে হবা ফল দিতাই'.....

৩। এমন ভাবে প্রশ্ন কর যেতার উত্তর 'হায়' অর অথবা  
 যেহানর উত্তর 'না' ছানি মনার। (Ask 'yes' question  
 or is 'no' the answer you are looking for)

অন্যর সহমতি পানা এহান ডাঙর কলাহান। স্বভাবতঃ  
 অনুকূল অইলেই অন্য আগই তোর মতে 'হায়' বুলতই। ঔ কারণে  
 এমনভাবে প্রশ্ন থনা লাগতে যেতার উত্তর স্বাভাবিক 'হায়' অর।

উদাহরণ :

'তি কিতা হারোপা জীবন না মনার গো ?'

'তি তোর ধনর উপযুক্ত মূল্য পানা না মনার ?'

'মি এহান হবা বুলিয়া মাতেছিলু, হবা নাগৈথাঙ ?'

আরাক সরল পদ্ধতি আহান অইলতাই - উত্তরহান 'না'  
 অইব প্রশ্ন করানি - যেমন -

'চাকরীর বাহিরেও যদি তোর রূপাখানি আয় অর, তোরতা  
 অস্পত্তি নেই নাই ?'

'পরিবারর লগে আরাকখানি যাম সময় কাটা পারলে তোর  
 কোন অসুবিধা নেই নাই ?'

'তোর ধনর যদি খানি যাম মূল্য পার তোর কোন আপত্তি  
 নেই নাই ?'

কুশলতায়ুক্ত প্রশ্ন করে, পারলে তি অবশ্যই সুফল  
 পেইতেই।

৪। সাকারাত্মক দ্বিগ উত্তরেত্বে চয়ন (Choice between



two positives)

সহমতি পানার লগে লগেই আগে পদক্ষেপ দে। 'হায়' বা 'না' মাতানির সুযোগ নাদানি। প্রশ্নহান এমনভাবে করানি যেতার উত্তর দ্বিগ সাকরাত্বক উত্তরর আগ অইতৈ। যেমন :

'তোরকা কোনদিন সুবিধাজনক, বুধবার না বৃহস্পতিবার?'

'তি Cash দেনা মনার না Credit?'

'তি চাহা, কফি না cold drinks পছন্দ করর?'

৫। মানুরে ধন্যবাদ দে (Thank people)

ধন্যবাদ দেনার আলাদা মাহাত্ম্য আছে। কৃতজ্ঞতা প্রকাশ হাকিও পছন্দ করতারা। 'Thank you' note আহানও দিয়া পারর নাঙহান সহ।

ছরু ছরকাং কৌশল ডাঙর পথ খুলেদে পারের।



## জানালর য়ারি

সমরজিৎ সিংহ

জানালি শব্দ এগ আমারগ নাগই। এগর অর্থ নিয়াম। ব্রজেন্দ্রকুমার সিংহর জানালি নাঙর লেরিকহান পাকরতে পাকরতে, খালকরলু, জানালির অর্থহান ডায়েরি পাউরি। ডিক্সনারিতে মাতেসি। না। লেরিক এহান লেখকর ডায়েরিহানো নাগই। ডায়েরির নাঙ বুললেই রহস্যআহানে পাঠক আগরে কলকরিয়া দরের। জানালির মা ও রহস্য নেই। রেকর্ড কথা এহানো জানালির আরাক অর্থ আহান। ওহান অইলে লেরিক এহানরে রেকর্ড মাংতাঙ? আগদে খালকরলে, হাবি লেরিকই রেকর্ড। লেখক আগর অভিজ্ঞতা, মেধা ভাবনা, হপনর রেকর্ড।

পাকরিয়া লয়ইলে, ইমপানি অয়া থাইলু। মাত নেই মানুগর সাদে। মি ভাষাতাত্ত্বকগ নাগই। ডায়েরির মা যেসাদে নিজরে বিসারানির হংনা থার, এপেই নিজরে নাগই, লেখকগিরকে বিষ্ণুপ্রিয়া মনিপুরী জাতহানরে লেমগ দরিয়া বিসারানিৎ নিকুলেসে। এহানর সাদে ডাঙর কাম আর কিতাউ নেই। আমার মানুর গাঙ, বানা বার প্রেম, ভাষাতত্ত্ব, মেঠেল নাঙর কুস্তিরাং ইকরা ওতাংত হীরার দ্যুতি নিকুলের পারা। না, সমালোচনা অয়াউ এতা সমালোচনা নাগই। মাতানি থক, আয়াজিজ্ঞাসা। কিংতাউ নেই কথা আহানরেল য়ারি দেনার সাদে, টটরতে টটরতে, সমস্যার গভীরে হমানি, এহানর আগে আমার ঠারে আর কোন লেখকে নুয়ারেসি।

এসাদে লেখাং চিন্তার গভীরতা, ভাষার ঋজুময়তা বার তীব্র কৌতুকবোধ থানা লাগের। না। ফাগি বুলতে আমি যেহানরে উপয়ার, উহান নাগই, ইংরাজিল উইট মাংতারা এহানরে। ব্রজেন্দ্রকুমার সিংহই, বারেবারে, আমার পথ দেহেয়া য়ারগা জানালি

লেরিক এহানাতৌ বার পথহান দেহাদিল, এসাদেউ ইকরানি য়াকরের।

লেরিক এহানর নিয়াম পারা লেখাইমি ত্রিপুরা চে সম্পাদনা করলু সময় উহানর লেখা। এহান মাংলু, এসাদে লেখা আর ভাষার সাহিত্যে থাউলেউ বিষ্ণুপ্রিয়া মনিপুরী সাহিত্যে নেই। কোনগই ইকরতাই সাং বুলিয়া গইগ অয়া আসিলু। আকগৈয়ৌ না ইকরেসি। নাঙ মাতানি থক নেই, ভাষাহানর সিনটেক্স হারনাপাসি, ওঁসাদে মানুয়ে যেবাকা লেখক অলয়া ফিটা পেইতার, ভাষা ওহানর কপাল থিয়নির দিন ওঁবাকা আর দূরেই অয়া নাথার। আমার সাহিত্যর অংতাহানো এসাদে।

ব্রজেন্দ্রকুমার সিংহ, আকখুলাগই, আমার সাকতি অংতাহানরে সেচেয়া, ভাষাহানরে, সাহিত্যরে মানুর মেলে ফৌকরে দেসে। পাঠক আমি ঋণী থাইতাঙই চিরদিন। জার্নাল সেল্ফ কালেকশনর কা থনা দরকার, এহান কুমবাকা আমার সমাজর মানুয়ে উপইতাইতা ?



## চিঠিপত্র মতামত

(মতামতরকা সম্পাদক, পরিচালক, প্রকাশক দায়ীনগৈ)

ডাঙরিয়া সম্পাদক গিরক,

'অপরূপা'র 2nd year, Vol III পাকরিয়া দ্বিআকচুটী লিখানিরকা বাধ্য অইলু -

'অপরূপা'রতা হবের অকরাগো, অকরাগোতেই ইন্দ্রকুমারর 'পরিশোধ'র পুনঃ প্রকাশ পেইলাঙ। অরকাগোতেই পুনঃ প্রকাশ হবা না লাগের। ..... চাম্পালাল গিরকর 'ধনঞ্জয় রাজকুমার দুঃখ মাচুর হমাজক' ছুপ করৌ হবা না লাগিল। .....

সূচীপত্রত কবিতা, য়ারিশৌ, প্রবন্ধ, আর-আরতা খেইখেই করিক। মলাটহান জবর হবাছে, তবে পত্রিকা জীওতায়্যা নিয়াম দিন থানিরকা (বিঃ মঃ সমাজে) উসাদে খরচ উতা কমানি থক। .....

১৮ পৃষ্ঠাত সমরজিৎর সমালোচনার পিছেদে 'কালিদাসর মেঘদূত' বিজ্ঞাপন উহানরকা' অপরূপার নিয়মাবলী' মতে কোষারাদেস্ত পয়সা আহেছে উপনি চিলছে - পৌরিস্ত, না সমরজিৎ রাঙতো, না সুভাশীষ রাঙতো, না অন্য কোম্পইস্ত, অথবা .....

বারো সংবেদনশীল চিন্তাধারার সমালোচক আগই তার লেখাত ছন্দা প্রশংসাই না যওকরের। ইতি -

তারিখ - ১৮ ই মে, ২০০৬ ইং

মোহন লাল সিংহ

দুল্লভ ছড়া, এইচ, এস, রোড

শ্রীমোহনলাল সিংহ গিরক।

চিঠিহান অতিমাত্রায় দীঘল ঐয়া 'অপরূপা'র 2nd yr.

Vol. III সংখ্যাত প্রকাশ পাছে লেখা ছাড়াই অন্যান্য পত্রিকাং প্রকাশ আছে লেখার সমালোচনা বারো 'অপরূপা'র লেখার লেখা আকেইহানর গজে চিঠিহান নায়া সামগ্রীক অন্য চিঠিহান হাবি ছাপা নুইলু বারো মতামতো দিয়া নুইলু।

'অপরূপা' হান সাহিত্য সংকলন হান্তে বিঃ মণিপুরীর প্রথিতযশা লেখকর উচ্চ মানর রচনাবলীর তুলো পড়ুয়া বারো লিখক সমাজর পরিচয় করে দিতে 'অপরূপা'য় উসাদে লিখকর লিখা পুনঃ প্রকাশ করের। উহানে নাট্যকার, ঔপন্যাসিক, গল্পকার, শ্রীযুক্ত ইন্দ্রকুমার সিংহর যারীহান পুনঃ প্রকাশ করেছি। আপনে পাকড়েছি সংখ্যাহানর 'চিঠিপত্রত মতামত' কলামে পেইতাঙাই বহু পড়ুয়ায় ইন্দ্র কুমার সিংহর লেখা পাকরানিরকা আকাঙ্ক্ষালো বাছেয়া আছি।

চাম্পালাল গিরকর 'ধনঞ্জয় রাজকুমার : দুঃখ মাচুর হমাজক' আলোচনাং কিহান ছুপকরে হবা না লাগিল বা কিয়াকা, না মাংলাঙ হান্তে লিখক গিরকর লিখার শ্রীবুদ্ধির সহায়ক নাইল।

'অপরূপা'র সূচীপত্র বারো রচনাবলী সংকলন হানাং প্রকাশ করতে ধারাবাহিকতা আহান আছে। 'অপরূপা'র 'মলাটহান' হোবা পেইলাঙ উহানরকা ধন্যবাদ। প্রচ্ছদপটে খরচ কমানিরকা মাতেছি 'অপরূপা'র দীঘায়ুরকা, উহান 'অপরূপা'র উদ্দেশ্য নাইগে। 'অপরূপা'র কর্তব্যহান বিষ্ণুপ্রিয়া মণিপুরী সমাজর পত্রপত্রিকারে উচ্চমানর করিয়া অন্যান্য ভাষার পত্র পত্রিকার সমপর্যায়ে নেনা। 'অপরূপা' শুভউদ্বোধন সংখ্যা ১লা সংখ্যার 'সম্পাদকীয়', 'পরিচালকর কথা আকুটী', 'প্রকাশকর কথা আকুটী' পাকরবাঙ। উদ্দেশ্য উপেই আছে।

ফাঙ্কুনী সিংহর 'ধন চিনো'র লাইন চারিহান উদ্ধৃতি দিলু- 'দিন আহান আয়ুষ্কাল, থামপাল এগর। হাজারে বিজারে ফুল তিরা গাছ জরর।।'

এলেউ হরকাং জারি, থামপালর আদর। হাবিহানে আতেকরে করতারা আদর।"

বিভূতি ভূষণ সিংহর 'আর জনমে ইমাত মাতেছে - 'যত সাধ হাজেইয়া মিটেইতৌ, ময়ুর পেখম পারিজাতৌ দিতৌ, মনি মুকুতা জিঙে জোনাকেতৌ, স্বর্গত যেতা যেতা নেই।'

এহানে 'অপরূপা'রে আশীর্বাদ করিক - পারিল মাহি হাজক।

'কালিদাসর মেঘদূত'র বিজ্ঞাপন এহানি সমালোচক গিরকগাছিয়ে সমরজিৎ সিংহ বারে শুভাশীষ সিংহ - তানুর সমালোচনার অঙ্গ-হিচাবে দেছি।

আপনার চিঠিহানর শেষান্ত লাইনহান ভূ-না পরানিয়ে মতামত দিয়া নুইলু।

তা ৩০ শে হাওন, ১৪১৩

সম্পাদক  
অপরূপা

সম্পাদক মহাশয়,

ফাঙ্কুনী সিংহর "হোনার কেইরাক" "হিতোপদেশর" বিষ্ণু প্রিয়া মণিপুরী ঠারে অনুবাদ পারা মালৈলেউ যাম তঙাল আছে। আমার সাহিত্যর আরাক নুবা কাঠি - আঙঠি আকতা পিদা দেছে। এতা তামকরিয়া থানি-মানি আহান কামে খাটা পারলে যাম কানা ঐতে। কবি গিরকরে আমার হাদিরৌপা ভক্তি কাংকরিয়ার। ইতি - (টেলিফোনে)

তাং ০৮-০৬-২০০৬ ইং

সোনা, মনিদীপা, বাদল  
গায়ত্রী, কিংগুক  
গৌহাটী

সোনা, মনিদীপা, বাদল গায়ত্রী, কিংগুক!

তোমার ভক্তি মি কবি গিরকরে জানানীর দরকার নাউ ঐতে। গিরক পত্রিকাহান নিয়মিত পার বারো এ পত্রিকাং নিয়মিত ইকরের। হান্তে গিরকে পাকরতে। ভবিষ্যতে মোরে টেলিফোনে না জানেয়া কবি গিরকরাঙ নিজেই টেলিফোন করিয়া মাতে দিলে আরতাউ হোভা ঐতে। ইতি -

তাং ৩০ শে হাওন, ১৪১৩ সন।

সম্পাদক  
অপরূপা

সম্পাদক ডাঙরিয়া !

'জেঠীমা' পাকরিয়া আমার বুড়া বারো বুড়ীমারে নিংশিঙ আইয়ার। বুড়াবাউ গাঙ-ঘরেদে জেঠীমারে চর্চিয়াই থায়ল। বার মুঙহানাত দেখলে মেনাগ অলইল। 'বুড়াবা' 'বুড়ীমা'তে ঘর বেলেইয়া না গেছিলাগা। 'অপরূপা'ত রসর যারী 'খট্টাঙ্গ পুরাণ', সাহিত্য সভা পত্রিকাং 'চানমনির চিন্তা' পাকরিয়া আমি কনাক এতাই শ্রদ্ধেয় ব্রজেন্দ্র কুমার সিংহ গিরকরে 'রসরাজ' বুলিয়া ডাহানি মনেইয়ার। ইতি -

তাং ৩০শে হাওন, ১৪১৩ সন।

লালু, ভুলু, টিনু, চম্পা  
গৌহাটী

লালু, ভুলু, টিনু, চম্পা !

শ্রীযুক্ত ব্রজেন্দ্র কুমার সিংহ গিরকরে আঙকরিয়া জানেইতৌ।

৩০ শে হাওন, ১৪১৩।

সম্পাদক  
অপরূপা

সম্পাদক গিরক

ডি, টি, পি, করতে করতে 'অখণ্ড প্রজ্ঞার উপাখ্যান' এহান মোর মনে সিনেমা আহানর ডেকি ভাহিয়া থাইল। চারিখুরুম ডি, টি, পি, করেছিল। 'প্রজ্ঞা' শব্দ এগোতেই মাননীয় প্রকাশক গিরকে বারে বারে কারেকশন করুয়াছিল। উপেয় প্রকাশক গিরকরে মাতেছিলু কোন প্রখ্যাত হিন্দী সিনেমার চলচিত্র নাট্যকারে পেইলে

হবা সিনেমা আহান করল ঐছ। ডঃ স্মৃতিকুমার সিংহ ডাঙরিয়া  
গিরকরে এহান বাগা দিবাঙ। ইতি -

তাং ০১/০৮/২০০৬ ইং

রনধীর সিন্ধা  
গৌহাটী

রনধীর সিংহ গিরক

ডঃ স্মৃতি কুমার সিংহ গিরকরে তোর কথা না বাগাছিলু।  
চিঠিপত্রত মতামত কলামর মাধ্যমে হারপেইতই বুলিয়া। এবাকা  
তোর কথাহানি গজে ইকরিয়াই জানেইলু।

৩০ শে হাওন, ১৪১৩ সন

সম্পাদক  
অপরূপা

সম্পাদক সমীপেষু

ডঃ স্মৃতি কুমার সিংহ'র সহজ সরল নিষ্পাপ প্রকৃতি  
প্রেমী টেঙাড়ার নিঙল শৌগ 'প্রজ্ঞা'র দিল্লীবাসী আদর্শ চরিত্রবান  
'অখণ্ড' প্রতি প্রেম-ভালবাসা, বোধের অত্যাধুনিক বরা 'বিকি'র  
ক্ষণিক সাহচর্য্যে মোহা গ্রন্থ ঐয়া বোধে যানার বাসনা বারো  
'অখণ্ড' সাহচর্য্যে পুনঃ সহজ সরল টেঙাড়ার নিঙলগল্পে  
পরিবর্তন, শহরর মায়া ত্যাগ করিয়া নিজর ঘরে আঞ্চল অনির  
চিত্রাঙ্কন, অখণ্ড প্রজ্ঞার উপাখ্যান হুকাং উপন্যাস হানাং অতি  
পরিচ্ছন্ন মূর্তি পালছে। উপাখ্যান এহান চলচিত্র পাৱা অয়া মনর  
প্রেম্পাপটে ভাহের।

তাং ১৫-০৬-২০০৬ ইং

শোভা সিংহ  
গৌহাটী

ডঃ স্মৃতি কুমার সিংহ

মোরতাউ অভিমত এ উপাখ্যান এহানরে নাট্যরূপ দিয়া  
মঞ্চস্থ করলে সফল নাটক আহান ঐতৈ।

৩০ শে হাওন, ১৪১৩ সন

সম্পাদক  
অপরূপা

সম্পাদক ডাঙরিয়া

আমার বিষ্ণুপ্রিয়া মণিপুরীৰ এবাকার বেজাতি বিয়া সাদীর  
বৌবুলনী এগং আমার বহু মুনিশৌ-নিঙলশৌ বিশ্ব সমাজে  
হমাছিগা। মণীন্দ্র কুমার'র 'সঞ্চয়িতা'ত এ সমস্যার ছবি আহান  
আঁকেছে। বার এ সমস্যার সমাধান আহান দেছে। এপেই মি  
কনাক কালে পাকরেছিলু ছড়া আহান নিংশিঙ ঐয়া ইকরলু -

'পাকা হউক তবু ভাই পরের বাসা

নিজ হাতে গড়া মোর কাচা ঘর খাসা'

যতৌ মাতিক, ভাষা, আদব-কায়দা, চাল-চলন, খানা-পিনা, রীতি-  
নীতি কৃষ্টি-কলা, সমাজ-সামাজিকতা, আপন আপন ভাব, এতা  
ধৌয়ে-পানীয়ে তিলইলে কোরাংকার নুঙেই, কোয়াংকার নুংশি।

কৌয়ার ময়ূর সমাজে যানা বারো ময়ূরর কৌয়ার সমাজে যানার  
দুরবস্থা যেসাদেউ অয়তই।

মোর মতে নিজর নিজর সমাজে বিয়া-সাদী অনাহানেই  
মঙ্গল। ইতি -

আপনার

বরানগর

তাং ০২-০৬-২০০৬ ইংরেজী

নমিতা সিংহ  
সুনয়নী দেবী

শ্রীমতি নমিতা, সুনয়নী,

'সঞ্চয়িতা' জাতীয় সমস্যা আহানর সম্যক সমাধান।  
সমস্যা স্থান-কাল-পাত্র ভেদে তঙাল তঙাল। সমস্যার সমাধান  
সর্বসম্মতভাবে ঐতেউ পারে, নাইতেউ পারে। এ সমস্যা বেজাতি  
বিয়াসাদী সগোত্রে বিয়াসাদী, ব্রাহ্মণ-ক্ষত্রিয়ে বিয়াসাদী এতা  
পৃথিবীর হাবিব জাতেউ আছে। সমস্যার সন্মুখীন অছি মানুষে  
এতাৰ সূষ্ঠ সমাধান করে পারতাই। উহান নিজস্ব বারো সামূহিক  
ঐতেউ পারে। তবে এতালো এমাটিক মূর ঘামানির প্রয়োজন  
নেই। এহান হজক নেই নুয়ারাহান। আইনে বাধা দেনার উপায়ো  
নেই। কালর আদালতে এড়েদেনায় হোবা -

'অসম্ভবঃ ন সম্ভবতে। অবশ্যস্ভাবীঃ সম্ভবতে'

তাং ৩০ শে হাওন, ১৪১৩ সন।

সম্পাদক  
অপরূপা

শ্রদ্ধেয় সম্পাদক, অপরূপা

'অপরূপা'ত শাত করেছি রচনাবলী 'অপরূপা' নাঙ  
এহানরে সার্থক করেছে। 'অপরূপা' গোষ্ঠীয়ে মোর হৃদয়ৌপা  
থাকাত জানাউরী।

তাং ১১-০৮-২০০৬

সুখেন্দ্র কুমার সিংহ  
গুৱাহাটী

শ্রীযুৎ সুখেন্দ্র কুমার সিংহ গিরক

'অপরূপা'ত প্রকাশ পাছে রচনাবলী আপনারাং সমাদৃত  
অছে এহানরকা আপনারে ধন্যবাদ।

তাং ৩০ শে হাওন, ১৪১৩ সন

সম্পাদক  
অপরূপা

সম্পাদক ডাঙরিয়া

অপরূপাত ফঙছে কবিতা, য়ারী হাবি তাম করিয়া মি  
নিয়াম হারৌ অছু, বিজ্ঞ লেখক বারো লেখিকাই অতি হোভা  
লেখারে আমার সামজর সাহিত্য কলা বারো সংস্কৃতিরে হাজা  
দেছি।



সমাজ গঠনের কামে এহানে নিয়াম পাঙকাল যোগা দিতৈ  
বুলিয়া মি নিঙ করৌরি।

সম্পাদক গিরক তথা বিজ্ঞ লেখক বারো লেখিকারে মোর  
হাদিয়ৌপা থাকাং জানাউরি।

অপরূপা পালয়া থাক।

তাং ১১-০৮-২০০৬ ইং

রণজিৎ সিংহ  
গৌহাটী

শ্রীযুৎ রণজিৎ সিংহ গিরক।

অপরূপাত ফঙছে রচনাবলীয়ে আপনারে হারৌ করে  
পারেছে জানিয়া আপনারে ধন্যবাদ জনাউরী। ইতি -

তাং ৩০ শে হাওন, ১৪১৩

সম্পাদক

অপরূপা

শ্রদ্ধেয় সম্পাদক ডাঙরিয়া,

মি 'অপরূপা'র নিয়মিত পাঠক। পত্রিকাৰ আরোকৌ  
শ্রীবৃদ্ধির কারণে এচুটি আহান ইকরলু।

পয়লা, ভাষা মূলায়ম মধুর অক। পাঠক-পাঠিকায়  
তামকরতে রস পাকা।

দ্বিতীয়তে, বিভিন্ন বিষয়ল ইকরানি - ধর্মীয়, সামাজিক,  
অর্থনৈতিক, রাজনৈতিক, উপন্যাস হরকাম, গল্প, কৌতুক যারী  
কবিতা ইকরাকা। লেখক-লেখিকারে হেয়চা করানি থক। ছন্দ  
বজায় থয়া কবিতা ইকরলে হোভা মনে করুৱী।

তৃতীয়তে, আমার জাতর স্বভিমান বজায় থয়া অন্য জাতর  
মাসিক ত্রৈমাসিক পত্রিকাৰ মানদণ্ডর লগে টক্কর দিয়া পত্রিকাহান  
চলক, এহান সম্পাদক গিরকরাং হেয়চা জানাউরী।

চতুর্থতে, সুপ্রিম কোর্টে ৭৭ বিবাদি বিষ্ণুপ্রিয়া মণিপুরী  
সাহিত্য সভা বারো রায়নামা সম্বন্ধে সম্পাদক গিরকে যে বিবৃতি  
দেছি উহান সমাজর জ্ঞাতার্থে অতি প্রয়োজনীয় বুলিয়া নিংকরুৱী।  
ঔ বিষয় সম্বন্ধে আমার ঔ কোর্টর মাননীয় উকিল গিরক মিষ্টার  
এন, আর, চৌধুরীর লগে অপরূপার সম্পাদক গিরক বারো বর্তমান

বিষ্ণুপ্রিয়া মণিপুরী সমাজ সংস্থার সভাপতি মি মিনিরাজ সিংহ  
যৌথভাবে টটরলাং কারণ সাহিত্য সভা বারো সমাজ সংস্থার  
আদর্শ ভিন্ন নাগয় সমাজ সংস্থার আলাদা নাং পানার কোন  
দরকার নেয় বারো সমাজর রূপা পয়সা অপচয় করাণি থক নেয়।  
এ কারণে গিরকে, মিয়ে এডভোকেট মিষ্টার এন, আব, চৌধুরীর  
লগে সরা-সরি টটরেয়া সমাজদ সংস্থার আলাদা কেচ হানর ফীজ  
দেনার কথা উহান বন্ধ করলাং। কারণ ঔ চৌধুরী উকিল গিরকর  
ঘরে থয়া মি মেট্রিক পাশ করিয়া মোর ভবিষ্যত জীবন পথ  
হংকরেসুগ তানুর লগে মোর সম্পর্ক একই পরিবারর সাদে।  
উহানল উকিল গিরকর লগে স্বকীয় বয়া কোন রূপা পয়সা  
পেমেন্ট না করিয়া আমার ভাষাহানর চুপ্রিম কোর্ট আর্ডার আনেছিলু।  
আর্ডারর কপি শিলচর ভকতপুরে শ্রীমিনিকান্ত সিংহ গিরকরে দিয়া  
পেঠাছিল। ভবিষ্যতে সমাজর কোন সংস্থায় সমাজর কোন কেচ  
করলে ঔ সংস্থারে হাব্বি সংস্থায় ধন সাম্পাল, মানুহর পাংকাল  
হাব্বিল পাংকরানির হেয়চা করুৱী।

তাং ১৩-০৮-২০০৬

শ্রী মণিরাজ সিংহ

গৌহাটী

ফোন ০৩৬১ ২৩০০১৭০

০৯৪৩৫১৪০৪৮৭

শ্রীযুত মণিরাজ সিংহ গিরক

আপনার উপদেশ নিঙশিঙে থায়তৈ। যারীশৌ উপন্যাস,  
রম্যরচনা, এতাতে পেয়ার হানতে প্রকাশ করিয়ার। রাজনৈতিক,  
অর্থনৈতিক বিষয়লো ইকরা কম আহের। লেখক লেখিকারে  
অনুরোধ আগেউ জানানী অছিল।

সাহিত্য সংকলন হানর মানদণ্ড বজায় থনার উগদে তীক্ষ্ণ  
মিল্লেঙ আছে। সুপ্রীম কোর্টর ফাইনেল হিয়ারিঙে সমাজ সংস্থার  
উকিল না দিয়া সংস্থা তথা লেইরাপা সমাজর ধন জিংতা করে  
দিলাঙ উহানরকা ধন্যবাদ। ইতি -

তাং ৩০ শে শ্রাবন, ১৪১৩ সন।

সম্পাদক

অপরূপা

## অপরূপা উপহার যোজনা

- ১। সাগেই-সেম্বেই, মারুপ-মাসাঙ, বেয়াপা-বেইবুনি, শৌ-শুমারারে, অপরূপা রেহাই মূল্যে উপহার দেনা মনেইলে বারার চিঠিহানাং তানুর নাঙঠিকানা ইকরে দিয়া চৌকুনি ক্ষেত্রগৎ শুদ্ধ চিহ্ন হান দিয়া, দিয়া পেঠাদিক।
- ২। উপহার দাতার নাঙ, ঠিকানা আদি ইকরে দিয়া ১৫ (পনর) দিনর ভিতরে স্বাক্ষর করিয়া চিঠিহান দিয়া পেঠাদিক। উপহার সংখ্যাহানির মাশুল চারি সংখ্যা (V-VIII) আট সংখ্যা (V-XII)র মাশুল রূপা ৬০/১২০ হান অগ্রীম দিয়া পেঠাদিক। উপহার সংখ্যাহানি ইজ্জুমক তানুর নাঙে দিয়া পেঠানি ঐতৈ।

### উপহার যোজনা মূল্য :

উপহার সংখ্যা চারিহান (V-VIII) রূপা ৬০ হান। (প্রকৃত দাম রূপা ১০০ হান)

উপহার সংখ্যা আটহান (V-XII) রূপা ১২০ হান (প্রকৃত দাম রূপা ২০০ হান)

### গ্রাহকর সীমা বর্দ্ধন-নুয়া গ্রাহক অনারকা

- ১। নিজর গ্রাহক সীমা বারো নুয়া গ্রাহক অনারকা আগামী ৫ম-৮ম / ৫ম-১২শ চারি / আট সংখ্যারকা নিজর নাং ঠিকানা ইত্যাদি ইকরে দিয়া চৌকুনি ক্ষেত্রগৎ শুদ্ধ চিহ্ন দিয়া চিঠিহান দিয়া পেঠা দিক। ৫ম-৮ম চারি সংখ্যারকা রূপা ১০০ হান / ৫ম-১২শ চারি সংখ্যারকা রূপা ২০০ হান দিয়া পেঠাদিক।
- ২। গ্রাহকর গ্রাহক সীমা বর্দ্ধনর / নুয়া গ্রাহক অনার মূল্য এবাকা না দিয়া পেঠেইলে অর্ডারর পয়লাকার সংখ্যাহান ভি. পি. পি. ডাকযোগে দিয়া পেঠানি ঐতৈ। এহান পোস্ট অফিসে যানা বেংকে যানার ইনি হান দুরেই করে দেনার নিঙে করানি ঐল। মনেইলে M.O. করিয়া / বেংক ড্রাফট / চেকে দিয়া পেঠানি পারতাঙাই। বেংক ড্রাফট / চেক / M.O.ত এম কে সিনহা, আই এফ্ এচ (রিটার্ড), এডিটর, অপরূপা বুলিয়া দিয়া পেঠা দেনি লাগতৈ।
- ৩। গ্রাহক বারো উপহার পেইতাই গিরক গাছির নাঙে ডিসেম্বর, ২০০৬ 'অপরূপা'র সুদৃশ্য বাল কেলেগার আহান ২০০৭-২০০৮ ইংরেজীর ডাকে দিয়া পেঠানি ঐতৈ।

পরিচালক  
অপরূপা

অপরূপা উপহার যোজনা	
<input type="checkbox"/> হাই, উপহার সংখ্যা (V-VIII/V-XII) চারিহান / আটহান বিশেষ রেহাই মূল্যে রূপা ৬০হান/১২০হান তলে নাঙ সাদ দিলু মোর সাগেই / মারুপ / বেইবুনি / শৌ'র নাঙে দিয়া পেঠা দিবাঙ।	
নাঙঃ	
ঠিকানাঃ	গাঙ/শহর
ঘর নংঃ	পথ নংঃ
বাইলননংঃ	
পোঃ অঃ	পিন কোডঃ
জিলাঃ	ষ্টেটঃ
উপহার দাতার নাঙ, ঠিকানাঃ	
নাঙঃ	
ঠিকানাঃ	গাঙ/শহর
ঘর নংঃ	পথ নংঃ
বাইলননংঃ	
পোঃ অঃ	পিন কোডঃ
জিলাঃ	ষ্টেটঃ
ফোন / মবাইল	
<input type="checkbox"/> স্বাক্ষর গ্রাহক সীমা বর্দ্ধন বারো নুয়া গ্রাহক অনারকা হাই, মোর নুয়া গ্রাহক সীমা / মোর নুয়া গ্রাহক করে আগামী ৫ম-৮ম / ৫ম-১২শ চারি / আট সংখ্যারকা, রূপা ১০০/২০০ হান মূল্যে বাড়া / করে দিবাঙ।	
নাঙঃ	
ঠিকানাঃ	গাঙ/শহর
ঘর নংঃ	পথ নংঃ
বাইলননংঃ	
পোঃ অঃ	পিন কোডঃ
জিলাঃ	ষ্টেটঃ
ফোন/মবাইলঃ	
স্বাক্ষর	

REPLY CARD

To,

Shri M. K. Sinha, IFS (Retd.)  
Editor APARUPA  
House No. 47, Rajgarh Road  
West Bye Lane - 12  
Guwahati, Kamrup, Assam  
PIN CODE: 781007

## অপৰূপাৰ বিশেষ আকৰ্ষণ

আদৰ্শ সংগ্ৰহ

অপৰূপাৰ জ্যোতিষৰ চকু ধাক্কাৰে  
নিকলিছে। নিজৰ ভাৱ নিজৈ হাবলৈকে।  
নিজৰ বিদ্যা-আদৰ্শ আভিলাষ নিজেনিজে  
কাৰিক।

জোৰ লৈবিক-লৈলো আমৰ্শমান,  
চাকুৰী, প্ৰাণোদ, বৈ-বৈশ্ব, বিদ্যা-সাদ  
সংসাৰ নানা অশান্তি, সুখাশাশ্বতী, মায়া  
মোক্ষমা, স্বৰ্গদোষৰ হুকুমাৰ, অসহ্য নানা  
সমস্যাৰে জামৰ্শমান মলৈলৈ, জীৱন আৰু  
লোৰা বুজি কৰা খামাৰলৈলৈ, জামৰ্শমান  
পাৰা মলৈলৈ, অসহ্য সমস্যাৰ সমাধান  
পাৰা মলৈলৈ, অসহ্য কৰ্ম আৰু গাৰ্হ  
হেৰুজী মলৈ মলৈ, সমাধ, মলৈ, চামৰ্শমা  
নাম মলৈ প্ৰমা দিয়াপোৱাৰিক।

আমাৰ আভিলাষ জ্যোতিষীয়ে বিচাৰ  
কৰিবা প্ৰতিভাৰ বিধান মাৰ্শাদিত।

লৈ দাখনা কৰা 505, ২১১ দিয়া  
লৈলৈলৈ।

নিজৰ ভবিষ্যৎ আৰু হাবলৈলৈ  
সাবধান কৰা খামাৰ অসহ্য-বিদ্যাৰে  
আৰু সহজ অসহ্য-আদৰ্শ কৰিবা বুজি  
কৰা জীৱনৰ লৈ পাৰাভাৰে।

ঠিকানা

অপৰূপা আৰু  
ঘৰ নং- ৪৭, ওলৈলৈ মলৈলৈ- ১২, ২৩৩৩  
২৩৩, ২৩৩ আৰু ওলৈলৈ, (মলৈলৈ- ৭।



## অপৰূপাৰ নিয়মাবলী

- ১। “অপৰূপা” সাহিত্য সংকলনহানৰ দাম প্রতি সংখ্যা রূপা ২৫ হান।
- ২। সংকলনহান ডাকযোগে দিয়া পেঠানি ঐতে।
- ৩। সংকলনহানৰ দাম (তিন মাহা / ছয় মাহা / বছৰ আহান) অগ্রিম দেনা লাগতৈ।
- ৪। সংকলনহানৰ দাম Cheque / Draft/ M.O./ Cash দেনা পারতাঙাই।
- ৫। গ্রাহকৰ নাঙ, ঠিকানা গাওঁৰ নাং / শহৰৰ নাং / পথৰ নাং / ঘৰৰ নম্বৰ / পোষ্ট অফিস / পিন নম্বৰ / টেলিফোন থাইলে টেলিফোন নম্বৰ দিলে সংকলনহান দিয়া পেঠানিত সুবিধা ঐতে।

- ১। বিজ্ঞাপনৰ বিষয়বস্তু Logo / Design / Literature পরিষ্কার করে ইকরিয়া বা ছাপেইয়া দিলে হবা।
- ২। বিজ্ঞাপনৰ মাশুল অগ্রিম দেনা লাগতৈ।

বিজ্ঞাপনৰ মাশুল	ভাগ	রূপা
২নং	Cover Page	৮০০ হান
৩নং	”	৮০০ হান
৪নং	”	৬০০ হান
হাদিৰ যে কোন পৃষ্ঠা আহান	চারভাগের তিন ভাগ	৫০০ হান
হাদিৰ যে কোন পৃষ্ঠা আহান	পৃষ্ঠার দুই ভাগের এক ভাগ	২৫০ হান
হাদিৰ যে কোন পৃষ্ঠা আহান	পৃষ্ঠার চার ভাগের এক ভাগ	১০০ হান

## অপৰূপাত লেখা দিয়া পেঠানিৰ নিয়মাবলী

- ১। লিখা পরিষ্কার ডাঙৰ আখৰে, আক পৃষ্ঠাত ইকরানি লাগতৈ।
- ২। অমনোনীত লেখা ফিৰং পানারকা উপযুক্ত ডাক মাশুল দিয়া নাং ঠিকানা ইকরা খাম আগ দেনা লাগতৈ।
- ৩। মনোনীত লেখা সংকলনহানাত ছাপলে ও লিখা ফিৰং দেনা নাইতৈ।

  
পরিচালক

সৰ্বস্বত্বকাৰ সম্পৰ্কৰকা  
M.K. Sinha, IFS (Retd.)  
Rajgarh Road, West bye lane - 12  
Kundil Nagar, House No. - 47  
Guwahati - 781 007  
Tel - 2514041



# PHALEI



Orion Tower, G.S. Road, Christian Basti, Guwahati - 781 005  
Shop No. 19, Mezzanine Floor  
Telephone : 2340204

Centre of Handloom, Handicraft & Garments  
Outlet of North-East Women's Welfare Society - Assam  
&

The only Library of the Bishnupriya Manipuri Language Books, Periodicals, Journals,  
Magazine and News Papers.

## ফলেই

শাখা দোকান

রাজগড় রোড, ওবেষ্ট বাইলেন - ১২, (কুণ্ডিল নগর পথ) ঘর নং - ৪৭,  
গুৱাহাটী - ৭, ফোন - ২৫১৪০৪১

উত্তর-পূব ভাৰতে বিষ্ণুপ্ৰিয়া মণিপুৰী হস্ততাত-বস্ত্ৰশিল্পৰ একমাত্ৰ দোকান  
আসাম, বাংলা, মণিপুৰ, নাগালেণ্ড, মিজোৰাম, অৰুণাচল, উড়িষ্যা, উত্তৰ প্ৰদেশ, হৰিয়ানা, কাশ্মীৰ, হেণ্ডলুম বারো  
হেণ্ডিক্ৰেফটৰ নিৰ্ভৰযোগ্য দোকান।

১৯৯৬ইংৰাজীত্ব জাতীয় সেৱাত ব্ৰতী আছে।

North-East Women's Welfare Society - Assam

বারো

বিষ্ণুপ্ৰিয়া মণিপুৰী ঠাৱৰ লেৱিক-লেইছৌ, পত্ৰ-পত্ৰিকাৰ একমাত্ৰ গ্ৰন্থাগাৰ।

বিষ্ণুপ্ৰিয়া মণিপুৰী সাহিত্য সভা পত্ৰিকা ফলেইত পেইতাঙাই।

সম্ভাষা - প্ৰকাশক - বেছেকুৱা - সেৱাৰী।

পৰিচালক  
ফলেই

Culture Handloom, Habit Handloom  
Support poor women weavers of the North-East  
&

Culture Writings, Habit Reading  
Support Mother Tangué, Serve the people

Management  
Phalei